

萬 有 文 庫

第 二 集 七 百 種


王 雲 五 主 編

道 園 學 古 錄

(三)

虞 集 撰

商 務 印 書 館 發 行



道園學古錄

(三)

虞集撰

國學基本叢書

# 道園學古錄卷之十四

在朝彙十四

## 碑銘

### 淮陽獻武王廟堂之碑

昔者汝南忠武王起義兵燕南。統率豪傑。略定郡縣。聲震河朔。及歸國朝。遂以其師攻河南。既滅金。將移師取宋。乃總諸軍以鎮亳。疏積水立城戍。開田護畊。宋人不敢北犯。其後淮陽獻武王復統亳州軍。以成大功。故亳有張氏之廟焉。其中廟祠汝南忠武王。西廟祀王第八子蔡國忠毅公。東廟祠王第九子淮陽獻武王。忠武始封蔡國公。而薨也。賜諡武康。又贈推忠宣力翊運功臣。太尉儀同三司。上柱國。獻武之薨也。贈銀青榮祿大夫。平章政事。諡武烈。又贈推忠効節翊運功臣。太師開府儀同三司。上柱國。齊國公。改諡忠武。皇慶元年。獻武之子珪。以中書平章政事。相仁宗皇帝。於是忠武進封汝南王。改賜今諡。獻武進封淮陽王。加賜保大二字。以益其功臣號。又改賜今諡。禮部以其事下郡縣。之有王廟者。至治二年。珪復入中書。歷相英宗皇帝。今上皇帝。於是泰定元年。加賜忠武以開國二字。益其功臣號。是年。天子肇開經筵。珪首當勸講。明年。解機務。封蔡國公。仍知經筵。以疾告歸。未幾。三遣使趣召見。上閔其病。重煩以政事。拜翰林學士承旨。仍以蔡國侍經筵。朝有大政。則就焉。有間。使來告某曰。先王之廟在亳州者。庭皆有麗牲之石。為忠武及忠毅之勳德。則既具刻而銘之矣。惟獻武之廟。我以忝預國事。不暇私顧其家。故未有

刻焉。因以王之墓誌神道碑家傳授某曰。刻文敢以屬子。某辭不獲。則對曰。昔嘗忝爲太史屬。固嘗知公家世勳德。及進講內殿。又執經以從。公後者三年矣。雖不敏。敢次第而書之。謹按王諱弘範。字仲疇。年二十餘。其兄順天府總管弘略。上計行朝。留攝其府事。吏民服其明決。時內附甫定。蒙古軍所過輒爲暴。王曰。國朝自有法制。我奉行之。執暴者決以杖。入其境。無敢犯者。順天者。故保州。以忠武故。陞府名。後有所避。又改今名曰保定云。世祖皇帝保定初。置御用局。以王爲總管。三年。李璫叛。濟南親王哈必赤丞相史天澤帥諸軍討之。以王爲行軍總管。且行。請幄帳於忠武。忠武曰。汝欲卽安耶。不與。乃命之曰。璫遠天必敗。汝勉之。雖然。璫劇賊也。圍城勿避險。地險則己無懈心。兵必致死。主者慮其險。苟有來犯。必赴救。可以立功。汝則勉之。及圍城。王軍城西。璫出軍突諸將。獨不向王軍。王曰。吾固受教矣。我易受攻。而彼不至。謂我弗悟也。乃築長壘。內伏甲。而外爲壕。開東門以待之。夜浚其壕。加廣。璫不知也。明日。果擁飛橋來攻。橋不足踰壕。軍陷。其得陵壕者。突入壘門。遇伏皆死。降兩賊將。璫襲遂敗死。論功。王最多。忠武聞之曰。眞吾子也。或言於朝曰。璫所以得爲亂者。盡專兵民之權故也。以此聞諸侯。諸侯果不自安。遂罷其子弟之在官者。王亦例解總管。至元元年。弘略入宿衛。上召見其兄弟。可代守順天者。因念王濟南之功。遂佩之金虎符。代爲守。二年。移守大名。未上。微服行民間。察其所患苦。見倉吏收民稅。視所常輸倍蓰。怨言載道。明日視事。首取而治之。民大悅。是歲大水。沒廬舍。且盡。租稅無從出。王輒免之。計相以專擅罪。王請入見。上前曰。臣以爲爲朝廷儲小倉。不若儲大倉。非擅免也。上曰。何說也。王曰。歲以水不收。而必責之民。府倉雖實。而民死亡。盡明年租將安出。活其民。使均足於家。歲取之有恒。非陛下府庫乎。此所謂大倉也。上曰。

知體。其勿問。其監郡有愛魯者。先在郡。任計吏不當。至使自經死。僚吏不悅於愛魯。發其事。王不與之。則愛魯無援必敗。王曰。同官也。力爲之解。不得。而愛魯抵罪。王亦爲之免官。歸鄉里。退然閒居。不以介意。六年。大括諸道兵。益園宋襄陽。益都淄萊等路行軍萬戶。丞相伯顏命王軍鹿門。斷糧道。絕郢復之援。主者曰。鹿門有張九。漢水以東無慮矣。於是王言於丞相曰。今規取襄陽。周於圍而緩於攻者。計待其自斃乎。然而夏貴乘江漲。送衣糧入城。我無禦之者。而江陵歸峽。行旅休卒。道出襄陽南者。相繼也。寧有自斃之時乎。若築城萬山。以斷其西。立柵灌子灘。以絕其東。則庶幾斃之道也。奏用其言。移王軍萬山。令嚴。恒無懈意。一日出東門。與諸將較射。大出。敵兵狎薄城。諸將曰。彼衆我寡。請嬰城自守。王曰。嘻。我與諸軍在此何事。敵至將不戰邪。敢言退者死。卽被甲上馬。橫戈立遣偏將李應當其前。他將將六百人攻其後。親率二百騎。爲長陣。敵之步陣間。陳而待。王下令曰。聞鼓皆進。擊未鼓勿動。敵麾衆入陣。我不爲動。至再且却。王曰。彼再進再却。氣衰矣。鼓之前後奮擊。宋師大敗。得奔還者無幾。八年築一字城。進逼襄陽。破樊城。外郢。九年命攻樊城。流矢中王肘。王束創見主帥曰。襄在江南。樊在江北。我陸攻樊。則襄出舟師來救。終不可取。若截江道。斷救兵。水陸夾攻之。則樊必破。而襄亦下矣。從之。明日復出。率銳卒先登。遂拔樊。襄陽降。以宋將呂文煥入覲。上嘉之。有錦衣白金寶鞍之賜。將校行賞有差。十一年丞相伯顏帥師伐宋。命王率左部諸軍。循漢江東略郢而南。十一月攻武磯堡。取之。大兵渡江。王爲先驅。宋相賈似道以其軍蕪湖。其帥孫虎臣軍丁家洲。王轉戰而前。大兵繼之。宋師潰。王前行。布宣威德。所過降下。師次建康。上遣使諭丞相。毋輕敵貪進。其少駐以待。王進說曰。聖恩待士卒誠厚甚。今敵已奪氣。亡在旦夕。過自迂緩。資敵得

爲計非策也。將軍治閩外，急緩之宜，難制以險度，乘破竹之勢，取之無遺策矣。丞相然之，卽日自馳驅至上前，面論形勢，得旨進師。十二年，師次瓜州，分兵立柵，奪其要害，守之。楊州都統姜才者，宋之名將也。所統士有部落種人，自爲一軍，勁悍善戰。至是以二萬人出揚子橋，都元帥阿朮與王當之兩軍夾水而陳。王以十三騎絕渡，衝之，陣堅不動。王引却以誘之，其驍將本回紇人，鎧仗甚異，躍馬出衆，奪大刀出前趣王。王還轡反迎刺之，應手頓殪。馬下立陣者，同口驢叫，震動天地，而敵人亦不覺失聲，遂潰走。追殺轉至城南門，斬首萬餘級。其自相蹂踐，與陷壕水溺死幾盡。比得入城，十無一矣。王素善槊，此戰衆尤服其奇雋焉。於是宋將張世傑、孫虎臣悉其國力，率水陸軍陳於焦山南北，將致死於我。我師合擊之，兵交，王之軍橫衝其旁，宋師大敗。宋自是不復能軍矣。追奔於圖山之東，王奪其戰艦八十，俘馘以千數。上功改亳州萬戶，亳軍忠武王舊所統也。王以爲請，遂還之。忠武王之事，憲宗皇帝嘗賜名曰拔突，拔突者，國語勇敢無敵之名也。於是上又以賜王爲名云。是年冬，丞相伯顏次臨安之長安鎮，中書左丞董公文炳、左出京口，由海道會之。王亦將兵而左，師次宋郊，丞相遣使約降宋主。宋主幼，其大臣難於削號，稱臣，請以伯姪爲禮，往返未決。王將命入城，數其桎臣之罪而詰之，遂屈服，竟取降表來上。宋亡，其主遂歸朝。而十三年，浙東又叛，王力疾討之。師次台州，遣人持書往諭，守將殺使焚書，我師怒，拔之，衆請屠城，王不許，誅其首禍者而已。台民至于今感之。明年師還，迎拜鎮國上將軍。江東宣慰使其民新脫鋒鏑，王撫安之。期月，境內稱治。十五年，王入覲，請於上曰：宋主旣降，其將張世傑奉其庶兄益王，是與弟廣王昺南奔，旣立，是於閩而卒，又立昺於海上，宜致討焉。乃拜蒙古漢軍都元帥以行。陛辭奏曰：國朝之制，無漢人典蒙古

軍者恐乖節度。猝難成功。願得親信蒙古大臣與俱。上曰。爾憶而父與察罕之事乎。其破安豐也。汝父欲留兵守之。察罕不肯。師旣南。而城復爲宋有。進退幾失據。汝父至。不勝其悔恨也。由委任不專。今豈可使汝復有汝父之悔乎。尙能以汝父宣力國家之心爲心。則予汝嘉。今付汝大事。勗之哉。面賜錦衣玉帶。又辭曰。遺燭未息。延命海渚。奉詞遠征。無所事於衣帶也。苟以劍甲爲賜。則臣也得。以仗國威靈。率不聽命者。則臣得其職矣。上壯之。上方寶劍名甲。聽自擇其善者。旣拜賜。又諭之曰。劍汝副也。有不用命者。以此處之。且行薦李恒爲貳。從之。至揚州。選將校。發水陸之師二萬。分道南征。以弟弘正爲先鋒。戒之曰。汝以驍勇見選。非私汝也。軍法重。我不敢以私撓公。汝慎之。弘正所向克捷。王進攻三江寨。寨據隘乘高。不可近。乃連兵環之。寨中懼。持滿以待。王下令。下馬治朝食。若將持久者。持滿者疑不敢動。而他寨不虞也。忽揮軍連拔數寨。迴擣三江。盡拔之。至漳州。親攻其東門。命將佐攻南門。西門。敵應之。乃乘虛入其北門。破之。鮑浦寨南瀕海。王曰。陸攻之必走海。令弘正圍以騎。他將攻其南門。又拔之。海瀕之郡。若潮若惠。皆圍結盤互。王威聲所至。恩信濟之。無不內附。十六年正月庚戌。由潮陽港乘舟入海道。至甲子門。獲宋斥候將都統劉青願。凱乃知廣王所在。辛酉至崖山。而他將自外省調至者。雖隸所部。然儕視不相下。有驕蹇意。幾敢違其號令。王以軍法斬其最甚者一人。衆乃懾服聽命。時宋人僑居海中。環列千餘艘。碇之。建樓櫓其上。隱然堅壁也。王引舟師當之。然其地兩山東西對立。其北淺。舟膠不可進。我師由山之東轉而南入大洋。始得與之薄。又出騎兵斷其汲路。燒其宮室。而宋益困蹙。無所容矣。世傑有僧韓在王軍中。三使招世傑。世傑不從。甲戌。李恒自廣州至。小舟更授以二海戰船守北面。二月癸未。我師將戰。或請以砲攻。

之。王曰：火起則舟散，不如戰也。明日，四分其軍，分處其東西南三面。王自將一軍，相去里許。下令曰：宋舟西艤崖山，潮至必東遁，急攻之，勿令得去。聞吾樂作，乃戰。違令者斬。先麾北軍一軍乘潮而戰，不克。李恒等順潮退，樂作。宋人以爲且宴，少懈。王舟犯其前，南衆繼之。王命高構戰樓於舟尾，以布障之。命軍士負盾而伏，令之曰：聞金聲起戰，先金而外動者死。敵矢傅我舟如蝟，伏盾者不動。舟將接，鳴金撤障，弧弩火石交作，頃刻逆破七舟。宋師大潰。宋臣以其主廣王赴水死，獲其符璽印章。張世傑北突吾軍而遁，令李恒追至大洋不及。世傑走未至交趾，風壞舟，與將士盡溺死。於是嶺海悉平。宋無遺孽矣。磨崖山陽紀功而還。十月入朝，錫宴內殿，慰勞良厚。王以瘴癘疾作矣，上命尙醫護視，日以狀聞。遣近侍臨議，用藥曰：吾有國事待其謀畫，必盡伎速愈之。敕衛士坐其門曰：九拔都病甚矣，非必不可不見者。宣詔止之可也。疾革，沐浴易衣冠，俾左右扶至中庭，面闕再拜。返居酌酒作樂，與親戚賓客爲別。遺言毋厚葬，甲一襲，刀一事足矣。明器以陶爲之。出南征時賜劍與甲，以畀嗣子珪曰：汝父以是立功，其佩服毋忘。語竟，遂端坐而薨。十七年正月十日也。得年四十三。上聞之震悼，詔京尹給喪事。所過郡縣以禮迎送，歸葬其鄉。之定興縣河內里，祔葬祖墓。而嗣子佩金虎符，襲其軍萬戶。二十九年，珪入覲，上謂太師月兒魯那延曰：此家父子相繼，自太祖皇帝以來，定中原，取江南，漢人有勞與國者，是爲最。張氏史氏俱稱拔都，史徒以籌議不如張氏之百戰立功也。所以爵其子孫者，豈可與常人同哉。遂拜樞密副使，行院江淮。自是敷歷臺省三十餘年，爲國大臣矣。王素敏悟，喜讀書，過目輒識。大義歌詩尤慷慨，身長七尺，修髯如畫，機明氣銳，言辯捷出，勇略絕人，輕財下士，拔於衆材，己不以爲惠，尙氣節，敦信義，與人交久而益敬，剛直自將，不爲勢位。



所屈。雖臨之以威。而辭氣洒落。理辯愈切。初伯顏至建康。大會諸將。出庫金行賞。而王後至。丞相曰。祖宗之法。凡以軍事會集。罪加後。雖貴近材勇。無所貸。爾何敢後。衆錯愕。王徐進曰。臨戰未嘗後。受賞恥居先。何爲不可。丞相爲之俛首。其能片言解疑悟類如此。簿錄宋內府金帛。行省都事夾谷士常與焉。旣而多所遺失。或因以誣士常。將就考驗。王曰。士常名士。行義有素。何可以此議之。請以本身官爵及家帑保。其必不然者。其後誣果明。南征時。宋文丞相天祥之軍。在潮之五坡嶺。弘正掩擊獲之。縛文丞相以至。椿以戈使拜。不屈。王釋之。待以客禮。吏士或諫。王曰。敵人之相。叵測不可近。王曰。忠義人也。保無他。求其族屬。被俘者。悉還之。及囚京師。聞王薨。至爲之垂涕。在海上。得宋禮部侍郎鄧光薦。禮之於家塾。以爲子師。嘗戒其子曰。居官律已廉慎。則公明自生。御衆賞罰信用。則人自致力。不懷報怨之心。怨亦自釋。此三言者。皆王所躬行者也。凡行軍非對敵。未嘗妄殺。吏卒有病者。必親視醫藥。不幸死。必轉送其家。凡上賜與。必分班士卒。麾下有功。賞或不時得。則慨然曰。人宣力如彼。而受抑如彼。後或解體。將誰與共功乎。甚者爲之涕泣陳說。不得請不止。故人樂爲之用。及爲元帥。雖有所刑戮。亦必爲之懇惻申諭。仁聞旣著。薨之日。天下莫不傷悼痛惜焉。今蔡國公又嘗謂集曰。先王棄世子尚幼。不足盡知其奇謀偉績。當時之交游。與老校退卒。于今略以澌盡。雖欲廣聞。不可及矣。至其昭如日星。不可泯滅者。則有信史。與王李二公之碑。在。可以參考者。故凡可知者。備書之。而不敢略。子一人。今蔡國公也。孫六人。某官某。曾孫十一人。某官某。集嘗觀於蜀漢矣。諸葛武侯旣歿。所在求爲立廟。後主不聽。百姓私祭之道上。或曰。宜聽立廟成都。又不從。步兵校尉習隆。中書侍郎向充等共言曰。周懷召伯。甘棠不伐。越思范蠡。鑄金存像。漢興以來。圖形立。

廟者多矣。亮之烝嘗止於私門。廟像莫立。非所以存德念功。述追在昔者也。宜聽立廟沔陽。親屬以時致祭。其故吏欲奉祠者。皆限至廟。君子以爲禮亦宜之。然則亳州張氏之廟。豈徒以著勳臣之世業哉。亦足以表朝廷之盛德。凡於腹心股肱爪牙之臣。無所不用其至者矣。故作詩以備樂歌云。其辭曰。

維昔世皇。受命自天。四征旣庭。遂開中原。越是南國。歷禩三百。德在炎燧。連往行息。百萬在師。不亟不遲。不殺而神。赫其神威。江流湯湯。談笑畢渡。木顛艸偃。有仆無拒。天子曰嘻。士亦勞止。時且徂暑。其休以俟。丞相文武。受言敬共。息銳養完。牛酒旨豐。王乃叩閤。請具爲奏。若峻阪馳。寧扼其後。面上方略。報不踰辰。往臨歟都。雷颺疾神。丞相傳言。天子聖明。以順來歸。請更民命。主幼臣迷。勞我行人。王曰弗庸。罪在柄臣。身涉其庭。氣直辭決。稱臣上表。再拜門闕。有保其遺。奔于海涯。延喘須臾。自靖其私。王曰不可。入告天子。不極其征。臣不敢止。乃錫神劍。名甲副之。抉瘴排炎。廓爲清夷。膠舟于壑。存其餘幾。王言三進。永訖炎紀。橫梁賦詩。波濤不驚。磨崖勒銘。表于鯢鱸。功則多有。壽位弗逮。榮隨哀興。業以久大。三錫彌尊。以啓王封。冕舄佩圭。盛服在躬。維茲毫人。服德以世。享嘗于廟。從王孫子。於赫世皇。濯濯靈聖。萬神景從。翼之風霆。我思淮陽。陟降在側。孰是下國。顧懷來格。言言新宮。高明深宏。中有王考。右有王兄。王之格思。庶其在此。焄蒿浮旂。孰感而致。維毫士女。具曰不然。我有井里。王爲阡陌。我有溝洫。王浚王畫。王于作邑。其城額額。我藝黍稷。亦有稻秔。羊豕在牢。以庖則盈。笳簫饒鐸。享士乃作。我迎我享。是用不忤。昔我父祖。荷戈執殳。從王南征。百戰是俱。春雨旣濡。秋降霜露。王其享茲。從我父祖。維時君子。顧瞻咏嗟。咨毫庶士。孰知其他。王有嗣子。相我仁廟。正言于庭。必抉其要。邃深蔽虧。羣讒切膚。帝尙仁孝。寧之厥家。英宗赫赫。如日斯烈。

搜好率庸。不假毫髮。臨軒視之。命過其軀。託之股肱。恩信渠渠。天難諶斯。難起倉猝。慮深謀達。罪人斯得。聖明繼統。車塵徐徐。亦惟世臣。謹度不渝。既寧既好。思極厥保。陳經啓心。非法不道。申申其居。侃侃其容。孚于帝衷。以世師工。王廟奕奕。視此無斃。匪毫是私。國有恆秩。

### 知昭州秦公神道碑

公諱仲。字山甫。姓秦氏。世爲洛陽大族。大父和。仕金爲河南安撫使。既歸國朝。父安爲河南三路提舉。公嘗從紫陽楊煥然先生學。知名。得給事裕宗皇帝潛邸。郝文忠公經之使宋也。宋人留之。真揚間。宋亡。天子嘉郝公之節。擇十得公。迺之還京師。久之。除承直郎。建康路總管府判官。季父長卿。倜儻有大節。世祖皇帝潛邸在京兆。已知其名。及卽位。召在宿衛。與故御史中丞劉公宣爲友。以氣岸相高。時宰阿合馬秉政。聚斂罔上。怙權寵常。伺察言己者。中以危禍。廷中相語以目。無敢論列。長卿乃上書世祖曰。阿合馬擅生殺。人莫敢言。爲國蓄積怨毒已甚。其鉗制左右。使不得徹上聽。情叵測。似秦趙高。私家之蓄。過於公家。覬覦資籍。情露。似漢董卓。春秋無將。請及時論法。按誅之上。以其書下中書。阿合馬固善伺人主意。力足使侍中貴人。掬解事得寢。他日以爲宣德。鉄冶弗治。須藉能者。奏用長卿爲同知。即以折閱課額數萬緡。爲長卿罪。下吏卽獄中用濕紙掩口鼻斃之。盡沒入其洛陽家產。人莫不冤而哀之。然終無一人敢爲長卿言者。公乃去官。不復干仕。阿合馬死。朝廷更新政事。姚文公燧手爲書。爲執政言。秦仲以諸父之仇。當國恥之。閑廢至今。臺憲力言其人貧不能起。此風厲所係。宜不待於有言者。公得所爲書藏之。不以發。今固在其家也。善乎史官歐陽玄作長卿傳。而論曰。或曰。使長卿如山甫勇去。庶不及難。曰。山甫求無負其

諸父長卿求無負其君一道也。曰：怨乎？曰：自古君子死，小人手者多矣。後之君子終不以爲悔，又慕効之。夫後者之無悔，則前者其有悔乎？是以知其無怨也。可謂得秦氏父子之心矣。至元二十五年，用事者急聚斂，遣使天下，大括金玉珠貨器物贏餘，苛酷吏請盡辟知名清彊吏以任事。公雖居閑，猶被迫遣治徽廣德之會。是時公府之出納無容復有餘羨，此直以無義而取之耳。而操竊郡縣危甚。公曰：吾意誠知其不可，然吾受罪去固不辭，吾去而他至，則其害將不可言爲物色，其稍可追理者以應之。視他處固不能十一二也。更以數少責之，亦不爲變。後五年，行臺治書侍御史裴公道源監銓廣西外選，舉公知昭州。有善政，郡治無事，每游歌竹山，賦詩爲樂。自號歌竹山人，卒於官。三十年三月也。年五十有一，初殯建康城南。某年月日，歸葬洛陽某處。永康胡長孺志其墓。夫人喬氏，繼許氏，孫氏，男子四，從龍，中憲大夫，僉秦禧宗禮院事，從德，榮祿大夫，中書左司郎中，從某，從禮，女子六，堦馬成，段時中，刑師雍，其三天孫，男幾人，惟秦氏先世行事卓然，可稱國家修皇朝經世大典，訪問遺佚，而從龍嘗夢其先人問從王父事，已報史館，否得歐陽氏所著傳，始末甚具。以上送官。昭州以子贈某官，夫人封某，於法得立碑神道，故來請銘。銘曰：明主在上，則有直臣，憂國奮義，蹈禍亡身，公以從子泣血慎德，豈曰避仇，實瘴蟲賊，陰消陽明，君子于征，名公具言，猶保幽貞，愛民之仁，拯物之智，天不與年，百未一試，信道不回，古人所難，父子相望，風節厲完，乃瞻後人，並立朝著，爲國材賢，綽有令譽，維洛泱泱，潤潭柏松，過者式之，遺直之宮。

真定蘇氏先塋碑

奉訓大夫刑部主事蘇志道命其子天爵奉狀來請曰：維蘇氏趙郡著姓，其後有自行唐徙真定者數世。

矣。志道不令。無敢違祖父之訓。執事無敢不謹。以獲祿於朝。先世之餘澤也。然而遺事隱德之可知者。曾大父嘗言。志道猶志之高祖。而上家牒軼於兵難。無可考。故行唐之先塋。相傳在縣西南党家原。既莫知其處。葬真定府北新市鄉新城原者。曾大父嘗言。東北一丘。是始遷之墓。族人之同塋異兆而藏者。猶識其爲某親某親。今隱然高可隱者相屬。亦莫得而名之。悲夫。今天下治平久矣。非若曩時之逃難解散也。志道又幸得立石表之。不爲踰禮。奈何忍使邈焉堙沒。以遺子孫無窮之悲乎。謹述世次年月行事。願爲文刻之石。表諸墓道云。曾大父諱元老。資純厚。儀狀偉然。嘗慷慨有大志。貞祐二年。以其家從金主徒汴。汴且危。同徙者猶乘便取人美田宅。乃歎曰。已矣。無可與爲者。吾歸守吾丘隴死耳。崎嶇兵間。數瀕於死。期月而始達。居久之。遂以貨雄其鄉。樂周人之急。歲數飢。常存活其鄉里。施及行旅。至今人能言之。始汴亂時。倉卒失其弟。物色之。終身不能得。言之輒垂涕。其天性可見已。至元十三年七月卒。得年八十六。娶孫氏。生子一人。曰誠。誠少長戎馬。尙氣節。喜施與。尤謹孝養。時郡邑新定。無知爲學者。獨能教其子。爲鄉人先。諸豪觀望時勢。所爲多不軌。所至民盡室逃之。獨能留養其親。使諸豪無敢犯。或更從其化導焉。敏治生。而不喜殖產業。善飲酒。不亂。然既老。得酒。意氣猶見於言笑間。大德二年十二月卒。得年七十八。娶畢氏。子五人。曰榮。祖曰立。曰實。曰信。曰德。順榮。祖幼穎悟。善學。嘗從同學自鄉校夜歸。甚寒。同學者將叩門。亟止之。曰。聲遽。將驚吾親。徐待門啓。而後入。祖父嘗泄利。被寢席。手掬去之。而浣滌以水。兼備敬愛。鄉之達士。常舉以風爲人子者焉。與諸弟居。衣服飲食。雖一瓜不共。食不食也。教子嚴甚。或勸之曰。君才一子。蓋少寬。必正色對曰。豈以一子故不教之也耶。事師尤謹。有疾。親奉之。與朋友期。風雨寒暑。未嘗後至。

嘗持白金入城府售之。道過其友家。偶墜地。其友故藏之。以觀其所爲。竟起去。顏色不爲動。其友語之曰。吾嘗服子有量。今益信。家藏書數百卷。手錄讎校不倦。因金大明曆。稽筭爲書數篇。頗易其舊法。旣而歎曰。爲成書久。亦必差。夫曆數者。民事之所當先。而儒者莫之習。何哉。凡鄉里有婚姻喪葬。必從問期日禮節所宜。有疾苦。必賴其飲食醫藥之餽。有鬪者。聞一言明是非。可否之決。各解去。不復詣吏。名旣著。稍起從都轉。連使辟。監眞定稅務。贏餘不入私家。以廉平稱。未幾。以親老辭去。不復仕。終身年三十七而卒。至元十二年五月也。娶吳氏。子志道也。女三。適劉從道。賈玖。馮慶孫。天爵也。女孫三。適勸農司大使宮天禎。眞定醫學錄張蒙章。佩監知事何安道。志道從弟七人。嗣道達道。立子也。安道實子也。師道昌道。信子也。允道進道德順子也。嗣道之子五。可名者天澤。安道之子二。可名者天章。允道之子未名也。眞定蘇氏先塋者。凡其族之卒者。皆以其次爲兆葬焉。而其配從之。備書其子孫之名者。著其族也。獨詳志道之世者。志道長且貴。又爲志道志也。大德中。志道爲憲府史。從御史按事遠邊。御史或將曲撫之。志道正色曰。小人猶有所不爲。君奈何若是。御史義而從之。而他官輔行者。竟以賄敗。某由是識志道。與之游。至大二年。尙書省立。志道爲中書掾。中書掾見躡藉甚。死灰志道泊然于職。不變不退。後察其行事多方直守義。心敬愛之。其自中書省檢校官爲刑部主事。皆與集爲同朝。集爲國子師時。天爵爲生。以鄉學尤見親。故爲之表而銘之。銘曰。

蘇氏始封。出司寇。秦從武節。遠莫究。趙郡相望。接遙胄。去之百代。世職復。司刑郎吏。儼冠綬。歸視高塋。廣以表。斧形馬鬣。莽回伏。子後父食。孫祖佑。繼宗聯支。有疏茂。體魄下寧。氣來就有。別蜀洵譜。維舊祖尊親。

著族用收法之著銘表神道世世子孫可長守。





# 道園學古錄卷之十五

在朝叢十五

## 碑銘

嶺北等處行中書省左右司郎中蘇公墓碑

延祐七年二月壬戌中憲大夫嶺北等處行中書省左右司郎中蘇公志道字寧父卒于京師七日戊辰子天爵以其喪歸真定三月乙酉葬諸縣北新市鄉新城原先塋之次而刻石以文曰嶺北行省治和林國家創業實始居之於今京師爲萬里比邊親王帥重兵以鎮中書省丞相出爲其省丞相吏有優秩兵有厚餉重利誘商賈致穀帛用物輕法以懷其人數十年來婚嫁耕植比於土著羊牛馬駝之屬射獵貿易之利自金山稱海沿邊諸寨蒙被涵煦咸安樂富庶忘戰鬪轉徙之苦久矣丙辰之冬關中猝有變未兩月遂及和林守者不知計所從出人大震恐並塞奔散會天大雪深丈餘車廬人畜壓沒存者無以自活走和林無食或相食或枕藉以死日未昃道無行人方是時除吏率懼怯顧慮辭不往獨公受命即行曰豈臣子避事卽安時耶既至曰事孰急於賑饑者明日告其長曰幕府謹治文書數實錢穀知前遇事變無甚費失上下因爲姦利取且盡徒有粟五萬耳民間粟石直中統鈔八百貫安從得食請急賑之大人人三斗幼小六之一卽亟請于朝曰倉儲無幾民與軍俱天子赤子賑民饑將乏軍興謹儲之則坐視饑者之死不得已饑者急在且莫已擅發願急募富商大家先致開平沙靜附近之粟別設重購實邊勿

惜一日之費。爲經久慮。幸甚。中書省以聞。天子爲遣使護視賑饑。且下令曰。有能致粟和林。以三月至。石與直五百千。四月至。石與四百五十千。五月至。又減五十千。至皆卽給直。賈運踵至。不三年。充實如故。乃爲成法。使勾稽考覈。參伍鉗制。以相承。吏守之勿敢易。於是沿邊諸王多汎索。公持法一不予。王怒。使人謂公。錢豈爾家物。公獨曰。有司知給軍事。非軍事。誠不敢擅與。且謹惜樽節。非爲己私。王幸察。亦無以爲罪。皇子安王是之。褒以衣一襲。吳王亦知公徒行。予名焉。公受而傾橐。償其價。和林禁酒法輕。不能止。中書更奏重法。罪至死。令下三日。索得民家酒一缶。趙仲良等五人當坐。省府論如後。奏公持不可。曰。酒非三日成者。犯在格前。發在格後。當用後法。論當坐。猶常用詔書。審復詳讞。乃奏決。無敢擅殺。衆不可。公獨上其事。中書省刑部如公言。其人皆得不死。人知公有明決。爭者悉詣公。公曰。我不得治有司事。叱遣不去。卒得一言。則皆服而退。和林旣治。事日簡。乃卽孔子廟。延寓士之知經者。講說。率僚吏往聽。至夜分休。孔子廟。故丞相順德忠獻王所築。未成。而王薨。至公始卒其工。朝廷知公功。使者往來。必撫問慰勉。監察御史按事至邊。民數百人。狀公行事卓卓者數十上之。御史以聞。而公與同列多異議。代歸。百姓不忍其去。行至京師。卒。公初以吏事爲真定。守山西姚公天福所推擇。旣知名。轉補山西河東道按察司書吏。用使者程公思廉薦。爲監察御史。書吏轉戶部令史。歷樞密院中書省掾。出官承直郎。中書省檢校官。刑部主事。樞密院斷事。府經歷。嶺北省郎中。終始不離吏事。然皆有可稱者。在真定。從其尹決獄。竟大旱。俄雨。在河東。所按問。無自言冤者。在察院。從御史按事遠方。能正色。感愧所事。令無敢失職。在戶部。從禮部侍郎高公昉。治白雲宗獄。浙西白雲宗強梁富人。相率出厚貨。要權貴。稍依傍釋教。立官府部署。其人煽誘。

劫持合其徒數萬。凌轅州縣。爲姦利不法者。能爲明其誣誤者出之。田廬資賄常沒入者。鉅萬沒入之。良家子女數百。當還民間者。還之。閱二歲。五往返京師。以具獄上。在樞密院。軍吏子孫常襲官。其貧乏者。至十餘年不得調。悉舉行之。天子使大臣行邊北方。獨以公從。有弓矢衣鞍之賜。在中書。值尙書省立。威勢赫然。中書掾多從尙書辟。公獨不赴。泊然守局如常。尙書省罷。分鞠其銓選不法者。黜奪必以理。爲檢校官。得工戶二曹。濫出財物數千。收之。得吏曹官資高下失常者數十事。正之。在刑部。能不用上官意出故犯者。能卻時宰欲殺盜內府金而獄未具者。能出主盜吏之使盜引良民者。能刪治其條例。以便引用者。在樞密斷事府。能辨庶弟之誣。其兄奪其官者。總計之。蓋未嘗一事苟廢其職者也。然和林之政偉矣。我國家初以干戈平定海內。所尙武力有功之臣。然錢穀轉輸。期會工作。計最刑賞。伐閱道里名物。非刀筆簡牘。無以記載施行。而吏始見用。固未遑以他道進。士公卿將相。畢出此二者而已。事定。軍將有定秩。而爲政者。吏始專之。於是天下明敏有材智操略。志在用世之士。不繇是無以入官。非欲以是名家。趨急用也。而世或專以善持長短。深巧出入文法。用術數使利爲警病者。殆未盡也。不然。若蘇公者。其可以從吏起家少之哉。公幼不好弄。寡言笑。不妄交。爲吏視文書。可否奉行。不待請言者。坐曹歸。卽闔門不通問。謁對妻子如嚴師友。內外肅然。好讀書。尤尊信大學。及陸宣公奏議。未嘗去左右。篤於教子。餘俸輒買書。遺之子。亦善學。卒以儒成名。如公志。公之先。趙之欒城人。再徙真定。曾祖元老。祖誠。考榮。祖以公貴。贈奉直大夫。同知中山府事。飛騎尉。真定縣男。妣吳氏。贈真定縣君。遺事具先塋碑。娶劉氏。封真定縣君。黑軍萬戶。義之孫。征行百戶。誠之女子。男一人。天爵也。以國子高弟。授從仕郎。大都路蘄州判官。治公喪。以禮。能

不用淨屠者。女三人。適勸農司大使宮天禎。次適張蒙。次適承務郎河南行省都事何安道。封恭人。孫男曰淵。於是公之年才六十耳。雖久服官政。皆佐人。無所自遂。方鄉用。遽沒。君子惜之。銘曰。有肅蘇公。執德不回。淵嘿自持。弗耀其材。始時羣公好善。已出。孰學孰耕。匪求乃得。得不以求。氣直而昌。蹇蹇舒舒。何行弗臧。直道若倨。不利涉世。我篤自信。守以終始。五掾大府。位卑志行。四命于朝。彌光以享。領額和城。興王攸理。控制朔易。何千萬里。國人居之。谷馬雲生。尙莫往來。矧周其情。御史有簡。徒執以書。孰害其人。據義抉除。天子德音。元戎往布。曰爾從我。弓馬錫予。再歷其方。有法有恩。其人識知。據語孔文。狙安易撓。我際其會。以哺以繒。幙府維最。邊人方懷。公不少留。見用駸駸。而疾不瘳。炎炎弗趨。寂寂弗變。當爲而爲。當辨斯辨。退而能思。閉戶深居。制行甚嚴。動本於儒。儒行吏師。庶其在此。有書滿堂。以遺其子。子能習之。亦允蹈之。豈惟宦成。昂公之私。匪源無深。匪流無長。以承以傳。在此幽宮。

牟伯成墓碑

隆山先生。姓牟氏。諱應龍。字伯成甫。故宋朝奉郎知彭州贈通奉大夫桂之曾孫。資政殿學士正奉大夫。累贈光祿大夫諡清忠子才之孫。朝奉大夫大理少卿嚙之子也。淳祐丁未。清忠公以國學博士言事。忤時宰鄭清之去國。抵吳興寓第。而先生生。清忠公喜。字先生曰翁歸。稍長。警敏過人。日記數千言。作爲文章。志趣高邁。清忠公以直道事理宗。爲時名臣。登其門者。一時人望。先生皆得而親之。丞相江公萬里。參政楊公棟。高公斯得。端明湯公漢。尙書劉公克莊。至折行輩下之。而高公薦之尤力。此先生之始年也。先生常以世嘗奏京官。輒讓其族父諸弟。而咸淳辛未。擢進士第。時賈似道持國柄。欺上罔下。妄以伊周自

擬衆口和附。因欲致先生。乃好謂馬相廷鸞曰。君故與清忠游。今其孫踐世科。誠難能。幸見之。當處以高第。先生拒之。不往見。及對。具言上下內外之情不通。國勢危急之狀。考官異之。而不敢置上第。調光州定城尉。人或惜之。先生曰。昔吾祖對策。以直言忤史彌遠。得洪雅尉。今固當爾。無愧也。沿海置司。辟爲屬。未幾。以心疾乞告歸養。而宋亡矣。故相留公夢炎。事世祖皇帝爲吏部尙書。以書招先生曰。苟至翰林。可得也。先生不答。留尙書愧之。旣而家益貧。稍起教授溧陽州。遂以上元縣主簿致仕。此先生之歷官也。先生之母鄧夫人。故太史李公心傳外孫也。先生猶及見太史。每接語終日。而先生史學端緒自此始。太理公前國亡時。已退不任事。至是益不出。父子之間。討論經學。以忠孝道誼相切劘。若師友然。自大官顯人過吳興者。必求太理公拜床下。得一言而退。終身以爲榮。而先生以元子侍左右。見者感服。一以爲師表焉。其於經皆有成說。門人不能盡傳。行於世者。五經音考若干卷而已。先朝文獻淵源之懿。日以曠遠。時人無能言者。或妄言以自詭。輒牽合無據。先生道其官簿族系。月日鄉里。如指諸掌。蓋非直其強記如此。亦故家習熟見聞而然也。其爲文。沛然若江河之決。不極所至不止。時人以爲似眉山蘇氏。此先生之爲學也。先生簞瓢屢空。不以介意。門生故人。或有餽。苟非義不受。與人交。樂易真實。不以矜厲爲容。談笑傾倒。援引根據。不見涯涘。居吳興三世矣。而風致猶故鄉。自號曰隆山先生。示不忘其故云。此先生之爲人也。先生娶楊氏。奉直大夫知邵武軍恪之女。先生生五十二年卒。再娶程氏。朝奉大夫將作監繩翁之女。楊程皆眉山詩書故家也。男子五人。必遠。必大。必達。必勝。必昌。其三人早世。今必達必勝在。勝程出也。女三人。長適蘄州路教授陳琛。次適建寧路知事雲謙。次適殷天錫。先生卒於泰定甲子三月。享年七十有八。

歲。以是年五月乙酉葬于湖州烏程縣三碑鄉兌山之原。此先生之終也。前先生之卒一年。某始免先太史喪。省墓吳門。先生手爲書命其弟。以其門人鄉貢進士陳澗祖所述平生來告曰。子之言可信。十世。蓋及我時。爲我著小傳。某承命不敢當。將詣吳興拜先生。會有國史之召。不果。泰定二年冬。程夫人之弟江山縣尹晉輔。以先生之子必勝書來。請具爲碑銘。曰。先生之志云。某惟家世仁壽。與先生同鄉里。門戶略相望。先生少先太史一歲耳。先生幸不鄙棄。托之以言。是有以處某矣。其敢以固陋辭。雖然。僅能書所得。而知先生者。庶其可信也。其不知者。固不敢言。言固不信矣。後之君子。信其所可知。則其未盡知者。可推見矣。故爲銘曰。

學孰爲博。實藏有作。運化參錯。掇拾偏駁。欺世之詐。文孰爲雄。江漢之東。浩浩不窮。補苴彌縫。嘻嘻粗工。有餘而藏。不足而張。我懷先生。豈私其鄉。斯文有傳。百世不誣。銘以信之。不其遠乎。

桐鄉阡碑

故贈某官封馬公某。以大德五年守光州。有惠政。後官閩中。以皇慶二年卒。囑家人曰。光吾桐鄉也。我死必葬諸其子祖常。奉喪北歸。至於光葬焉。表之曰。桐鄉阡云。某與祖常嘗在太史。故屬某識之。按公家世歷官行事。月日已具神道碑。此獨著其係光者。以示光之人焉。初金人侵宋江南。宋踰淮設關塞。列保障。而金之窺光者。自陳州出宛丘新息。坦途千里。無天險可恃。故光之不得寧居者。垂二百年。每兵至。郡豪輒率其衆。走保金剛山。須事定。然後敢出。是以國家既盡有宋地。且七八年。始知出降。而光得以成州。然耕者不足。周其土。來占田籍者。皆四方之人也。仁人君子。固亦盡然。重有感於斯已夫。方是時。公以有爲

之才。撫新集之衆。甫及三年。而自信夫千古之託。豈偶然哉。惜乎。舉措之微。有不獲盡知者矣。獨聞在那時。有請歲稅光畝。出粟十萬者。公力持之。卒不征。光人掇茶山中。以爲飲。運司行茶法。江南歲有吏索光人。脅重賄山谷之民。尤病。公卒懲之。使不敢復。至乃立學官。而躬教之。謂司馬公寔生是邦。家而奉祠。示之德行。規以革其頑鄙。若此者。光人之所以思公。而公亦以自信者與。昔人之所謂桐鄉者。良由是噫。計公之去光而歸葬。至于今久矣。昔爲公民者。少者壯。而壯者老矣。父兄長者。亦有以詔其昆弟子孫已乎。今天下日已治平。光爲內地。取賦有恒。制民生無與乎外事。地力完而物生敏。費用給足。然道非賓旅所通。出無車馬貨財之交。無所耗乎華靡。民之易治。蓋愈於昔。國家法令脩明。擇吏謹審。代公而治者。其蹟可數也。鬱乎茲阡。豈直係光人之思哉。理吾光者。可以有所覽觀矣。馬氏本西北貴族。由兵馬死事。號曰馬氏。而光之有馬氏。自公始。祖常。進士高第。爲代聞人。諸弟若子。相繼以文學入官。來者未可量也。故特著之。以俟夫考世徵德者。是亦光人之志也。

### 戶部尙書馬公墓碑

世祖皇帝之初。拔用豪傑。恒出其望外。天下旣平。思與民休息。乃定制立則。俾守其或。非積歲時。習故事者。不尙也。成宗皇帝數十年間。遵以勿失。故吏治無大變易。民庶宴然。可謂極盛者矣。方是時。公卿大夫。往往深沈敦厚。有大山喬林之意。若尙書馬公。溫恭在躬。樂善不倦。政本於學。退然若不能者。今其可得見乎。公諱煦。字得昌。姓馬氏。大父信。贈太中大夫。輕車都尉。扶風郡伯。夫人兩薛氏。並贈扶風郡太君。父公和。磁州提領。勸農官。贈正議大夫。輕車都尉。扶風郡侯。妣劉氏。贈扶風郡夫人。初馬氏居磁之滏陽。不

知世次。至勸農公。以能官見推於時。而弟天驥。方治書御史府。一門之盛。已著州里。外家劉氏。菡萏有異花。或以爲瑞徵。而占之曰。是當在其女子之子。其後公與其兄河南提學曙。國子助教昉。從鄉先生大鹵。楊震亭學。並爲聞人。而世遂以爲傳信矣。公以至元初。補大司農史。轉辟御史臺掾。十五年。拜行臺監察御史。秩滿。僉江西提刑按察事。二十二年。除荆湖行省員外郎。改廬州同知。二十六年。除江淮行省理問官。二十八年。除江西行省郎中。元貞元年。改山南廉訪副使。二年。行泉府卿。大德三年。拜戶部侍郎。四年。遷中書左司郎中。六年。出守濟寧。至大元年。移守湖州。三年。召拜刑部尙書。延祐三年。以戶部尙書致仕。入官四十年。凡十四遷。自奉議大夫。至正議大夫。八進秩。治績之著。不可勝紀。其尤關民事者。可書以傳焉。在行臺時。湖廣省臣托俘虜之籍。私挈其人。萬家無所詣愬。官亦莫敢正。公按還之爲民。時軍事未盡息。江上運輸方急。督運者怙恣。輒匿粟五萬斛。自入。而以風水爲解。公扶而奪之。還付吏。江西之民。吉州尤號富庶。爲吏者。縱欲以求獲。民不堪命。俗尙氣。常百計求直。因得善訟之目。實由貪殘迫之。非素然也。公行部。劾治其暴橫者。監州一人。而親至學校。禮其耆舊。與爲賓主。進子弟而教之。風化丕革。朝廷以內附旣畢。大料民新版籍。自淮至於海隅。不知奉行。民多驚擾。公在廬州。令其民家以紙疏丁口產業之實。揭門外。爲之期。遣吏行取之。卽日成書。廬民獨不知害。佐江西幕時。值行省復爲中書。盡去尙書舊吏。獨留公一人。其所部郡。擇民甲戶。主倉庫。民新附。不識法。又惟怯。不任事。率爲吏卒攘竊。及歲滿。必破家殺身。至其子孫。不能償。每受更有司。擅爲上下。與奪。而尙書省治財急。害尤甚。公曰。富人狃安。寧知官府不敗何待。此爲患無已時。當用精強吏代之。遂爲定式。倉庫無闕事。吏更以勞賞進用。至于今。使之時民。



既又以叛告大家者。長吏爲震動。而告者賄民。幸亟捕治之。公持不可。曰。叛當有物色蹤跡。遽以一言大索。比得實。已破家非一人矣。白遣所信吏往察。果妄坐告者如法。此二者。江西人言及之。猶感公不忘也。守濟寧時。有重車過濟州橋。橋危馬逸。車下注。有婦人行不及避。死輪下。有司論御者辟。公曰。此無殺人。意釋之。徒責金以給葬。其在湖。富商有傭舟師。至他郡者。溺死。或嗾舟師妻。訟商殺其夫。冀得賄。商不與。又不賄吏。吏誣商成獄。又有二人同市飲者。後三日。其一人死。既葬。或誑死者子。訟同飲者。同飲者不賄吏。吏亦誣之成獄。公一見皆釋。遣而豪家。毆人至死。納井中。以溺聞。吏成其獄。公曰。無溺狀。訊之得實。遂竟之。其精敏平允。類如此。富家私田跨縣邑。皆無算。援結大官貴人。如平交。氣勢出守。令上遠甚。析其戶。役爲數十。其在最下。賦役常不及。已而中下戶。反代之供輸。莫敢何問。公因買絲之役。會而均之。遂無所逃。鄰郡多法焉。胡安定先生墓。見奪於何山浮屠。公遷之高原而祠之。置守冢二家。徹淫祀二百區。興學校。築塘灑。嚴保伍。懲豪縱。蠲煩擾。皆有成法。二郡之民。思之不減於江西矣。是故答刺罕公之爲相也。病選法之滯。公適左司。考歷代典。故白之深。爲丞相所敬重。至遣其子。卒平章脫完公。禮之以爲吏師。在戶部時。天子遣使分道問民疾苦。公持節河東。舉措廢置。緩急先後。號爲得體。於是朝廷屬意大用公。而公益自信久矣。一總大司寇。不得行其志而去。遂終厥身。豈不惜哉。然公於讀書。尤深於易。老子。常自號觀復道人。大行之麓。有神隱山者。泉石幽勝。公既歸。遂日與門生羽人。息游其間。不以富貴往事。介意。其所存。固非人所盡知者矣。不然。公之所能至。豈不足如他人哉。而時之人。卒敵於世故。視神隱之樂。不能以彼易此者多矣。公又何憾焉。公以延祐三年卒。年七十三。娶彭氏。先卒。又娶夾谷氏。皆扶風郡夫人。四

子皆早世。用從孫某爲後。用公蔭爲某官。女一。適侍儀舍人賈某。馬氏之塋。始在郡西南陽城里。今葬屯川者。自公始。後幾年。爲泰定二年。立碑神道。賈某始來求爲銘。銘曰。

神慶之陽。滄流洋洋。有燁馬宗。世爲之望。望之儼儼。有梓有杞。桓桓勸農。侃侃御史。爰暨中書。中外踐更。宜秉國均。以究其成。善止弗蹶。亦未期耋。有綏瓊纓。臨滄以潔。軒軒乘車。沒齒走趨。孰不懷鄉。存其幾餘。思表令德。勒辭比事。匪孫子是遺。用憲國士。

洛陽楊氏先塋碑

承務郎中書刑部主事洛陽楊益。謂國史虞某曰。北邙之北。有重岡蜿蜒。隨爲表平。曰杜村之原者。古溝四周。漲潦溢流。注合于灑南溝之瀦。溇涵深碧。有龍居之。歲旱不竭。鄉人禱焉。我先塋實臨之。溝外有道。車徒所經。東隴南阜。隱若城郭。西獨虛敞。風氣宣通。宅是奧區。二百餘年矣。曾大父仕金。爲中原酒使。金亡。酒使歿。兵中兄弟五人。逃難莫知所之。獨大父自平陽得歸。奉先塋。大父之喪。先人以爲兆域。雖存世。次不可考。懼昭穆失序。則無以妥先靈也。旣卜地塋西。以葬大父。而別立石以表故塋。未果。先人歿。祔葬大父之次。自有誌。太吏其爲著故塋之銘。以成益先人之志。子孫雖散處他郡。歸而猶有考焉。則益之願也。按中京君諱德全。平陽君諱儀字子儀。諱庭實字獻卿者。故南陽府判官益之父也。益方正有才。器歷仕風憲。在朝爲名士。方見進用。蓋其所積者遠且厚。於此可見。故爲之銘曰。

北邙之崇。崇兮何千百年。披榛尋丘兮。孰無故先。徙死不還兮。言遭變遷。旣蕪復治兮。楊氏之阡。往者莫紀兮。知者三傳。有子立朝兮。孫曾以延。時平世遠兮。文存石堅。

國子助教李先生墓碑

東明李先生爲國子助教時。某後至。與先生爲同官。先生所居齋。諸生多年長豪俊之士。先生朝夕授之。經。懇款有程。方重純篤。授業者。知以質行爲貴。某少先生十餘歲。嘗觀其不可及。以自厲。方是時。故平章政事高公昉。故翰林學士元公明善。皆先生鄉里。雅敬先生。而高氏又與先生家連姻。二公赫然用事于朝。先生歲時往來之外。未嘗有所私謁。處士張子素。好立奇行。自表樹。瓠冠布衣。刺口言天下事。常傲視一坐人。亦少先生數歲。先生以鄉里待之。甚勤至。子素益加敬愛。嘗從駕上都。分教諸生之在宿衛者。比還。中道驛吏告乏馬。以牛車進。先生食已。攝衣升車。無一言。驛吏更相謂。以爲不常。斬長者。而從者亦愧服。先生居成均五六年。有傳其子好文。所著古文數十篇。至京師。故御史中丞張公養浩。與元公皆以文學自任。一見驚異。卽列薦之于朝。先生慨然曰。斯文之事。屬諸吾兒可也。至治末。集自江南召還。則先生已去世。而好文登進士第。歷史館成均。奉常。復得爲同朝。集見其深靖有學。未嘗不歎先生之有子焉。好文來言於集曰。昔先君子之在朝也。招撫府君之墓。得姚文公爲之銘。鄆城府君之墓。得閻文康公爲之銘。先君子歿。而諸老盡矣。同居成均者。惟子在焉。敢請銘集。誠不敢附二公之後。而與先生父子厚善。其敢辭。按李氏世居單州。諱訪。金義軍提控。生子聚。金亡。徙大名之東明。大帥河木魯版授軍民招撫使。生庭玉。鄆城令。先生第三子也。諱鳳。字翔卿。一字舜儀。幼嗜學。休休不廢。從鄉先生孫曼慶學。詩久之。曼慶謂先生曰。詩吾無以加子矣。其爲義理之學乎。先生迺屏絕金末律賦舊習。而究伊洛之遺書。寒暑不懈。嘗鬻粥未熟。而臨卷有得。不知釜之焦也。初從太史氏測景陽城。留居嵩穎間。讀書三年而後歸。爲郡學。

郟城病還東明。遠近學者從之。常以百數。稍遷廣平學正。大德丙午。始除國子助教。在官兩考餘。有司以常格除臨朐主簿。到官未久。卽去之。延祐丁巳八月己酉。終於家。年六十有四。以好文貴。贈從仕郎。郊祀署丞。加贈奉議大夫。太常禮儀院判官。驍騎尉。追封東明縣子。夫人王氏。故太醫院使康懿公安禮之從子也。通經史。善相其夫。教其子以有成。初封宜人。加封東明縣太君。就養京師。安貧而篤於禮。至順二年十月甲子卒。年七十有七。子一人。好文也。女適王思柔。孫三人。洙。浚。潞。女孫二人。皆幼。好文奉母喪。還東明。將以三年三月丁酉合葬。先生夫人于黃頭里之先塋。先生雅好岩壑。而所居遠於山。得奇石積諸齋前。以爲山。日對之吟諷。先生著書甚多。而不甚存藁。所存者有詩數百篇。曰西林集。西林先生所居也。銘曰。

先生之容。鬱乎山嶽之蒼蒼。先生之懷。浩乎河海之泱泱。用位不多。斂而歸藏。子以文興。于先有光。我表西林。永世不忘。

# 道園學古錄卷之十六

在朝彙十六

碑

御史中丞楊襄愍公神道碑

秦定改元詔書以朵兒只中丞爲帖木迭而所構害命昭雪之。三年月日特贈思順佐理功臣金紫光祿大夫司徒上柱國夏國公諡曰襄愍。明年月御史臺奏用其子武備庫提點不華僉河東山西道肅政廉訪司事不華旣拜命乃泣而言曰惟先臣之死於是七年矣陛下幸昭雪而贈卹之固已釋冤憤感德於地下臣雖萬死懼無以報稱願於法得立碑神道願載其事於貞石以昭陛下之明聖敢昧死請明日臺臣以聞制曰可且命臣曰汝某其具書以文臣再拜稽首而言曰朵兒只事具見明詔天下咸共聞之臣敢其終始可徵者武宗皇帝方賓天皇太后在興聖宮以帖木迭而爲丞相踰月仁宗皇帝卽位遂相之居兩歲得罪斥罷更自結興聖左右至爲折辱宰輔撓制中書諷以再相旣而居位怙勢貪虐兇穢滋甚中外切齒羣臣不知所爲於是蕭拜住自御史中書右丞又拜平章政事稍牽制之而朵兒只自侍御史拜中丞慨然以糾正其罪爲己任上都富民張弼殺人繫獄時宰使大奴脅留守出之乃強以它奸利事不能得丞相坐都堂盛怒以它事召留守將罪之留守昌言大奴所干非法不敢從它實無罪丞相語絀得解去而中丞已廉得時宰所受張弼賕鉅萬大奴猶數千使御史徐元素按得實入奏而御史

亦慙真又發其私罪二十餘事。天子震怒。有詔逮問。時宰匿與聖近侍家。有司不得捕。天子爲不御酒飲者數日。以待獄竟。盡誅其大奴同惡數人。時宰終不得中丞持之急。與聖左右以中旨召中丞至宮門。責以違旨意者。對曰。待罪御史。奉行祖宗法。必得罪人。非敢違太后旨。天子仁孝。恐誠出太后意。不忍重傷。嗚之。徒罷其相。而中丞亦遷集賢。天子猶數以臺事問之。對曰。非職事。臣不敢與聞。所念者。迭木帖而雖去君側。反得爲東宮師傅。在太子左右。恐售其姦。則禍有不可勝言者。其後仁宗棄羣臣。英宗皇帝猶在東宮。迭木帖而復爲丞相。乃宣太后旨。召蕭拜住。朵兒只。至徽政院。與徽政使失里門。御史大夫禿忒哈。雜問之。責以前違太后旨之罪。對曰。中丞之職。恨不卽斬汝。以謝天下。果違太后旨。汝豈有今日耶。又引同時爲御史。證成其獄。顧二人唾之曰。汝等嘗得備風憲。故爲是。犬彘事耶。坐客皆慚俯首。卽起入奏。未幾。遽稱旨。執而載諸國門之內。俱見殺。是時風沙晦冥。都人惱懼。道路相視以目。及天子卽位。詔書遂以誣罔大臣爲之罪名焉。其勢旣成。睚眦之怨無不報。太后爲之驚悔。而天子久亦覺其所譖毀。皆先帝舊臣。滋不悅。未及有所論治。而病死。會有天災。直言會議廷中。集賢大學士張珪。中書參議回回。皆曰。漢殺一孝婦。三年不雨。蕭楊等死。豈直一孝婦乎。是時迭木帖而諸子列在禁近。威儀猶熾。聞者失色。言終不得達。及珪拜平章政事。始入堂署事。卽告丞相拜住曰。賞罰不當。枉抑不伸。不可以爲治。若蕭楊等冤。何可不亟昭雪也。丞相韙之。迭木帖而之子相繼以賊敗。遂籍其家。然昭雪之事。終至治之歲。不遑暇及。今上皇帝入繼大統。詔書首以爲言。褒贈哀榮。相踵而至。幽明兩致。其感動焉。於乎。粵若我仁宗之仁孝。文物大備。英宗果銳。法度修飭。自古帝王之有德有爲者。未能與並倫。而一迭木帖而常因國有大故。乘間

用事以傷平明之治。天人共憤久矣。然卒保其首領以沒。而忠臣直士爲所誣搆者。乃有待於久而後明焉。此其人深技奇數。亦非常之材也乎。方其盛時。宦寺固結於內。術智爲用於外。幾莫如之何者。其計亦略得矣。而能嬰其鋒者。一二正人而已。卒皆蹈死而不悔。天下後世聞其風者。固欲考見其人之行事。以表忠直之終。不可泯者焉。然則若朵兒只者。臣敢不敘次。以塞明詔之萬一。謹按公名朵兒只。姓楊氏。世家河西寧夏。祖失刺。贈推忠佐運功臣。太保。金紫光祿大夫。柱國。追封夏國公。諡忠定。父失刺。唐兀臺。贈推忠翊戴功臣。太傅。開府儀同三司。上柱國。追封夏國公。諡康靖。公少孤。與其兄始齟齬。知自植立。語言儀觀。已如成人。兄弟相勵。以勳業。當時固以大器期之。事仁宗于藩邸。甚見倚重。大德丁未。從在懷孟。聞朝廷有變。將北還。命公與李孟先之京師。與右丞相答剌罕定議。迎武宗于北藩。仁宗還京師。譏察禁衛。密致警戒。仁宗感焉。至親解所服帶以賜。既佐定內難。仁宗居東宮。論功以公爲太中大夫。家令丞。日夕侍側。雖休沐不至家。官事亦決于宿次。衆敬憚之。會兄卒。涕泣不勝哀。仁宗憐之。存問優渥。待寡嫂有禮。待兄子不異己子。家人化之。循循然。毋敢失辭氣。進正奉大夫。延慶使。武宗聞其賢。召見之。仁宗曰。此人誠可任大事。然剛直寡合。上顧視之曰。然。終不及用也。仁宗始統大政。執誤國者。將盡按而誅之。公曰。爲政而尚殺。非帝王治也。上感其言。特誅其尤無良者。民大悅服。上與中書平章李孟論元從人材。孟以公爲第一。上是之。拜禮部尚書。初尚書省改作至大銀鈔。視中統一當其二十五。又鑄錢爲至大錢。至是議罷之。公曰。法有使否。不當視立法人爲廢置。銀鈔固當廢。銅錢與楮幣相權而用之。昔之道也。國無棄寶。民無失利。錢未可遽廢也。言雖不盡用。而時論是之。遷宣徽副使。御史請遷公臺司。上以宣徽膳用不

會。囑公領之。未之許也。有言近臣受賄者。上怒其非所當言。將誅之。張公珪爲御史中丞。叩頭諫不聽。公言于上曰。誅告者失刑。違諫者失誼。世無爭臣久矣。張珪真中丞也。上喜。竟用張公言。公拜侍御史。上宴閒時。羣臣侍坐者。或言笑過。則上見公正色。爲之改容。有犯法。雖貴幸無所貸。而譖言興矣。賴上知公深。潛不得行。未盡八閱月。拜資德大夫。御史中丞。中書平章政事。張閔以妻病。謁告歸江南。據河渡地。尊民力。公以失大臣體。劾之。張閔罷。江東西奉使。幹來不稱職。權臣匿其姦。冀不問。公劾而杖之。幹來愧死。御史納璘言事忤旨。上怒。叵測。公救之。一日至八九奏曰。臣非愛納璘。誠不願陛下有殺御史名。上曰。然則其左遷爲昌平令。昌平京邑。地近而境隘。民勞而事煩。凡期會供億。令稍非材。恒不免捶楚。以是苦之。公又言曰。以御史宰京邑。無不可者。然以言事得左遷。恐後之來者懲創。無肯爲陛下言者。不得請。數日上。讀貞觀政要。公侍側。上顧謂曰。魏徵古之遺直也。朕安得用之。公對曰。直由太宗。太宗不聽。徵雖直。焉用之上。笑曰。卿意在納璘耶。赦出之。成爾直名。有上書論朝廷闕失。而觸宰相。宰相怒。取旨囚之。司寇將殺之。公曰。詔書云。言雖不當。無罪。今若此。何以示信於天下。果誅之。臣亦負其職矣。上悟。釋之。於是特加昭文館大學士。榮祿大夫。以獎之。且以重耳目之寄。時位一品者。多乘間取旨。邀王爵。贈先世。或謂公眷倚方重。苟言之可得也。公曰。家世寒微。幸際遇至此。已懼弗稱。況敢求多乎。且我爲之。何以諷勵僥倖者。遷中政院使。未幾。復爲中丞。遷集賢大學士而死。時年四十二。娶李氏。同知諸路人匠總管府事某之女。有婦道。先公卒。追封夏國夫人。子一人。不華也。後夫人劉氏。同知徽州路總管府事某之女。公死時。權臣將奪以畀人。夫人剪髮毀容。以自誓。乃免。封夏國夫人。子一人。文殊奴。亦克稱其家者。公魁偉人也。寡言笑。



無鷹犬聲色之好。獎善如不及。嫉惡如仇讎。用人必當其材能。故一時風紀。號爲得士。論政事必合於義理。正言無所徇麗。臨患顏色不變。凜凜乎古大臣之風焉。其墓某處。凡公之行。尙多可述者。不悉具。特書其闕於國事者如此。故繫之以銘詩曰。

河源西陲。厥風勁強。豪傑時興。爲國駿良。駿良伊何。忠亮正直。柔不爲隨。剛不爲絀。昔在仁宗。治功安成。文和武寧。詠歌太平。躬爲孝恭。以事神母。教言時來。有順無否。或闔其幾。不驩以呻。投蠟膠箭。竊乘大均。天子曰嘻。誠有虓獠。彼爲無忌。我則有制。維時襄愍。執法在中。侃侃犯危。以折其衝。太母尙慈。天子尙孝。柙不防兇。稽我天討。國有大故。結髮慈闈。彼獨何心。假時逞威。朝衣載市。家憤巷哭。日莫風起。百身莫贖。人亦有言。害生于恩。忍爲凶殘。追卹有君。君子可殺。名不可滅。天定人復。幽枉卒雪。明明天子。別于奸忠。敷言萬方。大道爲公。至榮極褒。豈止哀死。勸忠方來。祿施孫子。春秋之義。誅意慎微。咨示來者。尙徵臣詩。

大宗正府也可札魯火赤高昌王神道碑

古者大臣有勳勞於其國。則範金爲鼎彝。而著之以銘。近古以來。凡頌德紀功者。於廟則有麗牲之石。於葬則有下窆之碑。因而刻文焉。於是推而樹表神道。則有跌首丈尺之異。以別等衰。知禮者。未之有改也。我國家六合混一。人文具興。王公大人之家。率是而行之。其盛大有加於昔者矣。秦定五年春。榮祿大夫買闔來告曰。昔我先世。冒絲高昌。未內附以前者。事逸不可考。自歸國朝。曾大父大父。至於我先人。歷事祖宗。至于今且百餘年。而我先人在延祐中。遂啓王封於故國。朝廷之恩德重矣。先人之歿。已二十五年。今葬諸城西三十里之田村者。法得樹碑神道。凡十有四年而未及刻者。非敢緩也。誠願少有所建立。以

報稱萬一歲月逾邁。大懼湮沒。今願有請于太史氏。賜之文而刻諸某嘗聞之。故事正六品以下。官中書。奉勅署牒以命之。牒具中書。官位最尊者令也。署牒者自丞相以下。而不敢以煩令。惟皇太子立。必兼中書令。樞密使。皇太子既受冊。卽中書上日。獨署一牒。明日省臣以其名聞。天子卽以宣命超拜五品官。其人自非素親近。有譽望。最于羣臣者。不得也。仁宗皇帝既平內難。武宗皇帝卽位。立仁宗爲皇太子。令中書如故事。所署勅。則買閭也。內外大小之臣。咨嗟感嘆。以爲不可及焉。國家之制。受分地而建王爵者。自非宗藩大戚。莫能得。元臣之有功以建國者。則或有之。亦不常見也。惟羣臣得推恩先世者。五等之爵。視秩爲差。卽受姓之望。或所居之鄉。以命之。至于昔有名號。嘗以君長來服之國。有司不敢擬授焉。而買閭之父。月魯哥。仁宗皇帝特詔追王其故國。且詔曰。此異數。他人弗敢援。以爲請。嗚呼。不亦盛乎。考諸其客。傅溥所爲行狀。蓋達卽孛生脫因。脫因生月魯哥。月魯哥生買閭也。延祐二年。達卽孛贈金紫光祿大夫。司徒。上柱國。追封涼國公。諡康武。夫人追封涼國夫人。脫因自贈資德大夫。中書右丞。追封薊國公。諡安定。夫人茶哥。追封薊國夫人。加贈太保儀同三司。上柱國。改封涼國公。諡安僖。夫人改封涼國夫人。月魯哥。大宗正府也。可札魯花赤。自贈榮祿大夫。平章政事。柱國。追封薊國公。諡忠靖。夫人女女哥。追封薊國夫人。加贈推誠宣義保德功臣。太傅。開府儀同三司。上柱國。追封高昌王。改諡曰莊肅。夫人改封高昌王夫人。皆學士具詔草。付主者行之。贊書具在。然則請列敘其世而刻之。以文禮也。昔在太祖皇帝時。睿宗皇帝以皇子在藩邸。剛明英偉。赫如天人。左右僕從侍御之臣。苟非其人。不在茲選。而康武公以幼穉之年。出入幃幄宮庭之內。一服御。一食飲。事體甚重。必以屬之。治稻田者爲戶三萬。所以供湯沐俸治焉。撫

其人以盡其力。敏其生以給諸用。不營一豪之私。由是邸中人甚敬畏之。是時草創。無闌入之禁。或造至帳下。自康武掌門衛。然後以事出入者。進止不敢踰分。凡宴飲貴屬。咸在酒行。或醉失顏色。以康武執法爲監。毋敢譁。安僖公當憲宗皇帝用兵於蜀時。以宿衛子孫善騎射。得從戰。比有功。世祖皇帝在藩邸。定難於朔方。又以謀勇見任。使奉公忘私。家用不給。上聞而賜白金。以兩計者三千五百帛。以車計者五拜。受至家。曰。恩惠豈可私。輒以頒諸族人。故舊之貧者。裕宗皇帝爲皇太子。慎擇輔翼。主金帛者。於職爲要。以其廉也。特以命之。而莊肅王之生。實中統建元之歲也。宗藩乃顏起兵。內嚮世祖皇帝。親征。是年。王廿有六。以扈從在行。宣力奮擊。爲上所知。從官多其父輩行。皆嘆其能自立如此。成宗皇帝之撫軍北方也。命之在行。嘗出所御服賜之。世皇賓天。成宗進紹大位。以京師之浩穰也。四民雜處。遠邇畢集。擿伏姦慝。必資隼擊。命爲大都兵馬都指揮使。賜錢六千五百緡。又以泉南之地。外接海島。飄舶互市。蠻夷交關。非慎密者。不足以當其任。命以爲泉州市舶使。且僉閩海省事。以重之。不拜。大宗正者。國族之事。隸焉。或得罪。蒞其刑罰。蓋祖宗建國之初。官制之舊。惟此而已。遂命以爲大宗正府也。可札魯火赤。又有鷹房數百人。蓋裕皇僭邸元從之親臣也。兼命領之。而指揮之任如故。於是內而宗親之家。外而豪傑之民。素知其威重。毋敢犯法焉。美髯長身。風度高凜。都人望之。固以畏愛之矣。或過市。小民有毆詈之訟。立馬詰得是非。雖戴雨立泥。必斷訖乃去。請託無所及。京師肅然。謂之神明。夫人尤以剛正嚴肅。助其內治。然每有恩賞。必均及微賤。故能成其家云。年四十五而卒。夫人後三年而終。子一人。買閭也。自事仁廟於東宮。歷家令。率更令。府正。典牧。凡東宮營繕虞衡之事。無不掌焉。朝廷之士。莫肅於憲臺。自監察御史。治書侍御史。

無不居焉。及仁廟登極。凡留守太醫。利用宗正功德之事。無不統焉。無日不在上左右。或以休沐出。必亟召。常命之爲平章政事。力辭不拜。人猶以是稱之云。大承華普慶寺者。仁廟所建佛祠也。出金穀之產以資之。豐贍無算。特命以爲都總管。仁廟賓天。奉神御於寺中。至令領焉。仁廟嘗奇其材。命爲學讀書。由是折節下士。積書萬卷。朝誦莫惟。未嘗去手。幾若儒生焉。孫曰定住。達里麻吃。刺失思朵兒。只忽都帖木兒也。先帖木兒。皆就外傳。無綺紈之態。時人以爲難能。嗚呼。王家先世之積。至賈閩而始發。自賈閩之際。遇至先王之封益隆。豈不顯哉。我國家啓自龍漠。誕受天命。鋒旗指嚮。如風偃草。國邑之大。部落之細。強者無所用其力。知者無所施其謀。靡然內屬。而臣服於是。拔其豪傑而用之。執干戈以爲爪牙。侍帷幄以爲心腹。推至誠以待之。無新舊遠邇之間。故能得其懽心。而盡其死力。以成天地涵育之大焉。然今高昌之人。內侍禁近。外布行列。語言文字之用。尤榮於他族。而其人亦多貴且賢。若王之家。又方以文學承之。蓋高昌之所鮮有者也。嗚呼。休哉。故爲銘曰。

於皇仁宗。如日行天。下被萬物。昭蘇惠鮮。匡直輔翼。亦以振德。孰非吾臣。而不賁飭。何功無報。何德無褒。常如薄酬。不究臣勞。咨若宗正。執戈整轂。無賤無貴。不暴以肅。慨思其先。旣忠旣勤。歷時孔多。是曰世臣。爾有令子。在我左右。粲其有文。以効職守。迺眷高昌。悠悠故鄉。雖不及生。往追以王。邈乎冥升。歆此異數。在爾孫子。寔受其祚。於維仁皇。風馬雲車。顧瞻下土。梵宇渠渠。牢羞膳薌。旣甘旣旨。率循敬共。思致先時。先皇之遺。托茲別祠。天子弗忘。永言孝思。歲遷月移。夙夜無替。惟皇累朝。臣亦四世。保功寔難。在爾後昆。赫赫王封。永思其存。

孫都思氏世勳之碑

至順二年四月丙辰。中書省臣言。聖上幸念侍御史建都班。贈其祖父以官而封之。賜之金幣。俾得以勒碑先塋。其碑之文。請以命奎章閣大學士臣阿榮。侍書學士臣某等。其凡役。請以命甘肅行省屬諸郡縣有司。而攻石之工。請取諸荆王之府。上可其奏。明日。健都班以其僚治書侍御史臣馬祖常。所述家世歲月官簿行事之實來告。臣等謹奉詔次第而書之。維國人之貴者。有孫都思氏。昔在太祖皇帝。龍飛朔方。肇基帝業。時則有大勳勞之臣。實佐興運。最貴重者四人。時爲四傑。其次四則鎖兒罕。世刺子赤老溫。八都兒也。初父子俱事太祖。以忠勇見知。主以衣物相易。以締交。相謂曰。安答。蓋永以爲好也。上嘗與召赤老溫戰不利。其父子率族黨夜攻之。召赤老溫遁。脫太祖於難。自是凡征討之事。孫都思氏以功多著。上賜之名。而世宥之。曰。答刺罕。國家凡宴饗。自天子至親王。舉酒將酬。則相禮者贊之。爲之喝盞。非近臣不得執其政。故以命之。宿衛之士。必有其長。爲之怯薛官。亦非貴近臣不得居其職。則以命之。而赤老溫八都兒之子阿刺罕。亦以恭謹事上。上嘗被創甚。阿刺罕百方療之。七日而愈。事具信史。太宗皇帝時。命太子闊端鎮河西。阿刺罕之子鎖兀都從。太子生子曰。只必帖木兒。王鎖兀都夫人牟忽黎爲保母。太子薨。只必帖木兒嗣填河西。以鎖兀都之子唐台。解領怯薛官。及所屬軍匠保馬諸民。五十餘年。內贊府事。外著邊職績。年七十六而歿。葬於西涼州。其夫人忽都解伯。要真氏。能修婦職。以相其夫。年六十而歿。其墓在永昌府。子男凡幾人。健都班。其長子也。領王府怯連口奴都赤。八兒赤。昔保赤。哈赤軍民諸色人匠。至治二年。授朝列大夫。永昌路總管。泰定二年。遷中順大夫。授本路達魯花赤。二年。進亞中大夫。王傅府尉。天子

元年。皇帝入正大統。明年也。速也不干。刑王入覲。薦其從行者五十人。備天子宿衛。健都班。實居第一人。奏對稱旨。拜奉議大夫。同僉太常禮儀院。尋參議詹事院事。俄拜監察御史。中書省左司員外郎。御史臺經歷。治書侍御史。陞侍御史。於是制贈其曾祖父母。祖父母。父母。某官。封。今立碑於西涼州之先塋。臣等思深仁厚澤。其加於臣下。皆可謂敦篤而不忘者矣。重念孫都思氏之先。以瑰偉傑特之材。佐帝業於方輿之日。又以健都班之忠愼才美。踐歷臺省。推恩先世。而寵榮之。何其盛也。然則凡在臣子。思上之德意。安有不鞠躬盡力。以報稱於萬一者哉。乃作銘詩以系之。銘曰。

天啓聖元。爲生聖神。誰其相之。有傑其臣。贊其猷謀。佐其征討。以成大業。萬世是保。名臣子孫。因多賢才。聖皇在御。乃進乃來。乃贊省議。乃正臺紀。從容入朝。侃侃濟濟。天子曰嘻。維臣之良。自其祖考。積德以昌。水求其源。木循其本。課忠責孝。式彰令聞。太河沄沄。有阡在焉。勒文貞砥。何千百年。

# 道園學古錄卷之十七

在朝叢十七

碑

徽政院使張忠獻公神道碑

世祖皇帝既受天命。迺定國都。建號紀元。立朝廷宗廟社稷官府。以君臨萬方。若稽古制。定國本。以係天下之心。卽其都邑。立元子爲燕王。兼中書樞府之長。未幾。册拜皇太子。是爲裕宗皇帝。初。世祖盡得天下之豪傑而用之。以成大勳。建大業。而執事於東宮者。文武才能之士。彬彬可見矣。迺若身受信任。委寄之重。終始宮府之事。其忠愛之心。信於朝廷。著於簡册。則未有過於魯國忠獻張公者也。公以至元二年。見裕皇於東宮。卽受知遇。常侍左右。七年。以父薊州節度任官。當外補。裕皇愛其才。留不遣。後數年。伐宋。取之。盡收其府藏。貢賦。輸至於內府。而析入於東宮者。儲備充斥。司會不能舉其數。十六年。置都總管。以治其貨用。命公爲嘉議大夫。工部尙書兼領之。創法嚴整。至于今守之。十九年。丞相阿合馬方用事。妖僧高菩薩。千戶王著。乘人心之不與。構變鬪殺之。時裕皇方從上北巡。賊迺結黨數百人。僞爲儀服器仗。矯稱皇太子。夜扣建德門。啓鑰而入。直抵太子宮西門。傳令開宮門。公方留宿禁中。遽起叱戶者。毋得擅啓關。使語傳令者曰。他時殿下還宮。必以完澤賽羊。先請見二人。則啓關矣。賊計窮。往返數四。氣益索。知不可給。循牆而南行。且語曰。前門可入也。公偵聞之。曰。其詐明矣。亟遣人走告守前門者。而賊已至。急呼阿合

馬出與左丞郝偵俱爲賊擊死。變起倉卒，中外不知所爲。公遣宿衛士馳射擊討，賊敗得詐狀，賊誅死。而宮闈晏然，則公精審持重決斷之力也。樞密副使張易，素稱有權略，爲上信倚，故以宥密留京。賊之入也，傳太子令索兵甚遽，易不能辨其僞，不敢抗，以兵與之。坐棄市，而論者以爲易知謀，請傳首郡邑。公入告裕皇曰：張易不察賊詐而與之兵，罪至死宜矣，而爲其預賊謀，則無也。大臣被罪而死，傳首則過矣。裕皇悟，言諸上而從之。公遣士討賊時，右衛指揮使顏進在行，中矢死，而怨家指以爲賊黨，法當籍其孥。公曰：吾實使之討賊而死，焉可誣也。賊起變京城中，至爲僞太子，故上與太子甚惡之。獄起，連坐者禍不測，莫敢爲言。公挺身明此二人，議獄者得致其平允云。於是上更化，相和禮，霍孫革宿弊而新之。公首薦易州何公瑋、東平徐公琰、馬公紹、獻州范公芳、裕皇次第用之。何參議中書，徐爲左司郎中，范爲右司郎中，馬爲刑部尚書，侍從以下，因公言而見用者，徧布朝著。一時號爲得人。公惟賢才是達，不以疏遠親密爲取舍，是以能若是其沛然也。是年冬十月，立詹事院，拜公詹事丞。公內謹侍衛，外肅僚屬，出納緩急，思遠而慮周，得宮臣之體也。則又曰：輔導德性，則在於老成，重厚有經術，學問之士，其關係甚重也。於是立賓客、諭德、贊善等官，召用上黨宋公道，保定處士劉公因，曹南夾谷公之奇，東平李公謙諸君子。公每候宮中閒暇時，身先後其出入，使得致其開導之說。二十二年，裕皇卽世，詹事院無所受事。時議將請廢之，雖宮府舊僚不能無惑志。公抗言曰：有皇孫在，固宗社之所屬，人心之所系也。奈何爲此言乎？廷臣以爲當三十年，丞相完澤薦公曰：昔妖僧之亂，能審詐以禦變者也。遂拜中書左丞，仍兼詹事丞。是年世祖崩，成宗卽位，追尊裕宗，册母后爲皇后，后卽東宮爲隆福宮，以奉之。改詹事院爲徽政院，公爲徽政副使。餘如故。



十一月進資德大夫。中書右丞。國史院脩世祖裕皇實錄。公以舊臣在中書。習知典故。預其比事之司焉。大德二年。拜平章政事。力辭機務。遂以平章之名。預中書事。徽政副使如故。元貞大德中。皇太后母儀東朝。保佑匡正之功。天下頌稱焉。故徽政之任。重擬朝省。而公小心謹慎。通練識大體。事無鉅細。裁決可否。待公一言而後定。聞望所在。莫或比隆。五年。改授大司徒。徽政副使。領將作院事。凡宮室服御之事。土木金石。絲縷采色之工。經公指授。製作精異。非衆思所及。受事者若怠。且不中程。懲之無少貸。及以成功。獻必極道其善。而賞賚之。故人得盡其技。而樂於趨事。蓋善用人之道也。上以公老且病。賜小車。得乘以出入殿門。諭之曰。朕知卿必以禮辭。誠念卿宮府之舊。不忍卿步履之艱也。其勿固辭。既而又詔曰。昔在東朝。卿於事無所違缺。朕素念之。今佐朕理天下。如詹事時。朕所望也。且具訓於外庭。時人榮之。六年。加光祿大夫。公之事。上漑官也。夙夜不懈。以家政盡屬其弟九儀。而故嘗治園於南門之外。作堂曰遂初。花竹水石之勝。甲於京師。常以休沐。與公卿賢大夫。觴詠而樂之。治具潔豐。水陸之珍畢具。車蓋相望。衣冠偉然。從容論說古今。以達於政理。藹然太平人物之盛。于斯見之。非直爲一日之樂也。然公之心。未嘗侈然自逸。故東朝嘗又賜之別墅。或勸公可以少休乎。公曰。不然。人臣有汗馬之勞。伐越之積。既老而衰。得謝而樂其餘年。禮固有之。我受裕皇皇太后知遇。致身若此。報稱之私。惟日不足。鞠躬盡瘁。死而後已。老臣之心也。故以勤勤而終其身。云。公幼有奇質。入鄉校讀書。識古人之意。以大器自許。既歸。不忘其初。裕皇幼冲時。世祖命儒臣勸之學。是以於儒術常留意焉。公嘗進言曰。京師首善。宜建國學。以風示天下。裕皇聽之。學之有宮。公實開之於先也。大都之學在南城。公曰。昔嘗游焉。吾不敢忘也。春秋舍奠于先聖先師。

公必具牢醴以相執事者二十餘年不廢。又爲學舍於四邑鄉。曰吾先人之所居也。願與其子孫昆弟講習於斯焉。好賢樂善。出於天性。寒俊之士四方來歸。因材而用之。宗族鄉里疾病死喪。俾孤無以爲依。貧困無以爲生者。隨周之。皆有其道。公德業之盛。豈偶然哉。大德六年十二月。有大星隕于其第。二十四日公薨。年六十一。追贈推誠翊亮功臣。開府儀同三司。太傅。上柱國。魯國公。諡忠獻。後二十九年。爲天曆三年。其子金界奴世其官。爲大都留守。天子建奎章閣。以觀圖書。而敦德性。特任之。爲都主管理工。事日見親近。上愛其能。而思其父之忠也。賜之神道之碑。而命臣某著文以刻之。謹按公諱九思。字子有。姓張氏。其先大都宛平縣邑鄉人。曾祖贈資善大夫。中書右丞。清河郡公。諡安恭。曾祖妣贈清河郡夫人。祖贈榮祿大夫。平章政事。魯國公。諡康懿。祖妣贈魯國夫人。父滋。薊州節度使。贈銀青榮祿大夫。大司徒。魯國公。諡莊惠。妣贈魯國太夫人。公娶唐氏。翰林學士承旨。脫因之。女弟。世祖又賜以趙國文貞劉公秉忠之女。今皆封魯國太夫人。子三人。曰誠。蚤卒。曰椿。童承德。郎同知織染雜造人匠總管府事。亦卒。曰金界奴。嫡夫人唐氏出也。公薨時。唐夫人年三十。金界奴方七歲。家法雍睦。嚴而有教。武宗皇帝在位。母子相携持。入見。與聖太后上。嗟悼久之。命加恩焉。金界奴年十二。已備宿衛。甚稱旨意。事歷朝。皆有功。今爲奎章閣都主管。公事資政大夫。大都留守。內宰。隆祥總管府總管。提調織染雜造人匠都總管府事。兼領中興武功庫事。孫三人。同知之。子曰安孫。襲父職。爲同知織染雜造人匠總管府事。留守之子曰壽童。襲世職。領隆福宿衛。次曰福童。張氏先塋在四邑鄉。塋隘。故遷公之墓於良鄉縣之南原。嗟夫。國家建元以來。至於今。治平七十年矣。京師貴富之家。興替消長。於歲時旬月之間。何可勝數。而公安富尊榮。豈弟壽考。而其子

年在髫鬢。已起而繼之。精敏脩飭。有聞於時。父子遭逢國家之盛。無小間。而聖上之眷遇。方未艾。不亦盛哉。臣集奉詔紀實爲銘詩曰。

猗歟魯公。盛德有容。起事裕皇。夙夜匪躬。世祖聖神。屬國元子。國有大政。是詢是理。於穆裕皇。仁孝以承。孰佐天宮。衆賢彙興。肅肅以朝。雖離以養。一人以寧。萬國咸亨。明堂孔陽。制度考文。秩秩春宮。亦諗多聞。時惟魯公。進見退食。輯思無遺。以究厥職。孰輔道義。國有老成。授几設醴。公爲導迎。寶藏玉府。禮在不會。公視其總。有正無悖。臣作福威。盜乘其間。不虞突來。公能識姦。羣疑旣亡。宮壺亦固。不軼不驚。惟公之故。文母皇皇。聖孫之將。隆福有宮。萬民所望。徽音安安。以出政紀。匡之翼之。公將其旨。相臣進賢。虛左待之。造于兩宮。有猷有爲。至元之治。於斯爲盛。民物阜康。法令脩整。耆壽俊乂。樂乎熙辰。公爲詠歌。以燕嘉賓。時之方殷。而公不待。生榮死哀。君子之慨。願瞻其家。有木維喬。袞衣朱輪。相繼以朝。嗟此喬木。豈維在宅。南原有封。亦長松栢。松栢丸丸。垂三十年。有子孔嘉。克象其賢。珮玉垂紳。入侍天子。左有鼎彝。右有圖史。天子曰嘻。爾惟舊人。宮中府中。懷爾先臣。神道有石。可載功德。迺命太史。著文以刻。盧川云云。西山峨峨。山夷川湮。茲銘不磨。

宣徽院使賈公神道碑

國家之制。凡禁近之臣。分服御弓矢。食飲文史車馬。廬帳府庫醫藥卜祝之事。皆世守之。雖或以才能授任。使服官政。雖盛貴。然一日歸至內庭。則執其事如故。至於子孫無改。非甚親信者。不得預焉。祖宗以來。冠帶之家。習於國事。已出入左右。擬於國人之族者。蓋甚少。而於其間。又能以直道不容。有聞於當代。若

冀國賈忠隱公。豈不偉哉。公諱禿堅里不花。姓賈氏。世爲大興人。王大父以甲申之歲。自大興謁太祖皇帝於龍漠。太祖方有志於天下。從問全燕之形勢。阨塞戶口。兵實攻取之計。論辨明敏。俾在宿衛。治饗事。賜名昔刺。命其氏族。視蒙古人。從容宗皇帝于和林。迎昭睿順聖皇后于雍吉刺之地。甲午。從太宗皇帝滅金。戊午。從憲宗皇帝伐宋。攻蜀合州。戰有功。世祖皇帝卽位。賜金符。領尙食尙藥。卒。贈嘉議大夫。開喜郡侯。諡敬懿。加贈推忠翊運功臣。金紫光祿大夫。太保。追封絳國公。夫人李氏。贈開喜郡夫人。諡孝節。加贈絳國夫人。大父丑妮子。方幼時。世祖甚愛之。每坐之席下。旣長而驍勇。從征雲南。躍馬入水。斫賊艦。破其軍。己未。從征鄂州。有功。卒。贈資善大夫。臨汾郡公。諡顯毅。加贈崇德劾節功臣。儀同三司。太傅。柱國。追封絳國公。夫人毛氏。上所賜宮人也。卒。贈臨汾郡夫人。諡靖淑。加贈絳國夫人也。父忽林赤。勇而有謀。能通諸國語。時阿里下哥之役。獻馬助軍。從北狩。道值風霾。晝晦。賊乘間爲亂。擊定之。有功。歸。領尙食尙藥。世職也。歷尙膳使。兼司農之長。置宣徽院。簽其院事。仍領尙膳使。卒。贈榮祿大夫。絳國公。諡忠靖。加贈推誠宣力守德功臣。太師。開府儀同三司。上柱國。追封臨汾王。夫人忽八察。安西王乳母之女也。間習國禮。武宗皇帝逆后嫁。嘗爲女師。以姆教相之。故恩寵尤異。封絳國夫人。加封臨汾王夫人。臨汾王八子。公其第三子也。幼以世臣子。奉其祖父之職。勤敏著聞。授奉訓大夫。尙食尙藥局提點。世祖愛好人才。於故家舊人。尤所加念。常奇公所爲。以爲他日可當大任者。巡幸征戰。無不在行。親征乃顏之役。軍次亢海。敵兵突至。公馳入其陣。斬首數十級。身被十餘創。猶奮然無退志。戰功多。論賞卽賜黃金一白金二。及亢海之寇。乞降。議者以爲親犯王師。理在無恕。公言於宰臣曰。亢海。吾人也。或率之以叛。豈其心哉。今來降。宜撫

而存之。固仁義之道也。或竊議將殺降者。於兵法爲不祥。其可爲乎。大臣以聞。上深納其說。益信公爲可用矣。陸中順大夫同僉宣徽院事。自爾論政事得失。公常預焉。據理直言。其氣不懼。廷中美之。閒常命公察乎宿衛之有才能可用者。論薦之。公列其名。上聞。因以得官。庀職者。亡慮數十。皆稱其用。而賞賚亦稱事有差時。論翕然歸之。大臣以公之敏於事也。奏陸嘉議大夫。成宗立。詔加恩舊臣。公進正議大夫。世祖在位三十七年而後崩。成宗始卽位。宗親諸王皆來會於上都。芻餼燕享之節。賜賚之數。等卑疏戚。多寡上下之分。小失等殺。則弗當於其心。故宣徽之事爲甚難。而公在職。獨以能聞。故嘗侍上燕坐。中貴人往往指公稱朝廷有人。而上亦甚善公。曰。宣徽之事。任卿足矣。何待他人乎。陸中奉大夫同知宣徽院事。大德四年。上弗豫。召公入侍膳。飲湯液。凡太官尙醫之事。公兼視之。必親嘗。然後進。及愈。賜鈔二萬五千緡。固辭。上解所服衣賜之。八年。上嘗坐輿巡遊禁衛中。見衛士戶。陸間意甚勤懇。感戴。使人行勞之。皆進曰。臣等幸被番直。衣賜以時。餽粥充給。誠倚陛下厚恩。然宣承有法。使臣等均受大惠者。則宣徽院能官禿。堅里不花。其人也。上悅。賜貫珠衣一。駙馬闊里吉思。以酒得疾。上命公護醫。醫得盡其方。疾愈。還報。上又悅。超拜宣徽使。公固辭。而感慨言於上曰。臣之所以致身於此者。非臣之能也。自祖宗來。先臣服勤於茲者。二世矣。國恩誠甚厚。而官品之隆。未嘗至此。何敢有加於先臣乎。有詔褒贈。行封。自其曾祖以下。凡三等。而三世夫人。皆有號諡。當是時。推恩之典。未大行。獨二三世家得之。而夫人之諡。尤異典也。九年。朔方乞祿倫之地。歲大風雪。畜牧亡損。且盡。人乏食。其部落之長。咸來號救於朝廷。公爲之請。官市駝馬。內府出衣幣。而身往給之。全活者數萬人。還報。賜七寶笠。以旌其功。十年。上病甚。公視疾之謹。如前歲。而加憂。

焉。及大漸。公揆正義。以自處。無所撓惑。武宗入繼大統。深嘉其忠。進階榮祿大夫。遙授平章政事。商議宣徽院事。行金州新附軍萬戶府達魯花赤。至大二年。上大賚北方軍。出內府金帛鉅萬。擇使將指。以公明習典故。知軍中事宜。又能用心不憚勞險。有足任者。因命遼陽行省平章與之偕。即軍中與太師月赤察兒定議而給之。公徧歷和林。北金山。亢海。八兒思闊等處。恩食均布。人情胥悅。無異辭。聲名溢乎北境。守邊諸侯王。服其廉慎。皆累章以聞。上深善之。拜宣徽使。命章佩監卿。出兼金之帶於內藏。即其家以賜。三年。上御使殿。訪羣臣以治道。公陳生財儉用之法。以爲治國安民之實。條目詳盡。同列皆以爲莫及。上多采用。進光祿大夫。餘如故。仁宗皇帝卽位。以舊臣進階金紫光祿大夫。加贈三代官皆一品。延祐四年。朔方又以風雪告。公復爲請。如大德時。更出私家馬二百以充用。上酬其直。弗受。解御衣一以賜之。公在宣徽。以四方爲政之供。悉出民力。托恩幸以求泛賞。輒裁正之。小人固已多不悅矣。同時爲宣徽使者帖赤。私取海舶之貨。公曰。此軍國之賦。爲數甚夥。非人臣所得擅私。帖赤甚銜之。王廷顯亦使也。而蒙賜常買玉帶。賜其直三百。定以太官市羊之錢充之。公又執不可。而不悅滋衆矣。七年。仁宗崩。公以疾辭去位。而帖赤稔惡。以累口上。竟譖害公。聞者傷之。帖赤旣以大逆伏誅。而公事得白。有司請贈推忠宣力守諒功臣。太傅。開府儀同三司。上柱國。追封冀國公。諡忠隱。絳國夫人脫脫灰。追封冀國夫人。王氏追封冀國夫人。林氏封冀國夫人。子四人。班下。忽里台。皆爲監察御史。野速固章佩監少監。忽都赤。中書客省使。賈氏之墓。在京城西之漆園里。有韓國公李公孟所著碑。而公墓今遷於某處。忽里台等之所營也。忽里台銜哀茹恤。越歷歲時。始克申其情事。天子閔焉。天曆三年三月。大司農卿哈刺八都傳勅。命太史臣某著銘。

刻之碑。臣觀于世家。自太祖時。已知名見用。歷仕累朝。至於公父子四世。公自奉議大夫。積官金紫。四五十年之間。常領宣徽之任。可謂世家者矣。而昆弟子孫。又方赫奕繁衍。何其盛乎。臣集謹奉詔爲之銘曰。太祖膺命。神武載揚。顧瞻中原。紀綱萬方。于時豪傑。四面而至。有智有略。燕有奇士。襃然來朝。造膝晤言。諮詢孔周。屬之盱眙。旣勤旣老。嘉爾黃髮。入侍帷幄。出從征伐。享帝養賢。大亨維時。守道以官。蓋取諸頤。世祖建國。百度維作。羣公受職。世臣是若。嗟嗟冀公。夙已見奇。承厥父祖。祇奉鼎彝。歷事成宗。武考仁廟。靖共于位。有正無撓。忠愛之誠。豈爲燕私。自邇及遐。振其寒飢。歲大雨雪。朔漠告病。往拯往哺。公爲之請。武皇在邊。熊貔如林。爾公爾侯。干城腹心。乃纘大統。迺有大賚。乃出金貝。泉幣裘帶。至於朔垂。宣旨勞勛。往咨大師。盛饗於軍。大車彭彭。載酒餼餼。部曲羅絡。均飯同醉。賢王將臣。合言來聞。曰茲虎士。感公之勤。天子賞功。命長其屬。公雖再辭。三錫逾篤。盜臣肆欺。竊取貨寶。公曰不可。是謂不道。雖能奪之。而怨已深。患失之私。寶蓄厥心。盜之患失。於國猶忍。彼忌則憚。以搆忠蓋。可殺者身。不磨者名。我忠彼姦。不係死生。忠亡姦在。是用墮敗。人之傷公。亦爲國慨。天高日清。衣冠舒舒。昆弟子孫。入朝以趨。旣貴旣蕃。恩舊之故。襟山帶河。公墓則固。鬱鬱公懷。文以信之。垂示後人。天子命之。

翰林學士承旨劉公神道碑

世祖皇帝旣定天下。列聖承之。四方無虞。民物康阜。熙洽太平。將百年于茲矣。於是乎有博雅耆俊之士。歌詠德業。贊襄訃謨於其間。以賁飾一代之盛。三代以下。未之或先也。於戲。士大夫之生乎斯世。安富尊榮。自壯至老。優游以終。不亦幸乎。中統初。天子慨然思考制度。定官府。損益古今。斟酌事宜。立成憲以貽

萬世時。則有若劉公肅。明乎政刑之要。習乎禮律之通。自外官召拜右三部尙書。綜覈綱紀。集成事功。通預朝政。既老而不聽其去。又以爲禮樂由乎賢者。詔誥之播。風動天下。簡冊之載。規勸古今。時則有若王公。弊以亡金高科大儒。召拜學士。承旨文獻之事。悉以屬之。薦舉成材。獎勵後進。則王公司其權矣。故承旨劉公廡。親尙書之孫。而師王公最久者也。故公之論文。則淳厚而不浮。論治。則平易而不紊。用能以老成爲國。著蔡長儒林藝苑者數十年。以高壽終。豈偶然哉。公歿之後。聖天子入繼大統。作新斯文。建奎章之閣。以尊德而怡神。以問道而典學。而故老漸以漸盡。閣學士忽都魯都兒彌失在翰林。與公同爲承旨十餘年。慨公之不及斯時也。問爲上言之。上以爲感。制詔臣某。著文以載其行事。而刻諸神道之碑。謹按公諱廡。字熙載。世爲洛水人。五世祖逸。以郡吏治獄。有陰德。命其子僊治儒業。始爲儒生。深贈昭文館大學士。資德大夫。上護軍。追封邢國公。諡康穆。康穆牛尙書肅。贈推忠贊治功臣。金紫光祿大夫。大司徒。上柱國。邢國公。諡文獻。文獻生長葛主簿。愨。贈光祿大夫。柱國。大司徒。邢國公。諡孝靖。公有子五人。公其長也。至元十三年。授將仕郎。國史院編脩官。十六年。陞從事郎。應奉翰林文字。十八年。司徒府辟長史。陞承事郎。仍兼應奉翰林文字。二十年。調承務郎。同知德州事。二十四年。除太廟署丞。明年。拜承直郎。太常博士。元貞元年。拜奉訓大夫。監察御史。大德二年。除翰林直學士。朝列大夫。知制誥。同脩國史。六年。加少中大夫。以學士奉使宣撫陝西。八年。陞中大夫。爲侍講。十一年。以太中大夫。落侍講。爲學士。至大二年。拜正議大夫。禮部尙書。仍兼翰林學士。明年。拜中奉大夫。侍御史。歲中。拜翰林學士。秋。管實善大夫。知制誥。兼脩國史。四年。除資政大夫。國子祭酒。皇慶元年。除集賢大學士。榮祿大夫。兼國子祭酒。延祐改元。復入翰



林爲承旨。六年立東宮。拜太子賓客。七年復入集賢爲大學士。是年四月復入翰林爲承旨。至治元年丁外艱。泰定二年加光祿大夫。致和元年三月薨于位。是年八十有一。有文集若干卷。藏于家。公娶冀氏。先卒。繼以廖氏。趙氏。冀廖皆封邢國夫人。無子。以弟之子仔爲後。女二人。長適太史院管勾霍禮。次適侍儀司法物庫副使王德謙。是年五月十日葬公洛水縣棲鸞鄉。公孫塞先塋之次。故侍講學士王緯實誌之。建元初。命官猶皆有訓辭。簡古爾雅。皆出於翰林。常分番上直。或扈從。而史館方脩太祖皇帝以來實錄。與遼金之遺史。故公自應奉辟司徒長史。而猶不離翰林者。其職事非冗散也。而太常方治神人。脩典禮。非公莫能稱焉。始移博士。御史中丞崔公。或承眷遇。有才略。善任事。然好盛氣待人。他御史拜謁。或平受之。至公常以客禮見。蓋公平允篤實。有以當其心者。延祐間。衆賢聚於本朝。精采相蕩耀。意氣相雄高。而退然沉毅。略不與之較。而言語字畫之出人寶而敬之。知其以德勝也。朝廷肇以科學取士。公持文衡。先質行而後文。時人化之。其在成均也。晨入坐堂上。以身率先。神色端重。若不可犯。而辭氣循循然。足以厭服學者之心志。學法凡民俊秀。以次升其名。佐貴游治業。歲中以次出補吏。既有以利誅其心。則不無爭先者矣。當公時。有生貧且親老。同舍生有在前名者。因博士以告曰。我方壯。有以爲養。請讓之。先公大喜。曰。讓德之恭也。從其讓。則爲書薦其人。朝廷反先用之。自是六館之士皆與讓矣。公官一品。年六七十而孝靖。公亡。恙公躬奉食飲。候寒煖。晨昏不懈。怡愉順其顏意。若嬰兒然。仁宗皇帝聞之曰。此我國家人瑞也。刻玉爲鳩杖以賜。日賜上尊酒。因其生日。遣大臣錫宴其家。朝臣咸集。自皇太后皇后皇太子皆有賜。孝靖再拜稱老臣以受賜。公須鬢皓然。親扶掖之。都人相與歌詠而圖畫之。及卒。公奉喪歸葬。略不以衰。

廢禮。蓋天稟素厚。有不待於勉強者。凡朝會及與郊社宗廟之事。未嘗後至。行禮比舉事。無惰容。不以寒暑久速而少變。亦其立志之異於人也。秦定二年。權臣思文飾太平以媚主。自行在所遣使至大都。以旨意召百官老臣諸儒會廷中。議上尊號。公方服闋歸翰林。獨抗言其不可。衆默然。重遠公言。以其說上之。事遂已。公論事類如此。此其尤卓卓者云。臣忝國子博士。從公成均。待罪直學士。又從公翰林。公之葬孝靖而還京也。一再至臣舍。語臣曰。先世塋域碑銘幸具。而吾老矣。將誰屬乎。因感慨論平生。或至終日。臣至于今不忘。今奉明詔。敢作爲銘詩而刻之。銘曰。

自古在昔。國尙老成。有典有則。是程是經。百年之間。羣賢並興。蔚乎其文。充乎其能。逝川弗回。繼其邈矣。白髮蒼顏。公獨壽祉。出而事君。玉珮珠履。入而奉親。榆莖滫瀡。名士在門。有公有卿。頌詩讀書。亦有諸生。金券瑤冊。鼎彝之銘。追琢其章。昭如日星。顧瞻在列。孰肅孰艾。孰爲浮夸。朝豔夕壤。孰爲疆梁。外肆中隘。衆人尤之。君子攸慨。君子之興。有來有承。隱德之積。久而有徵。尙書制作。秩秩在廷。孝靖式穀。退若弗勝。誰云弗勝。公以文起。有祿有年。與父終始。棲鸞之卿。公孫之里。何以表公。貞石有紀。

高魯公神道碑

至順二年春。有詔特加贈故中奉大夫河南等處宣慰使。推誠協亮功臣。太傅。開府儀同三司。上柱國。魯國公。諡莊僖。而御史中丞趙公世安。又傳勅太史臣某製文。以刻諸神道之碑。臣再拜稽首受詔。退考諸傳記。而得公之遺事云。至元十九年春三月。世祖皇帝時巡上京。裕宗皇帝以皇太子從。是時左丞相阿合馬。以聚斂專政。有盜因上下人心之不與。詐稱皇太子。而賊殺之者。是月之十七日也。是日公與工部

尙書張九思等俱鎮留京。宿衛上直皇太子宮。左丞相與兩西番僧謂公等曰：皇太子將以今夜還宮。脩佛事。公曰：近日有上來者不聞有此行也。因以西番語問僧曰：主人與國師今至何所？僧愕眙不知所對。卽改用漢語詰之。僧色變辭窮。公曰：是詐也。叱衛士執付功德司訊之。左相曰：爾自爲之。無與我事。遂去之。是時左相固不辨西僧誰何。而公又疑左相爲變。卽率張尙書忙兀兒尙書及大都尹鉢敦宮衛王顯兩指揮申嚴衛禁。固守宮門。皆執兵以備。日且暮。聞樞密院副使張易以兵。公與張尙書問易曰：此將何爲？易曰：夜二鼓當自知之。公又謂易曰：此大事。豈得不令吾二人知？易附耳語曰：得密報。聞太子來。誅左相。殆是也。蓋易亦不察其僞也。公默計太子必不暮還。而政府亦率百司列宮外柳林中。數遣使迓太子。略無還者。皆疑懼不知所爲。至二鼓。果聞人馬矢箠聲。嘈雜自遠至。儀衛前駐。傳令啓西門入。公曰：太子果來。完澤賽羊必先令我輩。知此必詐也。因答之曰：太子未嘗由此門入。入果有令。完澤賽羊二人來。門卽開。扣門者謬曰：汝等知所守甚善。乃去之南門。公曰：此有變無疑矣。命九思之弟守西門。而九思急趨南門。叩門又不得入。有舉燭傳呼以名召左相以下者。公等從門隙中覘見已搃殺左相阿合馬。及左丞相禎矣。公與九思曰：果賊也。卽命鉢敦與兩指揮嚴兵。設弓矢。開門出衛士射而繫之。賊散亂。棄兵仗走。獲王著。問得賊伏。蓋假太子名以賊殺左相等也。而首賊高菩薩已逸去。賊敗終不能犯宮闕者。公與九思力也。事定。天未曙。公曰：吾能日馳千里。報主上太子。比暮得入。奏上與皇太子于行在上。與皇太子甚善。公所爲。卽令還守宮掖。明日至大都。有司捕治有罪者行誅。遂以無事。公之功亦大矣哉。後十餘年。成宗皇帝卽位。隆福太后在東朝。宮府舊僚咸見顯用。張公日以貴重用事。致位一品。及歿。封贈亦如之。而

公不及見矣。仁宗皇帝追論其功，合封贈視張九思。會仁宗賓天，命弗果下。今上皇帝乃申前詔而命之。夫人臣有顯功而朝廷不忘，此勸忠之道也。刻之金石以示來世，固其宜哉。按公系出女真，以高爲氏。奎章閣藝文監丞紇石烈希元與公同出女真，亦以高爲氏。狀公世家歲月子孫尤備。臣又得考而載焉。女真之地東接高句麗，西邇燕雲之北，分族聚居，各爲部落，非郡縣無市井雜處者。故其爲氏或以名，或以爵，或以官，或以里，而稱高氏者曰渤海，曰女希烈，曰紇石烈，曰孛述魯，亦或爲高氏。公蓋渤海部之高也。先塋在遼東鳳凰山，金時碑刻具在。多貴爵位太師者一人，節度使者十人，曾大父全義嘗爲大官而碑闕書。大父彝登進士第，積官潞州昭義軍節度使。潞州見金之將亡也，棄官隱居。上黨教其民之俊秀以詩禮，上黨之人化之。國朝兵至上黨，潞州與上黨人自歸太祖皇帝。上黨人先得全其父子家屬者，潞州與有力焉。潞州生守忠，守正皆以孝聞。又以善射從段真郡王取中原，有功爲千夫長。從口溫不花王取宋黃岡，特射深入奮擊死焉。年二十九歸葬冠州。夫人張氏無子卒，後夫人趙氏生中灤運糧都提舉兀魯台，次卽公也。公諱觸，字彥解，幼穎異，不好弄，稍長讀書兼習國語及西域語，風儀聳然，魁傑人也。事世祖皇帝潛藩，以慎密受知。歲甲寅，世祖城上都，公董役有中帑金幣之賜。中統三年上爲裕宗擇宮僚，以公掌文史，監治中醢，兼領宮府門衛之禁，而長其屬焉。裕皇奇公材，國人謂黃曰失刺，公須黃，裕皇因賜公名失刺，以表而寵之。至元初，內庭將製御榻，取豫樟之材於高麗，公以使往，宣布德意，厥貢稱用，有金綺衣之賜。三年十月，王傅撒里蠻太子贊善王恂以裕宗之命，復公與張九思家，凡二十有一戶，無所與。世祖既定都于燕，作都城宮闕，公與留守野速不花段禎董其役，功成有白金廐馬宮服之賜。十八年拜

中議大夫工部侍郎同知五府都總府領東宮禁衛之事如故十九年以守衛定變之功有尙衣鞶帶鞍馬等賜二聖益知公可大用而公名聲赫然著於中外矣二十二年拜嘉議大夫同知大都留守兼少府監裕皇上僊公哀慕切至求解職事親拜中奉大夫河南等路宣慰使二十七年十二月二十六日薨于官明年正月葬冠州呂家原先塋之次娶楊氏卒又娶葛氏生子曰師顏泰定〇年師顏佐樞府以例謂封贈推誠保德功臣正奉大夫河南江北行中書省參知政事魯郡公諡貞肅楊氏追封魯郡夫人葛氏封魯郡夫人贈公父守忠中順大夫僉太常禮儀院上騎都尉魯郡伯母張氏趙氏封魯郡君今上時恩封楊氏追封魯國夫人葛氏封魯國夫人又贈公祖葬曰集賢大學士榮祿大夫大司徒魯國公祖母王氏追封魯國夫人公父守忠曰銀青榮祿大夫大司徒魯國公母張氏趙氏追封魯國夫人公薨時葛夫人方盛年師顏幼隆福太后追念公之昔事裕皇也驛召母子以至葛夫人習於詩禮通古今常以經義爲女師宮中太后命師顏學於國子召其師而告之曰師顏故官子善教之以待用賜衣酒而囑勉之師顏事母夫人如嚴君夙夜無違無怠延祐〇年有司以葛夫人貞節上聞有詔表其門閭興聖太后召葛夫人講資治通鑑論古今政治得失仁宗尤念之今上皇帝以天曆改元之十月卽自大同召師顏奉葛夫人以來曰舊家老人壺內師表賜德輝之號俾侍中宮贊六宮之教焉師顏自樞密院斷事官尋遷樞密院判官出守大同召還特除同知中政院事明年改授太子府正又明年加資善大夫中政院使娶魏國公靳公之女又娶故鎮陽王從孫尙書史脩靖女亦卒又娶李氏女二人長適朝列大夫淮安路治中張謙次適中書斷事官劉乃蠻夕孫男五人碩德掌設署丞次願天保次願神保皆上所賜名次海童次

燕閩孫女七人。長適東京李長壽。次適鞏昌汪萬家奴。次適史達兒吉。餘尙幼。嗚呼。至元中。四海混一。世祖在上。裕宗在儲。天下晏然大定。一旦盜起不測。假托太子以爲名。自中書樞密諸臣。皆有智慮者。莫覺其詐。以先後就死。而公明辯勇決。以定其疑於俄頃。使宗社奠安。二聖無所顧慮。非小故也。仁宗念之於三十年之後。又十餘年。而今上成之。夫功在王室。實有可紀。久而益著。僥倖一時之榮。本無其實。則隨以泯滅。何足算哉。葛夫人貞節至老。以婦儀母德。至美號崇禮於當時。他族未之有也。是皆足以傳示後世。故宜銘其辭曰。

於赫世祖。攬收羣英。以一萬方。以開治平。文武率職。出入左右。建極于中。以進耆壽。乃瞻聖子。繼明麗天。雖離在宮。百度是宜。相時大僚。並俊咸乂。旣試旣庸。以遺宮邸。時維高公。始事潛藩。有藩維城。啓祚孔安。領領專城。辨方作室。虎躍龍驤。奠此京國。界居庸。巍巍兩京。公維信臣。克相經營。皇簡在衷。宮城是使。腹心扞城。夙夜祇事。世祖時巡。裕皇在行。載煥載清。徒御不驚。維時大都。宗社攸在。病臨中原。旁極南際。獷彼柄臣。聚斂善逢。神憤人嗟。速禍自躬。迺啓盜心。任俠之靡。詐名太子。幸於一濟。時相狡壬。耳目素備。天奪其魄。就斃如醉。易也本兵。素惡相好。聞言不察。隨賊計閒。夜扣宮門。儀導咸若。時匪有人。孰固其鑰。賊敗旋踵。絲不入宮。弗貽主憂。實爲雋功。天祚皇圖。生此碩彥。決疑於幾。致安於變。事著簡冊。名垂鼎彝。累聖歷時。報功匪還。桓桓魯邦。泰山爲鎮。錫以上公。食其封畛。桓圭袞裳。不及其生。肖儀廟堂。萬世之榮。夫人貞孝。克配厥德。有文有識。爲母儀則。壽豈康樂。子奉晨昏。有慈有嚴。官業是敦。天子命之。封爵之貴。上天報之。令聞不已。令聞不已。視此銘詩。百爾子孫。勿替引之。

# 道園學古錄卷之十八

在朝葉十八

## 墓誌銘

### 賀丞相墓誌銘

世祖皇帝。建上都於灤水之陽。控引西北。東際遼海。南面而臨。制天下。形勢尤重於大都。大駕歲巡幸。中外百官咸從。而宗王藩戚之期會朝集。冠蓋相望。供億之計。壹統之留守。故爲職最要焉。自非器鉅而慮周。望孚而幹固。明習國家典要。深爲上所信嚮者。殆不足以勝其任也。自世祖時。以屬諸賀氏。至於今三世矣。方奉元忠貞王爲政時。一府之中。非無國人貴姓。與之共位。又有材僚佐布在行列。求其臨事決議之際。必得其一言而後定。則他人固不能矣。是以終至元之世。數十年間。有增秩賜金。而終不可遷居他官焉。公忠貞之子也。諱勝。字貞卿。一字舉安。小字伯顏。以小字行。幼從魯國許文正公學。通經傳大義。年十六。以大臣子備宿衛。世祖甚器重之。入則侍帷幄。出則參乘輿。無晝夜寒暑。未嘗暫去左右。故事論奏。兵政機密。非國族大臣。無得與聞者。時獨不避公。或更命留聽。近侍或言論語。八佾之五章。若訕今日者。盡去諸上。以問公。公曰。夫子爲當時言。距今二千餘載。豈相及哉。且國家受天命爲天子。有天下固當下比古之遯遠小名。而自居乎上。然之。二十四年。乃顏叛。率其兵入寇。上親將討之。將戰之夕。唯近臣只允。哈良帶劍立寢門外。雖親王貴人不得輒至。而公直帳中。受密旨。出入指授諸將。及戰。公擐甲前導牙纛。

既成列。還侍上側。王師奮擊。遂克乃顏。明日上。顧謂近侍曰。昨者之戰。飛矢及於朕前。毅然無懼容者。唯伯顏爲然。都人見上之親征也。頗恟懼。上欲慰安之。故亟還。夜行臥輿中。苦足寒。公解衣。以身溫上足。乃安寢。及旦。蹕駐始窹。他日上。自校獵還宮。伶人道迎。有被色繒綴雜旄象獅子以爲戲者。載輿象見之。驚逸。執輿者莫能制。公時侍上在輿中。卽自投下。奮當其觸突。後至者始得追及。斷鞞脫象。乘輿乃安。而公創已甚。上親撫之。命尙醫尙食謹護視。蓋三月而後安。是時天下初定。四方無遽聞者。上欲亟賜報。公方少壯。能日馳千里。又上所親信。有使事。輒見遣。受命無留行。復命無後期。所區畫動合旨意。或朝至而夕復出。亦不少憚也。故六詔西域交廣之屬。無不至焉。槩計其所歷。無慮數十萬里。上春秋已高。海內已定。每嚴畏天象。以自警。司天有奏。得非時以聞。因拜公集賢學士。服一品服。以領之。喪哥之爲相也。恕忠貞之尹京。常不下己。危中之上前。旬月之間。數十奏不止。賴上察公父子深。故免。廷臣共知其姦。無敢爲上先言之者。公嘗啓其端。而言者繼之。始服罪。上之改尙書省爲中書省也。方卜相。顧謂公曰。汝以爲孰當吾心者。公再拜曰。命相國之大政。非小臣所敢知。然求之輿望。以爲太子詹事完澤。線真子也。端重忠實。可屬大事。上曰。然。吾并得所以佐之者矣。遂相完澤。而以公爲參知中書政事。時年二十八耳。參決朝議。明允通練。一時驚異焉。久之。又拜僉樞密院事。又拜大都護。典外國之來屬者。成宗皇帝卽位之十年。忠貞告老。尋歿于家。而公拜榮祿大夫。上都留守。兼本路都總管。開平府尹。虎賁親軍都指揮使。服忠貞所佩虎符。至大□年。拜光祿大夫。左丞相。行都留守。兼本路都總管。府達魯花赤。延祐□年。拜開府儀同三司。上柱國。三進而彌尊。遂兼台司之貴。而留鑰之寄如一。蓋世官矣。上都地寒。不敏於樹藝。無土著之民。



自穀粟布帛。以至織靡奇異之物。皆自遠至。宮府需用萬端。而吏得以取具無闕者。則商賈之資也。更多並緣爲奸。一旦稱遽發所居以集事。而直不時得人。用病焉。公常閱文書。按而與之。無或失其業。故來藏市者。沛然日增。以稱京師之盛。公坐府治事。謹辰酉。吏舍肅然。具牘無敢玩。出內無敢欺。費人大家。或以上命得給賜。若營繕市易。多遣私人逼脅府吏。凌辱僚吏。撈係其民人。豪橫過取。無可誰何。公必書奏抑治之。而善柔者。亦必使得所當而去。吏有持上供物入宮門。迫莫不得出。所司捕得奏誅之。公曰。此有故。非闌入也。力爭之。吏得不死。奉聖州民高氏。隸籍虎賁衛。以多貲名。身死而子幼。貴官有利其家財者。使部曲強娶其婦。公爲辨之。上前不聽。娶高氏。乃得全其家。公以民之飢也。嘗使宜發廩。不待得請。以民之不知教也。始爲太學舍。禮儒師以風化之。是以吏民不識貴強之凌暴。承其教戒。仰之若神明焉。相率爲祠於西門之外。設公像而祝之。阿思罕之亂也。關陝震動。公方朝正月於大都。上曰。上京根本之地。其速還鎮。卽日告行。都人見公至。如孤弱得慈母。時安王將兵北行。所過多侵掠。公謂之曰。君父倚王以保民。禁暴。今未出國門。而行次失律。天子或以爲問。奈何。王悟謝之。整兵以行。民間安堵。時方隆寒。士馬凍乏。縣官芻糗。衣著不時具。公以私藏足之。行者以爲感。仁宗皇帝乃命工畫公像。勅學士爲贊。識以天子之璽而賜之。俾傳示子孫。於是公有足疾。辭不任劇。願賜骸骨歸。上曰。祖宗以上京屬卿父子。民安化行。朝無顧慮久矣。徒臥護可也。乃賜小車。俾乘以出入。得至禁庭焉。當是時。太師帖木迭兒爲丞相。子弟縱虐於民。公壹繩之以法。官峙宿儲。而丞相家奴擅罔市利。責高直於官。公每裁抑之。又惡其帷薄之不脩也。而貪嫉日盛。絕不與往來。都人張弼殺人。獄具。丞相受其金錢無算。爲折辱留守。脅使易辭出之。公持不

可。而中書平章政事蕭拜住。御史中丞楊朶。而只等。遂與公等顯奏之。天子震怒。罪且不測。賴太后仁恕。以爲言。幸得罷去相位。而諸公之怨不可解矣。英宗皇帝之卽位也。帖木迭兒復爲丞相。乘間肆毒。睚眦之私。無不報者。蕭楊二公。旣已被害。卽誣公乘賜車出迎詔書爲非禮。而執之。激怒主上。遂遇害。公死之日。京師之人。巷哭相聞。而士大夫憤怒相視以目。自是廷中不附己者。固已盡中傷之。而無遺矣。久之。天子察其故。斥不得居位。遂死於家。敕仆所樹頌功碑。而言者始昌言蕭楊及公之冤。未及有所昭雪。而上崩。今上皇帝入繼大統。發明詔以慰撫天下。顧未暇它及。而首以公等之枉爲言。蓋知天人積憤之故。本由巨奸殘忍以啓之也。於是奸逆忠順之辨大明。死者固已少自釋於地下。而天下之公議亦少振焉。明年乃贈公推忠宣力保德功臣。太傅。開府儀同三司。上柱國。追封秦國公。諡惠愍。贊書哀惻。聞者感動。命下之日。都人走詣其殯。不約而至者。幾萬人。而其子惟一。卽拜正議大夫。同知上都留守司事。泰定四年秋。集執經講。惟從在上都。而惟一適遷陝西廉訪副使。乃來告曰。家世荷國恩。受京師之托。父子一心。所以鬪報稱於萬一者。天實臨之。列聖實鑒之。我先人遭罹奸兇。遘履危禍。此惟一泣血終身而不忍言者也。皇上聖明。灼見隱伏。不遺故舊。褒卹之典。極用哀榮。又不以惟一不肖。俾嗣世職。感恩戴誼。是以未敢申其情事。期滿歲而請行。今易節以西。實過鄉里。是天所以賜惟一也。將以某年月日奉以歸葬焉。惟先人終始定於國。是非一家之私言也。托諸幽宮。以期不朽者。非太史氏其何徵乎。敢以爲請。此又惟一忍死以待者也。集受其言而悲之。乃考諸見聞。與其客呂弼所爲狀。得祖宗付囑賀氏以上都之事。與賀氏父子之爲治者。乃并朝廷哀忠臣懲往失之意。而具書之。按賀氏世家平陽隰州之永和。今爲京兆鄠縣。

人曾祖種德。封通奉大夫。護軍雍郡公。妣郝氏。贈雍國夫人。祖賁。京兆路總管諸軍奧魯。贈忠立。義功。臣銀青榮祿大夫。大司徒。封雍國公。諡貞憲。妣鄭氏。贈雍國夫人。考仁傑。光祿大夫。上都留守。虎賁親軍。都指揮使。平章政事。商議陝西等處。行中書省事。贈推誠宣力翊運功臣。太師。開府儀同三司。上柱國。追封奉元王。諡忠貞。妣劉氏。鄭氏。皆封雍國夫人。改奉元王夫人。娶張氏。早卒。又娶捏古真氏。亦先公卒。皆封雍國夫人。改封奉國夫人。子男二。惟一。惟賢。爲尙衣奉御。女二。長適平章政事阿不海牙。次適擲立忽攀。公墓在鄂縣某里。從先塋也。銘曰。

巍巍神京。世祖所營。殿于漠南。治朝廣廷。有城有關。民之攸止。大纛周廬。亦有舍次。始命董茲。國有幹楨。舉綱挈維。紀目亦程。維者周郊。陳實繼且。慎始和中。異體同貫。我則不然。世官尙賢。保綏成功。動循故先。公始侍中。年壯氣銳。出入踐駮。百試無替。乃贊國均。乃佐本兵。乃歛長籌。以督畿坻。時巡至止。百用具給。清宮言還。留鑰是執。歲率其常。年與位遷。齊力則非。精思弗愆。時入禁闥。衆起咸拜。名王細侯。亦仰而慨。曰此老臣。世皇之臣。祖事孫承。矧其都人。公出視政。獄市無擾。商曰予獲。民曰予保。公田于野。徒御不驚。有警無遯。具咨公勞。公惟小心。不懈彌謹。義之有激。事在無隱。竊位爲權。彼兇滔天。我則老臣。忍從危顛。二三君子。犄角不制。不竟于斷階。此大厲。嗚呼昊天。不淑謂何。假威神明。偏爲百訛。國論素定。公則不隕。揚言孔昭。天子之聖。保終沒寧。豈必謂身。身枉義伸。抑又何呻。我哀公子。知忠念孝。還葬忍緩。思報之道。奉節過家。天子命之。承志正丘。天道聽之。嗟彼都人。不歌以相。曰此有祠。公庶來享。南山峨峨。其鹿維林。公從先王。歸復自今。貞珉刻辭。作于太史。千載之徵。亡愧孫子。

中書平章政事蔡國張公墓誌銘

我國家有文武忠孝世勳大臣曰蔡國公張公。以泰定四年十二月甲寅。薨于保定滿城縣岡頭里第。遺命上蔡國公印。丞相卽日以聞。上爲震悼。勅有司贈官致賻如禮。公卿大夫士相弔於朝。中外聞者莫不嗟歎。異口一辭。曰。嗚呼。正人亡矣。其孤景武等。以明年之二月辛酉。葬公子定興縣之河內。從獻武王之兆次也。先事三日。使其孫旭屬太史虞集書墓銘。事嚴不敢辭。謹按公諱珪。字公端。故累贈太師。開府儀同三司。上柱國。蔡國武穆公。諱某之曾孫。故累贈推忠宣力開國翊運功臣。太師。開府儀同三司。上柱國。汝南忠武王。諱某之孫。故贈推忠効節翊運保大功臣。太師。開府儀同三司。上柱國。淮陽獻武王。諱某之子也。至元十六年。獻武王平宋海上。歸奏成功。道出江淮。公年十六。行省臣察其英偉。留公攝管軍萬戶。明年。真拜昭勇大將軍管軍萬戶。佩其父虎符。治所統軍。鎮建康。未幾。獻武薨。京師。世祖皇帝亟召公還。治喪旣葬。有勅入朝。上親撫之。因得面奏。曰。臣幼。軍事重。聶禎者。從臣父祖久。歷行陳。幸以副臣。上嘆曰。知求老臣自副。常兒不知出此。厚賜而遣之。偏及其從者。元領軍半戍湖廣省。命還其麾下。十九年冬。以使事入見。上賞識其成立。初凡內宴。忠武以功賜坐。諸侯王上。至是特勅公坐。其故處。還軍。盜起蕪湖。宣徽尤甚。皆僭號署官。掠郡縣。燒府庫。殺縣長吏。江東新附。民心易搖。應者日衆。至犯杭之昌化。行省以重兵討之。未克。報至之日。公投衣而起。率步騎嚮蕪湖。蕪湖定。乃使人言於行省曰。宣徽雖非我所部。盜起。我不得以彼此爲解。以其兵行。行省因以討賊屬公。與他將會。惟公部曲所過無擾。宣部士數爲賊衄。將奔潰。公傳令止之。乃定。敗卒有殺民家豕。而併傷其主者。公曰。此軍之所以敗也。斬之。明日戰三合三勝。

而賊益衆困我。公曰：日暮矣，斂兵設伏。賊不敢動。明日復戰。公曰：宣卒敗而怯，毋累我衆，使持旗鼓爲聲勢，自以所部爲二隊，命之曰：賊勇者在前，前行擊之；後立者，脅從烏合耳。遣親將帥二十五騎衝其後，陳亂前行，奮擊，追奔數十里，得賊酋斬之，其馘三百，而自相蹂踐以死殆盡。乃遣人撫安餘民。又有賊吳道者，以妖術起兵，亦有名號，恃其妖，來往軍門，且易公年少，欲因入謁，刺刃以駭服其衆。公得其情，卽執斬之。麾下其黨大讐，而他酋猶將襲公。公夜伏兵山上，令之賊至而起。明日擊賊，賊走山，伏起，蹴賊墮崖死。磔其酋。宣州平，賊之寇徽者，已敗兩萬戶軍。公曰：賊輕矣，我往必得之。獲生口三十，縱之使歸，散語其人曰：張萬戶知汝柵居，保族逃死耳。官軍不諒汝，以賊擊汝，與官軍格，非汝志也。來降，吾能活之。不然，吾擊汝立盡。明日稍稍以牛酒來見，皆印識其衣，令兵識之，勿敢犯。漸以信服。有持金帛來者，弗受。兵弗動而安者十八九矣。獨南崑西坑之寨尤險固，又嘗覬官軍，懼益自保，不聽命。公得野人計，導勝兵百餘人，烏道緣登其巢，背度已至，奮兵擊之。賊出戰，巢背軍下據其壁，賊回顧已失其穴，不得還。其孥由他道走，或請邀之。公不可，賊以孥得出，益懈。公曰：可矣。縱兵擊之，血流成川，執其酋，送之行省，誅之。南陵盜又起，稱天王，攻宣州。州兵不能支，公得檄，帥輕騎數十赴賊，賊並林陣，公不介而馳之。賊靡，賊見無後，拒引衆圍公。公揮稍出入，殺數十人，賊傷公脅，裹創復戰，斃其子以一矢。官軍大至，斬首數千級。賊平，郡人德公，至于今祠之。蓋自是江東之人安於耕田鑿井，以共賦稅，而長子老孫矣。軍中遂以無事，得故宋禮部侍郎鄧公光薦而師事之。鄧公以相業授公曰：熟之後必賴此用矣。凡在軍十四年，而復入朝。實二十九年也。是時行樞密院江南，或曰：天下事定矣，可無煩行院也。而張瑄者，以瀕省參知政事，任海道運餉，亦以爲

言樞密副使暗伯問於公。公曰：見上當自言之。遂召對。蓋張方以運餉得幸，公恐其擅利海島，因勢用衆，將非其福，故告上曰：縱使行院可罷，亦非瑄所宜言。瀾省控制甚重，而行院得制其軍事，非始計乎？上曰：不罷行院，樞密院論江東功，奏公僉書江淮行樞密院事。上曰：其命爲副使。太師月兒魯那演言：張珪年尙少，姑試以簽書果可大用，請俟他日上。曰：不然，是家爲國家踏金蹙宋，盡死力者三世矣。漢人賜號拔都者，惟真定史天澤與其家耳。史徒持文墨議論，孰與其家功多，而可斬此邪？拜鎮國上將軍。江淮等處行樞密院副使，久勞之師，新附之地，賴以鎮安焉。成宗皇帝卽位，罷大德三年，遣使循行天下，詔公持節川陝，民之疾苦，便宜振之。如罷官府之冗，無益於民者，贖探馬赤之貧，而典鬻妻子者，還鞏昌民之復僉爲軍者，皆其事也。比還江南，諸道行御史臺侍御史，換中奉大夫，溯西宋之故都，民物繁庶，貢稅雜蒸，倍蓰它鎮，貪吏豪右，甘心其間，朝廷病之。以公爲肅政廉訪使，下車未數月，所部郡長吏以下，罷劾三十餘。府史胥徒，無慮數百，其賊鉅萬，強民有殺人，恃其貲得不具獄，更制官吏，持鄉里短長，訟否受成於其家。公按之如法，民間始知有條制焉。得鹽司姦吏事，根連上下，具有實跡，將發之，而竊位方面者，內不自安。欲囚以危中公，使其屬以女子金錢，賂遺近臣，用妄人言，公有厭勝事，且沮鹽法。天子爲遣官數人往，雜治之，得行省大小吏及鹽官欺罔狀，皆罪罷。而公召拜僉樞密院事，入見，同列言：此張九拔都之子也。故事，侍宴別爲衣冠，制飾如一，國語謂之只孫。公受賜，因得數宴見，探馬赤軍之戍北者，多逃歸，吏請按法誅之。公曰：逃者聞命懼誅，將聚而爲盜，其以百日許自歸，有不至者，乃誅之可也。奏可。公雖世家，無第宅在京城，或曾公儼居於上者，命買宅以賜，辭不受。拜御史中丞，行臺江南，因上疏極言天人之際，災異

之故。其目則有脩德行。廣言路。進君子。退小人。信賞必罰。減冗官。節浮費。以憲法。祖宗者是時。中書大臣有因朱青張瑄之行賄也。事敗。貶湖廣。關節近侍。求復相位。而江瀾省臣之首誣公者。亦在中書。公劾之。不報。馳駟面疏論之。併及近侍之熒惑者。又不報。遂謝病歸。久之。又拜中丞。行臺陝西。不赴。武宗皇帝時。仁宗皇帝在東宮。召拜諭德。未數日。拜太子賓客。復遷詹事。辭不就。尙書省臣濫殺無辜。輕革錢幣。中外洶洶。中執法久闕。人上方圖任。仁宗曰。必欲得真中丞。惟張珪可。苟不稱。我任其責。上卽日召拜中丞。居月餘。上不豫。三寶奴矯詔赦天下。赦常赦之所必不赦者。未幾。上崩。仁宗命按誅之。而其黨有求脫免者。公力言諸上。雖得不死。猶杖之。仁宗將卽位。廷臣用皇太后旨。行大禮於隆福宮。法駕已陳矣。公獨奏其不可。臺長止之曰。議已定。雖百奏無益。公曰。未始一奏。詎知無益哉。且大位太祖世祖之位也。隆福太后之宮也。舍大明弗御。天子果卽何位乎。上悟。移仗大明。遂卽位。賜只孫衣二十襲。上金五十兩。使自爲帶。受衣而辭金。不允。制帶以賜之。上命道士劉志清以其法爲醮事。近侍分其所用金幣。道士訟之。臺而近侍譖道士於上前。當殺者六人。公力辯。道士無死罪。上怒曰。汝以臺綱脅我耶。公曰。御史臺陛下之臺。則臺綱陛下之綱也。陛下奈何欲自壞其綱乎。上怒未解。顧左右扶出。明日復扣頭苦諫曰。陛下必欲用譖言殺無罪。臣請先死。上卽不殺六道士。親解衣以賜公。明日上謂近臣曰。人言中丞忠臣乎。張中丞乃張忠臣。非官中丞也。召謂之曰。朕欲厚賜卿。非無寶玉。如非卿心何。因以御巾拭而額。納諸公懷曰。朕澤之所存。朕心之所存也。其服膺毋失。皇慶元年八月。拜榮祿大夫。樞密副使。舊制中州軍士鎮江南者。踰嶺以戍。率二年而代。遭犯瘴癘。十無一還。公曰。是徒寘之死地耳。奏請屯置近邊。其嶺表要害。因其土人以

戍不幸前死者官給樁傳還其家從之。徽政院使失列門請以供城軍隸興聖宮而已領之。以上旨移書宥府衆恐懼承命公曰宣徽省左右都衛兩軍足備工役又欲此將何爲固不署事得寢而怨怒者自此思害公矣。延祐二年拜中書平章政事請減煩冗還有司以清中書之務得專修宰相之職焉。上從之。著爲令。教坊使曹咬住拜禮部尙書公曰伶人爲大宗伯何以示後世上曰姑聽其至部而去之。公又諫乃止。皇太后以中書右丞相鉄木迭兒爲太師萬戶別薛參知行省政事公曰太師輔上道德鉄木迭兒非其人萬戶無功不得爲外執政。上深許公言而東朝之怒滋矣。失列門等謀所以去公中書者。間車駕時巡旣度居庸皇太后宮幄在龍虎臺猝遣使召公宮門下以中旨切責之。賜杖公創甚輿歸京師。明日遂出國門。賢人士大夫祖餞感嘆以爲公之身可辱公之名不可辱。斯事也。所謂質諸鬼神而無愧者歟。公子景元蒙上眷遇掌符璽不得一日去宿衛。至是以父病革告遽歸。上驚曰鄉別時卿父無病。景元頓首泣血不敢言。上不懌遣恭議中書省事換住往賜之酒。遂拜爲大司徒。謝病家居。尋丁母憂。廬墓三年。寢苦啜粥病腫濕。或勸之食肉不聽。日於其間累土墳次如臺者三。七年正月上憶公生日輟上尊解御衣以賜之。蓋仁廟於公終始之意固將有爲而竟奪其志。悲夫。至治二年英宗皇帝召見公於易水之上曰四世舊臣朕將畀卿以政公辭歸。遣近臣設禮候諸館。東平王拜住時爲相問公曰宰相之體何先。曰莫先於格君心。莫急於廣言路。是冬起公爲集賢大學士而鉄木迭兒復爲丞相。遂殺平章蕭拜住中丞楊朶兒只上都留守賀伯顏皆藉沒其家。大小之臣不知死所。會地震風烈勅廷臣集議弭災之道。公以大學士當議抗言於坐曰。弭災當究其所以得災者。漢殺孝婦三年不雨。蕭楊等冤死非致沴之一端乎。死



者固不可復生。而清議猶可昭白。毋使朝廷終失之也。又拜中書平章政事。初公將兵時所佩符。及歷臺省。每除必讓還曰。此軍符也。非他官所得佩。請上之典瑞。自大德來。凡三上。三不允。至是以間。又不允。而公固請。竟納之。侍宴萬壽山。又特有玉帶之賜。仁廟范金爲主盜竊之。時參知政事馬刺兼領太常禮儀使。當遷左丞。公曰。以參政遷左丞。姑曰序進。而太常奉宗祏不謹。當待罪。而遷官。何以謝在天之靈。遂格其命。時有勇暴者。廁名元從中。怙恃恩私。肆爲不法。有醫婦飾而過市。六七人要而執之。加無禮焉。有尉捕得強盜。械送府。盜有親者。方乘傳出使。擊尉去。破械縱賊。有司莫得而詰。告省府。又不得詰。公曰。如是則亂生矣。力命捕之。皆得諸權要之家。會赦解。有售珠於內府。枚論之。一小者有直萬緡。公曰。萬緡中人幾家之產。會其珠凡幾萬乎。且戰國小君。猶以得賢勝照乘。曾彼識之不若乎。又手疏極論法度寬弛。紀綱日壞。污穢賊虐。恬不爲怪。逆順不明於人心。禍亂之鑿不遠。惟聖明奮其乾剛。以振德之。則仁厚之澤無黨偏矣。不報。而公病增劇。非扶掖不能行。有詔常見。免拜跪。賜小車。得乘至殿門下。上肇開經筵。講帝王之道。明古今治忽之故。命左丞相與公領之。公進翰林學士吳澄等。以備顧問。每進讀。公懇懇爲上敷說。皆義理之正。無幾微權謀術數之涉焉。自是辭位甚力。上委曲勉留。而後許。然猶封蔡國公。知經筵事。別刻蔡國公印以賜。庶幾其少留也。泰定二年五月。公得旨。覲歸。天下之功成名遂身退者。未有能及之者也。三年春。上遣使召公。期以必見。公力疾而謁。上曰。卿來時。民間何如。公曰。臣老。寡賓客。不足遠知。眞定保定河間。臣鄉里也。民飢甚。朝廷幸出金粟賑之。而惠未及者十五六。惟陛下念之。上惻然。勅有司畢贍之。如公意。又一再進講。拜翰林學士承旨。知制誥。兼脩國史。國公經筵如故。上見其誠病。謂之曰。西山

佛祠多高潔。可以頤神已疾。御擇而處之。駕至上都。上顧謂丞相若曰。張平章安否。老人恐乏侍養。宜以時還家。得無使乎。因遣使撫諭之。務在順適其意。於是公始成歸矣。少間。長衣幅巾。消搖泉石之間。與山僧野老分席。以相愉悅。上稍聞之。以公爲愈矣。起公商議中書省。公曰。老臣荷國厚恩。四世而臣歷事六朝矣。一息未盡。其忍忘朝廷乎。如筋力弗勝。何使者不敢強閱數月。又病。上遣大醫視之。久不愈。乃移書中書曰。病不任事。而國公月俸千緡。弗敢受。籍會之。凡爲錠者三百餘。悉送還官。上閱傷其意。留其奉度。諸府城而公薨。公質本高明。又輔以學力。積世勳崇。期世其家。以經濟自任。臨事決議。侃侃正色。勇於敢言。千鈞萬折。人所不堪。公志不爲少變。而氣益昌。雖貴倖臨之。姦黠侮之。公一以誠怒自處。久之而各失其所恃者多矣。究而論之。蓋古所謂社稷之臣者乎。公少能挽強命中。嘗從大帥出。林薄有虎在焉。人馬辟易。公抽一矢直當虎。虎人立。矢洞其喉。一軍譁。及學書。腕力尤健。端重嚴勁。無慚筆諫之臣。讀書不尙章句。務求內聖外王之道。旣而稍進方外之士。以悅生佚老焉。公初娶楊氏。繼室烏氏。又娶郭氏。並封趙國夫人。皆無子。清河郡夫人孫氏。生定遠大將軍保定等路管軍上萬戶佩虎符鎮武昌。曰景武者。公長子也。次景魯。亞中大夫海北廣東道肅政廉訪使景哲。奉政大夫僉浙東海右道肅政廉訪司事景元。資政大夫河南江北大道肅政廉訪使景德。未仕卒。景誠。文林郎內政司丞女五人。長適朝列大夫太常禮儀院判官董守慤。次適中順大夫秘書監丞趙伯忽。次繼室董守慤。次未行。次適武德將軍保定翼管軍上千戶忽都帖木兒孫男十一人。長曰旭。宿衛。次曰昌。明威將軍保定等路管軍上萬戶佩金虎符。曰昆。曰昇。曰昭。曰晟。曰曜。曰旺。餘皆幼。孫女六人。銘曰。

維蔡建國。自其先公於焉訖金。是用啓封。公子公孫游揚世武。追王奕奕。日漭日汝。顧瞻先履。領領有處。孰不胙土。我于其生。於皇建官。略用漢制。將軍司馬。丞相御史。三府相望。總贊國成人。登其一已。極顯榮。我以世將。典司風紀。既貳宥密。又使宅揆。公曰噫嘻。我曷致茲。于公先王。究忠百爲。人曰弗哉。德則維世。智周慮淵。乃克有濟。世皇作之。成宗渥之。穆穆武仁。心焉度之。大車旣載。于行而柅。孰謂得君。衆忤構厄。旣退旣藏。侃侃大綱。先帝遺直。以錫嗣皇。有猷有爲。有言有烈。相時儉于。唯盱震懼。大駕之來。法宮旣清。出納咨諏。屬於老成人。亦莫間政。亦莫適抱。其遺經。積誠思格。白髮蒼顏。安車以朝。佇瞻威儀。德音孔昭。公雖言歸。於鄉近止。公疾邁已。公來覲止。公今不來。天子永懷。一鑑之亡。四國之哀。勳在王室。德施孫子。著銘玄堂。作者太史。

### 張隱君墓誌銘

張隱君諱埴。字直翁。其先青州人。唐時有謫居吉州者。遂爲永新人。曾大父聲。宋正議大夫。永新縣開國男。大父煥。父煥。皆不仕。隱君避兵湘中。至耒陽。遂居之。今爲耒陽人。娶蕭氏。先歿。子一人。曰鈇。耒陽州副長官。女二人。長適著作郎文矩。次適陳士奎。繼室吳氏。生二男。曰和尚。曰阿虎。側室生男。曰壽孫。孫男曰善僧。孫女二人。君歿以大德十一年秋八月十六日。年五十有五。明年冬十二月七日。葬其州之鰲山鄉。鰲塘里。旣葬。矩以國史院編脩官劉致中之狀來。請著隱君之行。而表諸阡云。隱君蚤孤。能自力學。習進士業有聲。旣居耒陽。買田築室。將終身焉。或勸以仕。不應。大延賓客。師友課其子。以學。州建孔子廟。君出私財作禮殿。及東西廡。爲七十子。及從祀諸儒象。其中又爲塾舍。鰲山以來四方學者。事未集而歿。子鈇。

克成之。州道塗下者沮澤。高者嶽崎。君悉募治。使隆隱平夷。又浮船架梁。通續阻絕。歲躬視而葺之。民取子錢者。法三之。君又損貸者三之半。兩陽之愆。必齋戒爲之禱。有疾者。君爲之醫藥。歲饑。君賤買發其蓋藏。或遂捐而與之。或使以木償。因以爲棺。給貧者之斂。嘗之武昌。道遇渴死者。倒囊注善劑活之。遇餓仆者。傾糗糒食之。虛行五十里。困不能自達。寧解衣易米以饜。衡武陽洞盜起。焚剽鄰道。君聚其囊篋。落置庭中。曰。吾於鄉鄰爲獨瞻。盜至先得吾財。則鄉鄰免矣。而盜卒亦不犯他日。有十男子求見。君察其非常。揮從奴散去。獨與之語。已而偕行。度甚遠。乃獨還入室中。少時。又獨出。如是者再。四妻孥莫知其所爲。後十餘年。乃與矩言及之。曰。嚮有十賊劫我。云得金若干。乃出不爾禍。且及我。語而與約。使待於野。我獨歸。取畀之。重不可待。故至再。四彼取其半以去。曰。特試君耳。無用許也。慮家人泄語。或掩襲有弗克。且貽患。故不欲言。然則隱君蓋奇士也。著之以銘。曰。

卓哉隱君。制行用奇。不私其贏。推人勇爲。佐于邦惠。先事惟敏。施不食報。高義無泯。昔疹之瘳。昔餒之充。非而兒黃。非而卵童。歲時來者。觀于鰲下。尙其勿毀。以永終古。

熊與可墓誌銘

先生諱朋來。字與可。姓熊氏。世爲豫章望族。祖父炳。父希曾。以宋淳祐丙午生。先生以咸淳甲戌登進士第。第四人。受從士郎。寶慶府僉書判官廳公事。未上而宋亡。世祖皇帝初得江南。常以名取士。盡欲得故國之賢能而用之。尤重進士。若故相留公夢炎。固以爲內相尙書。而王龍澤亦召拜行臺監察御史。先生名不在王御史下。然不肯表襮苟進。隱處州里。生徒受學者常百數十人。因取朱子小學書提要領。

以示之。學者家傳其書，幾徧天下。時來鎮豫章者，多名公卿，皆以客禮見先生。先生和而不肆，介而不狷。儒者倚以爲重焉。憲使魏公初與先生從容東湖之上，先生指其北涯曰：徐孺子故居在焉。太守陳蕃之所表也。而里門西南出，曰桂華坊，無所當矣。魏公感其意，更表爲高士坊。郡城外舊有宗濂書院，祠周子兵興燬之。先生得郡人黃氏故居於孺子宅東，加葺焉。徙其名表之。公私爭致助，儼然立爲學官矣。劉公宣之持憲節也，尤敬先生。與先生論經義，無虛日。間以政事爲問，先生愀然曰：郡學上丁釋奠，諸生有與執事者，公固見之。而是日有盜劫傷人者，南昌賊曹執而掠之，幸儒者善柔，不能自白，誣之獄成矣。耳目所及，尙有此，又何問乎？劉公曰：有是哉！即日審得實，立破械出此儒。卽以械械曹賊，諸公由是益知先生有用於世者，而終不敢以事溷先生也。會朝廷使治書侍御史王公構，銓外選於江西，於是行省參政徐公琰、李公世安、郎中馬公昫、憲使盧公克柔，列薦先生爲閩海提學使者。報聞而福建廬陵爲郡在東南，儒學之士爲最多。朝廷大興文治，加意此兩郡，特起先生，連爲之教授。先生所至，考古篆籀文字，調律呂，協歌詩，以興雅樂，制器定辭，必則古式。學者化焉。故其爲教，有不止於詞章記問云者。旣歸，有司以常格調建安簿，不赴。後又以福清判官致仕。先生一視之漠如也。更自號曰彭蠡釣徒。而四方學者稱之曰天慵先生云。先生燕居，絃雅瑟而閒謠，以爲樂。門人歸之者日盛，旁近舍皆滿，至不能容。先生懇懇爲說經旨文義，老益不倦。得其所指授，多爲聞人。達官舉進士者，項背相望。延祐甲寅，天子獨斷，以進士科取士。進士科廢已久，官府咸不知其說，以不稱明詔爲懼。獨江西行省諮問於先生，動中軌度，因以申諱。四方得遵用之。請先生爲考官，則曰：應試者十九及吾門，不可。而其後舉江南二行省，皆卑詞重禮，致先生主

文先生以儒事爲重。皆應之。及對大廷。先生所選士居天下三之一焉。初先生以周禮首薦鄉郡。而今制周官不與設科。治戴記者。又絕不見。先生屢以爲言。後得周尙之以禮經擢第。習此經者漸廣。由先生啓之也。英宗皇帝始采用古禮。親御袞冕。祠太廟。奮然制禮作樂之事。朝之大儒搢紳先生。凜然恐不足以當上意。而翰林學士元公明善。屢言於朝。以先生爲薦。未及召。而至治三年五月。先生卒矣。享年七十有八。先生動止有常。喜怒不形於色。接賓客人各得其意去。有家集三十卷。其大者明乎禮樂之事。關於世教。其餘若天文地理方伎名物度數。靡不精究焉。先生娶袁氏。子男曰永先。象先。太古。以某年月日葬先生。太古與其門人今陝西行省左丞廉惇。前進士曾翰等。使以書來京師求銘。某受而對曰。昔先生與我先君太史同年生。友誼甚重。某再以待制召。復入史館。道過豫章。前先生之卒數月耳。先生以其所撰瑟賦二篇。命某書之。蓋有所屬。某感焉。不敢不書也。先生之墓草。至是三易矣。銘其敢緩乎。故爲之銘曰。維昔先聖。善詔放鄭。律失音泯。莫辯其正。先生脩能。興遭宋亡。抱器永歌。教成鄉邦。於皇盛德。方被金石。沛乎述作。失此遺則。疏越朱絃。我則不聞。欲知先生。視茲刻文。

林彥栗墓誌銘

延祐五年冬。林君彥栗。手書其所爲文十餘篇以示子。子讀之。見其奇峻刻厲。三歎而起曰。世固有致力深苦。至是者乎。意謂子之知其用必求爲識之。逡巡未能。而彥栗遽以氣羸而卒。子雖欲有言於彥栗而無及矣。悲夫。彥栗年七歲。能屬文。十歲盡記誦六經。十二歲。以書于東平徐公子方。徐公有大名當時。方按察浙西。以人材爲己任。問經義。皆條對如響。目彥栗爲神童。期之深遠。然彥栗不自足也。爲學益力。其

父恐其勤苦致疾。嘗禁其夜讀。使休息。彥栗密藏火。候夜分親睡。潛起微誦。或至旦。不敢令親知。年十七喪父。哀毀過節。盛暑衰絰不去身。家素清貧。能自立。不隱其所守。教其弟坦宏。堅字理。以學如父。在居吳中二十年。開門授徒。以爲業。從游者皆自遠至。成業乃去。然性好山水之樂。游錢塘靈隱天竺諸山。動或經旬月。乃一歸。聞四明雪竇尤奇特。卽冒暑往游。其山中多高僧隱人。見彥栗風神高潔。愛而從之者甚衆。凡其觀覽賦詠談論。皆錄而傳之。比去。猶不忍別。往往送過浙江。乃還。卒之歲。年三十九。其爲人可知者如此。悲夫。而其爲文亦從可知矣。字曰兄之來。京師非有仕進之事也。徒以字在此。來撫之爾。今不幸客死。宇致之也。嗚呼痛哉。於是坦亦在京師。奉其柩以歸葬。吳興宇知某之哀。彥栗也。故來求敘其世次。而恐遂湮沒云。彥栗諱寬。姓林氏。其先資州人。曾祖某。祖某。溫州樂清令。因家樂清。考某。從仕郎。某處判官。至元中。鹽官君初仕。爲湖州錄事。又居吳興。妣羅氏。娶盛氏。子男三人。宗亮。宗衍。宗□。以某年月日葬于某里。銘曰。

善乎歸全。從其先人。死生往來。友愛則均。復安幽居。包山之虛。其精者文。子孫傳諸。

### 項鼎墓誌銘

合州臨海項氏。系出唐丹徒尉斯。其後徙永嘉。宋寶元間。勝歸爲臨海人。臨海之族。有孝子曰璣。有至性。喪親致毀。過時猶孺慕。身負土爲塋。廬居三十年。朝夕奠如初喪。兵部侍郎商飛卿爲立傳。無子。以胡氏男爲子。曰惠。惠生駟。駟生卿。貢進士。良材。良材生鼎。字用文。迪功君也。君有令姿。承世學之裔。自幼儼如成人。稍長。有意氣議論。國朝取宋之師在江上。時宰拜表。請出督戰。實肆溺愧怯。不欲行。風所私。具疏留。

己鄉校試諸生。以裴度征淮西事爲問。君設對極言時事。斥其情狀。傳讀皆相顧失色。識者偉之。初在理宗時。胡公良由太學博士。歷著作。廷常教授小學王宮。度宗幼時曾學焉。卽位之七年。始思問胡公。則死已久。因命錄其子弟。將官之。久知君在京學。實胡公兄子。有可以聞。遂得官。方以迪功郎爲浙東提刑。司準遣而國亡矣。是時郡縣盜賊並起。君歸保宗族。無敢犯其里者。兵後大疫。君飲食醫藥其病。斂藏其死者。無一失所。大德中。常具便宜二十事。爲書數萬言。將上之。旣而嘆曰。聖明在上。何必吾言。而後治乎。因自名曰退翁。以終其身。君篤於孝友。祀其先人。未嘗不垂泣。飲酒至數斗。不亂益莊。娶毛氏。子炯。業進士。有聲。女適黃應龍。車崇君。以至大三年五月壬辰卒。得年五十七。炯以某年月日葬君某處。以鄞縣丞周仔肩所述狀來請銘。仔肩。子弟槃同年進士也。故以信而述之。至元中。天下始一朝廷欲盡得天下士用之。如恐失一言一藝。予觀用文在鄉校。能論國事。處鄉里。能應變救菑。而不得少見用於世。欲有言矣。而卒隱不發何也。銘曰。

生代之末。微見其孽。奮未遂達。遭運惟新。盍作而振。胡懷言弗陳。前不及施。後弗及時。鬱鬱瑰奇。托諸銘詩。不亦悲夫。

揭志道墓誌銘

志道。諱道孫。姓揭氏。世居豫章豐城。少篤學。爲文章。通陰陽卜筮方藥之說。親疾。常再剔股肉和藥進之。而愈。好痛飲狂歌。方醉時。視天地間無一物足櫻其懷者。中乃力穡灌園。教授鄉里。晚又不飲酒。不食肉。刺血手指寫佛書。率從弟明孫。族弟有光。出錢建壽聖報恩佛寺。歲時合族人共祀其先祖寺中。延祐元



年正月二十八日以疾卒。年六十八。以某年月日葬某處。妻黃氏。男二人。曰思忠。曰思永。孫男五。子木。車德合。慧生。止生。女二人。長適黃。來復。次在室。曾孫紀生。銘曰。少也不羈。引酒爲豪。折節中年。卒佛是逃。佛則有功。揭以祀祖。從神來斯。繫志道甫。

故丹陽書院山長馬君墓碣銘重增

建德馬泰之。之至京師也。介進士程謙。以來見曰。請有復焉。集拱而聽之。則曰。先君子歿六年矣。潛德闡而未彰。懼久而易泯。願求文表諸貞石。遂再拜致其所。敘行實一通。又再拜集拜受。起而讀之。見其家世行事。因不固辭。而爲之書曰。君諱元椿。字景莊。其先扶風人。後遷毗陵。又遷睦。繇宋兵部侍郎。大受貴。爲郡著姓。侍郎生澧州通守峕。通守生迪。功郎友諒。迪。功生處士洪。君其長子也。年三十。郡太守察其孝廉。舉之外宰。相以爲丹陽書院山長。君不忍違去。處士左右。不就辟。後二十年。使者行部至郡。聞馬氏故國世家。有賢父子。將就見。而處士年已八十餘。遂以賓禮見。君薦用之。君曰。向也吾且不可。今可一日去。而從政乎。使者高其節。不敢強舉其子。泰之茂材。君有弟元壽。爲祠川校官。以卒。處士哀之。至累日不食。君委曲寬譬。卒爲之開釋。樂其養焉。後三年。處士以高年考終。又七年。而君卒。得年六十一。泰定甲子某月某日也。葬匯湖先塋之左。君娶賈氏。子曰泰之。申之。翼之。泰之武昌路儒學教授。申之信州路弋陽縣儒學教諭。孫男曰說。說。詵。詵。詒。詒。女曰誼。誼。詒。讓。曾孫曰瑜。琰。昔侍郎之弟禮部尙書大同紹興甲戌進士。則我先雍公同年也。乾進辛卯。先公在相位。四月。進擬尙書除國子監簿。十月。又除大理寺正。兼吏部員外郎。其後尙書帥福州。朱文公守漳州。書問甚富。其家至今寶藏之。而迪功友諒。又從黃文肅公游。子旣

重其師友淵懿。又尙論先世之舊。於二百年之後。故爲之銘。銘曰。  
淳熙法從之曾孫。至元處士之賢子。執禮而好脩。志養而忘仕。樂終身而有餘。從先君而藏此。水旣匯而  
斯衍。尙有托乎永久。

故梅隱先生吳君墓銘

國家海內混一。已七十年。生民蒙被德澤。安土樂業。老子長孫。皇多有之。至若居有恒守。不出於鄉井。邇  
其世傳。至於十數。以年紀之。過於三百代。有變遷而能保於悠久不墜。則亦鮮矣。況乎良材美質。生乎其  
間。交游爲之後先。學問爲之潤色。嘉名善行。歷歷可考。求諸百里之間。豈不可尙乎。撫金谿吳塘里吳君  
辰子。字君明之葬也。其孤以番易李存之狀來請銘。因得見自宋至今朝。名人所爲銘誌而讀之。觀家於  
其鄉。觀人於其家。而有嘆焉。乃爲次第而書之。初五代時。吳氏自金陵遷廣信之弋陽。宋初。嗣自弋陽遷  
臨川金谿之沙岡。族且繁矣。分居吳塘者自濬始。爲養而治生。終年起家。所與游者。汪公藻。熊公彥。詩諸  
君也。南渡之亂。東北士大夫來依吳塘以居者。凡數十家。濬生邦孚。邦孚生鄴。鄴生藤州僉判景立。友於  
琴山傅子雲氏。景立生堯仁。堯仁生士亨。受詩學於嚴公粲。傅君維清。士亨生登仕郎德溥。其壯時。值常  
平使者。方作學官於郡城南。延徽菴程氏爲之師。國朝程文憲公鉅夫。吳文正公澄。皆當時弟子員。與登  
仕爲同舍生。是爲君明之父也。夫宋自紹興至於亡。吳氏五六世。皆得與賢士大夫游。陸先生起於金谿。  
吳氏之族。祖子孫所從游者。多陸門之人。徽菴明朱子之學。師友之盛。見於今者。猶如此。則君明之所以  
有聞於時者。非一日之積矣。君明生成淳丁卯。未十歲。而臨川內附學者多廢。而君明亦從儒先生馮得

一傳陽鳳。謝元禮卒業而後已。居家事親。與兄弟六人處。身任門戶之責。不以貽親憂。登仕君困末疾者八年。扶翼捧持。寒暖旦夕。無頃刻之懈。母余夫人壽八十餘。尤盡敬愛。前後爲喪。無違缺。侍羣從子弟。有教有勉。伯氏仲氏早沒。撫其孤。尤加意。與人交。樂稱善。而不忍道其過。不妄嬉以狎。不肆矜以驕。其馭家衆。無暴戾人。或不足於己。有患難。救之不爲嫌。有困乏。拯之不爲吝。婚嫁既畢。子弟分受家務。爲謹。而其子亦從良師。而就其學業焉。既老。種梅爲圃。以爲歲寒之交。人以是稱之。梅隱先生云。東爲別墅。以自逸。幅巾野服。無復世慮。遂終身焉。得年七十三。後至元己卯七月也。噫。亦可謂脩福之士哉。君明娶余氏。前君十七年卒。子翼。孫畢。孫女五人。培曰同邑。劉載陽。臨川王文明。安仁倪文藻。同邑劉天鳳。孫男二人。樂賢。育賢。女二人。以至正壬辰十一月二十八日丙申。葬諸大山塘。子聞居於臨川之久。州里之近。孝子慈孫。有欲著其親之善者。誠有所徵。亦不忍違也。昔在太史執筆多矣。中州公卿大夫士家。功名爵祿之顯。非東南所可及。然歷宋金喪亡。塋墓莽蒼。不復可紀。或一再傳。而名字已不可知。每爲之興嘆。今吳氏遭逢國家治平。遺子孫以富完。安樂方進而未已。殊可羨也。是以不厭其詳焉。銘曰。

赫赫有與。寂寂無稱。人將誰徵。族聯世延。不隨代遷。保德之全。以靖居盈。以安爲榮。壽考以寧。有美吳塘。嘉樹蒼蒼。鄉邑之望。貞珉嵯峨。刻辭不磨。昔賢已多。



# 道園學古錄卷之十九

在朝墓十九

## 墓誌銘

### 王知州墓誌銘

昔我仁宗皇帝。天下太平。文物大備。自其在東宮時。賢能材藝之士。固已盡在其左右。文章則有翰林學士清河元公復。初發揚蹈厲。藐視秦漢。書翰則有翰林承旨吳興趙公子昂。精審流麗。度越魏晉。前集賢侍讀學士左山商公德符。以世家高材。游藝筆墨。偏妙山水。尤被眷遇。蓋上於繪事。天縱神識。是以一時名藝。莫不見知。而永嘉王振鵬。其一人也。振鵬之學。妙在界畫。運筆和墨。毫分縷析。左右高下。俯仰曲折。方圓平直。曲盡其體。而神氣飛動。不爲法拘。嘗爲大明宮圖。以獻世稱爲絕。延祐中。得官。稍遷祕書監典簿。得一編觀古圖書。其識更進。蓋仁宗意也。累官數遷。遂佩金符。拜千戶。總海運於江陰。常熟之間焉。泰定四年夏。部餽至京師。因來告曰。昔振鵬官七品。旣蒙恩贈先父曰從仕郎。樂清縣尹。母曰宜人。今位五品。又蒙恩贈先父母。如振鵬之秩。此皆仁宗皇帝之遺恩。國朝之盛典。而先世積善之效也。不有以表著之。是振鵬忽於君親。無以昭示子孫。族人鄉里也。幸賜之言。而勒諸石焉。余感其言。故序次其事。而并及其世次云。王氏始自會稽。遷永嘉。宋紹興間。其先世以武官得官。爲保義郎。數傳爲自強。生挺。挺好佛學。生由。字在之。至元二十五年卒。時年三十五。今贈奉訓大夫。溫州路瑞安州知州。飛騎尉。追封永嘉縣男。

配張氏。追封永嘉縣君。振鵬其子也。振鵬之兄龍孫。爲浮屠。名善集。銘曰。偉哉王公。卽家開封。繫子之功。功繇名藝。仁宗之世。積拜寵異。先朝文興。孰究孰承。慨茲其徵。

曾巽初墓誌銘

國家龍飛朔方。甫定中原。中統至元間。始建國都。立宗廟。朝廷脩祭祀朝會之事。而禮樂興矣。至人間。天子出獨見親祠太室。而祠官儒生。言制度考文者。彬彬然而來。時則有若廬陵曾君巽初。著鹵簿圖五卷。書五卷。郊祀禮樂圖五卷。書三十卷。上之江西行省。行省丞相幹直善之。二年。以其書上聞。中書省下其事。太常禮部會議。皆以其書爲然。太常禮儀使田忠良等。以告中書丞相。丞相以告天子。有詔。太常以圖書與著書人入見。而巽初得對玉德殿。上曰。禮樂之盛如此。皇帝之所以尊也。而儒士之用心亦勞矣。太常其命以官。於是太常奏爲大樂署丞。未幾。議立圓丘方澤。奉太祖皇帝以配天。凡從祀壇壝。玉帛犧牲。樂與博士雜議。巽初引援攷據。沛然有餘。有司習於禮者。咸推讓焉。是年郊於圓丘。天大寒雪。執事者多不勝。而巽初在壇上。領羣工。登歌作樂。音節諧亮。世其藝者。不能及也。明年。武宗皇帝賓天。而太常緩禮樂之議。會其兄德裕告病歸。同還西江之上。延祐元年。典瑞曹助光祿。薦爲典瑞知事。弗就。中書用御史集賢薦。除遼陽等處儒學副提舉。未上。史館留爲編脩官。編摩多暇。尤得悉心文學。著周易治鑑。及允廣郊祀鹵簿舊說。繪中道外仗等圖。備極精贍。而幹亦丞相入爲翰林承旨。因人見以其名聞。有旨召見。幹亦丞相番直。命巽初以其書待於驂龍門下。上方盥。未御膳。幹亦丞相言。臣所薦進圖書人候進止。廷中傳旨召入。徧閱其圖。問人馬物色甚悉。曰。後當有用。勅祕府藏之。而命幹亦丞相傳旨。命巽初爲學士。巽

初不敢當。力辭。遂循進。奏爲翰林應奉文字。知制誥。兼國史院編脩官。七年。英宗皇帝大駕自上都還。卽親祠太室。始服袞冕。大駕之至廟也。有司倉卒。凡旗幟繖蓋之屬。就以立仗行皆重。大率數人持一物。天子製通天冠。絳紗袍服之。而輅弗素具。遂易常服御馬而往。弗稱上意。丞相拜住。太常八昔吉思。奏取祕書所藏巽初圖書。而鹵簿大興矣。於是改作太廟。凡川蜀江南大木之美。悉致之。凡旗幟之繡繪者。作於閩浙。人馬鎧甲。被采飾者。作於江西。庀事嚴速。務極華好。方是時。治平旣久。生息繁阜。一時民力。畢用於此。郁乎文物之盛。然與巽初同事者。或冒其功。得大官。而巽初亦不以介意。識者多之。有詔留守造五輅。留守召衆工謀之。皆曰。自建都于茲。凡宮殿城池園囿。與車服戈甲弓矢。金木玉石齒革羽毛之工。靡不精巧。老於事者。或至年七八十。皆無不更歷。獨以爲輅古禮器。誠不知其法。奈何。省官考工。殊憂之。迺曰。必欲爲之。無如曾應奉者。命巽初專董其事。按圖指授。動中繩墨。工人咸悅。將成。又請習馬。以備駕。朝廷尤重其先慮。未幾。國有大故。事遂已。而巽初亦歸。居數年。爲天曆二年。以集賢照磨召。天子大興文治。巽初因其長官。以圖書進。見于奎章閣。未報。予言于朝。薦爲太常博士。亦未報。三年閏七月二十九日。巽初遽以寒疾歿。哀哉。予以故人往哭之。而纍然孤子之在側者。號曰。歸且葬。無誌。敢請。予不忍聞也。因爲次第其家世云。曾氏本武城人。邨公之裔也。據生漢末。恥事新室。始遷江左。唐御史大夫偉。始分廬陵散騎常侍輝。居吉水。宋至和中。割吉水置永豐。而曾氏占永豐。載陽舉進士。賦舉行人。又五世。悌融。水縣簿尉。簿尉生元老。迪。功。郎。浙西常平主管文字。贈朝請郎。朝請生晞。顏。仕宋爲御史。爲兵部侍郎。爲江西安撫。積官朝奉大夫。歸國朝。授承務郎。湖南儒學提舉。以子德裕貴。贈某官。追封武城郡伯。母蕭氏。贈武城郡

君繼母沈氏。贈永豐縣君。巽初既貴。得贈所生母丁氏。宜人。娶某氏。封宜人。子三人。如璋。如寶。國子生。如瑄。女如琇。如瑗。如璟。壻周禎。何姿。蕭斗生。巽初諱巽申。以至元十九年五月二十三日生。距卒之歲。得年四十九。將以某年月日葬於某處。巽初所自卜也。巽初少敏於學。事親孝。待兄弟宗族有禮。慈而愛物。兢兢然惟恐傷之。好讀書。手不釋卷。著書滿家。尤好內典。體甚清羸。終歲之間。齋居之日十九。夜半即起。讀誦至旦。無曠廢。愛古器物。名書畫。購之不計其貲。嘗作武城書院於鄉。聚族黨子弟而教之。平生所著述。自上進之外。有致美集成三卷。心性論。理氣辨。經解正訛合若干卷。崇文鹵簿志十卷。明時類藁若干卷。超然集若干卷。韻編杜詩十卷。補註元遺山詩十卷。過聞錄二卷。藏於家。兵部初登進士第。爲連州教授。而我大父尙書實守連。嘗薦之。巽初爲撫州儒學錄時。我先公參政寓崇仁。道過必來見。某也與其兄弟。先後皆同朝。而巽初尤久善。故宜銘。銘曰。

維廬陵曾氏。系本武城。分居江南。日以茂盈。恆以美德。出見於代。歲月官封。家有記載。在永豐者。昔垂文聲。遠于我朝。父子迭榮。肅肅兵部。宋名御史。風裁整峻。荷橐有焯。天命維新。濟濟來朝。迺使學事。殿于烝。瀟才名孔揚。將召將用。而不少留。宰木云拱。伯氏之來。令譽四馳。逢時制作。試於百爲。入直翰苑。出掌考功。曾未幾時。以退爲恭。文事之委。人曰季氏。季氏舒舒。弗亟弗靡。舉體清虛。弗盈弗勝。問學沛然。如川方增。治平百年。禮樂斯備。有圖有書。咨詢攸在。至治之歲。稍行其言。旂常載塗。法駕軒軒。方行而尼。天意有待。於赫今皇。文治方大。集賢之長。文憲是司。以其書聞。天子用咨。于時在廷。咸薦其美。庶聞多儀。光於前紀。鬱鬱之松。弗茂而摧。洋洋之淵。弗暢以洄。故山之鹿。藏此遺志。志藏氣傳。澤在孫子。



胡彥明墓誌銘

公諱景先。字明彥。姓胡氏。彰德安陽人也。資慎愿寬厚。方幼時。以好善聞於鄉里。稍長。接事物。務爲含容。以不欺爲主本。無與之忤者。或忤之。亦不以介意。而忤者至。自悔責謝。待之亦不間。於初。里有貸人錢者。多至十數萬。貧不能償。主者責之急。將自經。公呼而與之語。曰。錢可得。死不可復生。何遽爲此乎。因出己金使償之。其人得不死。旣而爲券質公所。公笑而焚之。由是共服爲長者。尊之曰翁。至不敢以字稱之。兄景哲。早世。兄子亨。在襁褓。鞠育教成之。不異己子。事寡嫂。岳氏有禮。內外無間言。子彝。以儒學進用。歷踐臺省。與謀議。侃侃正色。不爲俯仰。明識法令。出入經史。言於廷中。與宰相相可否。率關政事大體。爲時名臣。大抵公之教也。今年公年八十。朝之賢士大夫。樂公之有賢子。而廷臣有高年之親也。相率爲歌詩。以道之。使歌以壽公。未及遣。乃二月六日。公方與親戚高會言笑。飲食如平時。忽舉手謝客。端坐而逝。又十日。訃至京師。彝爲位哭踊。俟其見星而行。某往弔之。彝匍匐號於某曰。請忍死一言。彝抱痛終天。無所遁罪。敢以誌墓爲託。某退而考行事事狀云。胡氏世本河南鄆陵人。族葬之墓。有豐碑參樹。皆龜趺螭首。雖其文契漫漶。考其時。則故宋若金之顯仕者也。國家兵至河南。河南人北遷。故公之父諱某府君。始來彰德。遂爲彰德人。其三弟皆歸故鄉。而胡氏之在彰德者。自府君始。以彝推恩。贈中順大夫。禮部侍郎云。公以彝貴。初封奉議大夫。再封朝請大夫。同僉太常禮儀院事。騎都尉。安定郡伯。進封翰林直學士。亞中大。夫。輕車都尉。安定郡侯。三拜而彌尊。公不以自高也。出入閭里。常卻車馬。不御。與故人父老遊。子孫或具杖几。亦不扶也。是以彝爲左右司。數請歸養。不許。乞郡便養。又不許。朝廷亦知公之康強也。留彝爲工部

侍郎公娶黃氏。封安定郡夫人。勤儉克相。年近於公。精神不衰。子曰。葬其次。曰。規歲貢。憲府使爲東宮典寶。掾女三人。壻曰。鄭曰。王曰。李男孫一人。伯敬國子生。孫女二人。壻曰。樊曰。侯。葬將以某年月日葬于某處。從禮部之兆次也。大德中。某與彝同爲學官京師。固已聞公之德久矣。葬爲工部主事時。來就養。某得拜於床下焉。瞻其容止之淳慤。聽其言論之篤實。未嘗不慨然自媿其涼薄。而嗟嘆其福祿之未艾也。於時南人有爲饌奉公者。行炙。公食而甘之。曰。燔不至焦。澤不至濡。何以能若是。召庖人問之。對曰。法以上下釜皆新鑄。置肉其內。無旁附。密其竅。頂趾加火焉。公曰。得無損釜乎。庖曰。不暇計釜也。公蹙然曰。一釜之成。謹而用之。可數十年。今一食輒毀。吾不忍也。後勿復爲。某於是嘆公之慎於用物者。蓋如此。事雖小。可以觀德焉。故善觀人者。嘗於其微。此之謂也。然則公之家。再世封君。身享榮養。而子孫多且賢。所以致之者。殆非偶然也。故爲之銘曰。

胡氏之先。胄繇神明。族于鄴陵。歷時積榮。安陽之分。則自鄴至。敦本尙質。以啓其出。質本伊何。稼穡書詩。百年發興。不亟不遲。祖父孫子。具名法從。橫金拖紫。異席同寵。宗伯啓之。考工成之。蔚蔚翰林。中立勝之。旣壽旣考。盛德則有。有而弗宰。益以遺後。有水維漳。清流洋洋。維是固深。千載不亡。

趙曼齡墓誌銘

中議大夫太子家丞趙君曼齡。以泰定五年正月二十一日。死于官。朝之大夫士來弔。巷隘不足容車馬。旣斂。殯諸京師東南門外。執紼者相屬。行路之人。頗皆咨嗟。以爲何致客之多也。踰月。相歸葬于其鄉。於是太子府正臣李某。府正簿周某。來告于某曰。趙君之子幼。其藏也。無以識諸幽。則無以示久遠。比其子

長。知詢問其父時事。則日既遠矣。請托銘於來世。是僚友之義也。敢成子之志。乃求其爵里歲月以授某而敘之。君諱某。曼齡其字也。姓趙氏。相其鄉也。自尙書工部辟知印。轉八作司提舉。翰林國史院管勾。留守司照磨。京畿運糧提舉。彰德路林州知州。戶部司計覆實司提舉。典設署丞。拜監察御史。太子家丞。積官至中議大夫者。其官簿也。諱珪者。其大父。諱訥。鄉人。士尙其文。雅著聞稱。曰柳溪先生者。其父也。先生贈朝散大夫。同僉太常禮儀院事。騎都尉。追封澶淵郡伯。夫人李氏。追封澶淵郡君者。由曼齡貴而推恩也。娶宋氏。亦澶淵郡君。女二人。皆先卒。今在者一人。林童也。葬某鄉某里者。從先塋也。昔太常公歿。太夫人使之游京師。卒能成名。以成親之志。曼齡之孝也。加意宗族。又推其惠。以及於妻之黨。其幼穉自我而俯育婚嫁者。若而人。及曼齡歿。哭之哀。如喪其所親焉。曼齡之義也。學無不通。而明於正術。施無不能。而宜於法律。所交游無賢不肖。懽然以相接。而陽秋之辨。亡所顧慮。曼齡之能也。轉粟入京師。歲有定則。曼齡之任職也。善用其人。無怨無倦。歲增運者。多至四十餘萬石。林鄉郡也。曼齡習知其土之鄉俗。治之得其情。寬條約。以佐善良。剔蠹敵。以黃虜。雜糞瘠土。爲沃壤。通末作。以佐民用。又以其隙。爲儒學。新孔子廟。爲醫學。新三皇廟。民不忍其去。具刻諸石。至今存焉。國家宗廟之外。別立神御殿于佛祠。會其成功。率其費十餘萬。及曼齡董役。工加於常。而費省其半。復以歸諸計相。於是重有賞賚。以旌之。若此者。曼齡之政也。以練習推御史。由御史擢丞春坊。嚮用矣。年不踰六表。官不過四品。而遽以卒。告此人之所以爲曼齡惜也。銘曰。

帝眷春坊。慎簡賢能。載謀載詢。家用克承。濟濟多士。孰是乏使。靖共正直。曰必御史。峨峨法冠。易其綬圭。

食穀食飲。或謹攸同。書功計勞。不日以進。如何不淑。泯以澌盡。安陽之墟。有木離離。昔辭而遊。今歸以依。其依維何。永妥以固。利其後人。至于終古。

葉謙父墓誌銘

國子生鄧葉恒之奔其父之喪也。予弔諸程時叔氏之館。初子司業成均。時叔擢進士爲僚。恒用近臣薦。補入學。由時叔以見予。是以弔諸恒去之踰年。時叔爲之請曰。恒欲求子誌其父之墓。而不敢請也。其父謙父。蓋嘗欲以事功見於世。而無遇於用。乃退而自脩於家。家有婚喪之事。必求諸禮法。戒恒曰。子必服儒服。行儒行。使見於世。曰。葉氏儒家。遣恒宦學京師。曰。吾且未老。子必卒業。乃歸。蓋其志如此。今不幸沒。而恒也不及視其屬纊。故其哀尤甚也。謙父諱遜世。隱不仕。生於宋景定三年四月丙申。卒於有元泰定五年正月壬午。天歷二年正月乙酉。葬諸其縣翔鳳青山之原。夫人褚氏。子恒恂恂。爲謙父弟之後。女溫適陳亨淑。適王壽朋。孫男震。女觀。銘曰。士之制行。審歸於是。弗及於己。又以勗子。求道習禮。足以歿世。神相其志。克成永久。

王誠之墓誌銘

國家之政。莫重於刑獄。匹夫匹婦之冤。近起於州縣。而飛霜大旱之變。則朝廷當之。故君子之論臬事者。無問吏大小。有可書則書之。蓋慎之也。故贈奉議大夫。興和路治中驃騎尉。追封仙靈縣子。王君仲信。字誠之者。今朝列大夫。陝西諸道行御史臺監察御史敏之父也。至元十四年。誠之爲遂州吏目。州之遠近。有男子一人。婦人一人。各以事相從。入城會莫。投逆旅。異室以宿。夜半。男子者潛趨婦人。將私焉。而婦人

已爲人所殺。流血狼籍。男子驚逸。而血在衣履。日事覺。捕卒蹤跡得男子。吏文致之。款伏。事上州。誠之察其貌。若不盡其情者。召逆旅主人問之。曰。婦人入室。前寓者何人。曰。有伶人婦。久居之。曰。伶人婦所與往來何人乎。曰。州小吏實善之。旣而交惡。以去。誠之密以他事召小吏。至。小吏已心恐。詰之。具言狀。殺娼而不知爲他婦人也。卽日盡得其情。獄具。男子得不死。二十三年。在松州幕。李甲殺人而匿其尸。事具五十日。而尸不得。獄不可竟。誠之曰。囚實殺人。尸久將不可驗。緩獄贖死。吏豈勝責耶。松有山多石。疑尸在焉。率吏卒索之。時春猶寒。蟄未啓。有大蠅。薨薨馬首。若導之者。誠之曰。神其告我矣。緩轡從蠅所之。有亂石如壘者。蠅投隙以入。命卒發石。尸果在。而李甲伏辜。至于今四十餘年。遂松之人。猶能道之。嗚呼。州吏曰。位在天子命吏之下。而用心獄事。神明若此。使州縣人人不以庸廢事。貪侮法。若誠之所爲者。天下不致刑措已乎。故誠之之事。予在太史。有聞猶將書之。況其子請誌其墓。可不具諸以示來者。誠之之先。平陽隰州永和縣屬步里人。大父定昂。仕金爲統軍。佩金虎符。行軍河西。邊人畏之。父順。以貞祐之亂。避地仙靈縣之暖泉。旣內附。遂居焉。誠之年八十而卒。延祐二年六月二日也。墓在其里之西南。夫人姚氏。贈仙靈郡君。子四人。恭讓禮敏。銘曰。

昔漢于公治獄不冤。自信有報于其子孫。天人之會。問不容髮。彼抑克伸。我暢斯達。遂松之郡。邇于京都。吏責之難。期會走趨。曾是岸獄。遑究遑恤。此有良吏。克盡厥職。疑似之蹤。詭伏之姦。孰死孰生。一決以天。暖泉之墟。藏器以往。優游餘年。就本斯葬。有美御史。克承厥功。食德而豐。旋吉則封。邑于仙靈。我君我長。子子孫孫。百世來享。

王公信墓誌銘

永平古右北平之故地也。故其俗善騎射。而其秀者。則好義而能文。若王孚公信。其人是矣。公信生而失其父。四歲母又歿。然卓然能自立。稍長。獵於水濱。見大魚在水中。卽下馬手搏之。挽以登岸。卽大蛇也。蛇得脫逸去。行五里許。蛇從旁道追及。開口噬公信。公信挽弓逆之。矢自口貫咽喉。蛇宛轉跳擲而死。人固已服其勇矣。然公信不以是自多。退然若不勝衣。循循然待其鄉里長者。他日行過大樹下。見石上有遺物。束以絳巾。因坐守之。自巳至未。無至者。且日暮。有婦人號而至。曰。吾死此矣。公信問之。曰。家有急難。從人質鈔二百五十。至而慙。而遺之。旣喪資。事亦無及。不死何待。公信擲與之。不交言而去。里人多知其事。而公信亦未嘗自言也。游學洙泗之間。學益進。所至人師禮之。其子某與鑿書博士柯九思。同以說書事英宗皇帝。潛邸因柯博士來求書其父之事。而表其墓。曰。始先父以孤子贅李氏。生三子。而某獨存。又得官至七品。而父母皆得封。亟思有以表之。先父嘗以永平爲隘。曰。隘則窮。非吾樂也。子孫亦不宜居是。京師天子所都。吾得托魂魄於其郊。則余志也。而爾子孫亦利於進取焉。致和之兵。永平卹焉。繼以荒饑。存歿弗寧。而某奉先父於城東。有固有安。非先父之明乎。乃爲之書曰。公信先世皆陰德。至公信嘗及許文正公門。所與遊者。皆一時名公卿。兼通天文卜筮兵法。嘗用憲臺薦。教授冀州。以恩封從事郎。李氏封宜人。子三人。某某官早世。某某承事郎。某官思立蚤世。公信以泰定丁卯某月某日卒。享年七十有九。銘曰。力可以武。而以文舉。道有遺金。義有不取。京城之東。上厚以容。馬鬣之封。永固無窮。

王宜之墓誌銘

太原王公宜之。之居京師也。善教其孫。君子有聞焉。大德之末。宜之將老。而其孫守誠可學矣。宜之歎曰。前數十年。兵事未戢。民無以安其生。士固未嘗學也。今有生聚之樂。又在京師。四方賢者來聚焉。學者不。及此時。則暴棄夫天之降材矣。乃屬家事於其子。以教孫爲己任。度館舍於所居之近。禮大儒先生以爲師。命守誠與閭里之秀共學焉。日視其饌羞。使施教受學者。無或他慮。或曰。子欲賢孫之速肖。則勿汎及。使而孫得專師焉可也。宜之曰。惡。是何言也。聖賢之爲教也。豈有私乎。且觀感而化。朋友之功也。度吾舍所能容而已。蓋從其招延者。故中書參知政事東平蔡公逢原。太史院使國子司業齊公伯亨。皆其人也。守誠稍長。入國學。文譽日起。宜之心喜之。而勵勉益切。至及守誠試南宮第一人登第。歷館閣清要。爲御史。而宜之已久去世。不及見矣。守誠之同年進士呂思誠。鄉人也。適在史館。訪采見聞。以其事遺守誠曰。若吾大父而盛德。未有所記載也。時日以遠。則事日以泯。不亦悲夫。乃相與謀。以予嘗識宜之也。來求表其墓云。宜之姓王氏。諱得福。其先朔州人。自諱彥府君徙應州。生伯元。仕金爲某州管領人。匠官。佩金符。生璋。娶胡氏。金亡時。避地太原之陽曲。始爲太原人。諱璋君嘗以歲三月。見太原人上塚。泫然流涕曰。吾獨不得以杯水洒吾先人丘墓乎。宜之時年十四矣。立俟少間。啓曰。大人何甚感如是乎。曰。兵難中。吾家棄葬應州二世矣。曰。適應州何鄉。墓在州何方。有故人親戚誰何。知殯所乎。則具以告。明日。宜之徑走應州。物色得墓。負遺骸以歸。深得父母之心。而父母初不知其去也。鄉人共歎異。期望之。父歿。與昆弟共財。薄取不競。敦讓友愛。其配韓夫人。克成其志。閨門之內。其教行焉。有二女子方龀。適父母俱晨出。及午而餓。煮豆以食。及熟。相讓不肯先。日哺。父母歸。猶未食之也。宜之嘗病而劇。久之乃愈。取古醫經讀之。得其

遺法深意。又從名醫和氏決疑。遂高於其術。至元初。來京師。宰相聞其名。召之省中主醫事。病得藥而瘥者。或酬之金。曰。吾有奉入矣。義無兼取。卒弗內。而貧者更稍與錢米。使得以爲生。以爲常。稍遷諸路官醫。提舉。宜之歎曰。吾儒者。竟以醫名乎。遂棄官不復仕。嘗行道中得遺珠。固宿留道側俟之。則西域大賈所遺也。賈直鉅萬。宜之詰得直。賈所遺者。卽投之。賈均請以萬金爲謝。不受也。築室京師。先立祠堂。買墓田。國門外。又購旁近間田。以待親戚之無以葬者。蓄書至數千卷。居小齋。編書邵子擊壤集中詩。以自況。持己毅以介。治家儉勤。與人交誠懇周厚。有古君子長者之風焉。延祐二年二月二十一日卒。年八十一。子男晦。御藥院大使。贈奉直大夫。禮部郎中。驍騎尉。壽陽縣男女二。太醫劉寂。太廟署令。劉益。其壻也。孫男守誠。監察御史。曾孫男射。亦向學。王氏遂爲詩書家。雅有令望。原其成教。則自宜之矣。銘曰。猗歟王氏。世德未宣。自朔遷應。至于太原。侃侃宜之。時來京師。教其子孫。學禮學詩。燁然輝光。爲時聞士。堂封孔崇。百世茲始。

倪行簡墓誌銘

成均弟子員。常五百六十人。江南之士。在列者數人耳。倪居敬。字行簡。永豐人。循循退讓。而人弗敢與之狎。兢兢自持。而人不得病其固。言若不出諸其口。而爲貴游講說論議。則明乎學術之辨。至地理名物。人姓氏。皆究知無所敢忽。不矜以取憎。不佞以求合。氣平色溫。自其師友。不敢以其生之遠。而鄙夷之也。不幸不及仕。而死於道路。同館之士。聞而哀之。況其親乎。其同舍生。吁江朱禮。悌以其親之意。來求墓銘。居敬生至元己丑。延祐戊午。游京師。又三年。始得入國學。又數年。補國子伴讀。天歷己巳。貢其名於吏部。於



此又二年始得注官。乃以其間歸省親。至順辛未。還京師。行至滄洲之長蘆。病舟中。同邑曾仲謙醫者也。實同舟療之。五日而卒。藁葬道次。是年除中興路儒學教授。明年始克歸葬其里之某處。父曰魯母某氏。妻某氏。噫。其父母妻子。方待其得官來歸。而以喪至。哀哉。銘曰。離別栖遲。垂十餘年。宦學之成。甚苦且艱。得官身後。藁殯道間。傷其親心。子所爲歎。我爲墓銘。表其能賢。以慰其親。俾後有傳。

鄧伯某甫妻田夫人墓誌銘

鄧存之奔其母之喪也。其友虞某弔之。存號而言曰。嗚呼。存忍棄朝夕之養。千里來京師。從辟御史府。誠幸太夫人康強時。勵節立身。得君之祿。以爲養。今不幸不然矣。抱痛終天。哀哉。亟歸葬。不敢緩。墓有石。當誌。存不忍言也。子幸述諸夫人。姓田氏。京兆藍田人。父某。母某氏。生若干年。而夫人以疾克終。伯某甫生。男存瞿。女適安。西路儒學教授趙璫。君卒若干年。而夫人以疾終于正寢。得年五十有七。實大德八年十月也。明年某月甲子。葬于安西咸寧縣洪固鄉。從府君之兆也。初存嘗爲某言。先君生三歲而孤。祖母楊夫人。故儒家。習詩禮。惇惇涉艱險。排患難。躬教我先君。以至于有立。及田夫人歸。而相先君奉事無違禮。足以當楊夫人之心。蓋楊夫人勤苦自誓。終身不肯御酒肉也。及先君卒。因夫人治家教子。率循其故。亦誓不御酒肉。如楊夫人之志。某是以知其爲賢母也久矣。故爲之銘。銘曰。有賢鄧母。下而從夫。宅幽永寧。歸福厥家。

汪夫人墓誌銘

貴谿彭應松葬其母於所居之近。三年矣。猶日思慕。若未葬然。其言曰。始吾父棄諸孤。吾大父母高年亡。恙非有他子婦也。而吾大父母樂養終身。吾母之孝也。吾兄弟之生也。力足以致乳母。母曰。毋以己子害他人子也。皆親育鞠之。及長。又擇明師以成其慈訓。使吾得世詩書。爲善士於鄉。吾母之教也。始吾上世傳世唯一子。今而後子孫衆多。吾母之澤也。自吾母主吾家。家日以大。用以廣。然而祭祀賓客之事。與凡役力粟米公土之共。常裕而弗匱。吾母之功也。吾舅氏貧約自處。吾母給助之。使得備甘旨以終養。吾父母功於姻戚也。歲有餘蓄。別儲見乏食者。隨周焉。吾母之惠乎鄰里也。不幸今不及養矣。又無以顯吾親。若幽德之不述。將無以示吾子孫。則不孝之大者。迺因同郡汪叔昌述其狀。以屬諸爲墓銘者云。敍曰。彭母汪氏也。貴谿之田西其鄉也。華卿其曾大父。文穆其大父也。衍其父也。諱英。字叔華。父者其夫也。應松。應梓。應梅。應桂者。其子也。宗漢。宗海。宗澤。宗溥。宗浩。宗演。宗洵。宗濟。宗漸。宗泳。宗湜。十有一人者。其孫男女則四也。紹德。其曾孫。男女亦一也。宋端平乙未。其生之年。大德丁未。十有一月乙丑。其卒之日也。石之下有土。謂之王侯石者。其葬所也。葬之所有石。石有銘爲之銘者。西州虞集也。銘曰。

嘉植維貞。特生不扶。久始充達。柯條榮敷。柯條榮敷。士德之厚。如家克繁。繇子有母。匪彭無盛。世鮮弟昆。衍自母汪。四子多孫。孫之多有。支別易遠。遠而扶疎。視此其本。子孫孫子。來省歲時。永永勿替。石具有詩。

鄭夫人墓誌銘

翰林待制袁君喪其配鄭夫人。十七年恒獨居。不更娶。君子以爲難。或問之曰。先妻相我事先君。無違禮。其死也。前先君之卒八日。以是念之不忍亡。而稱也。於先樞密太師越公諱韶爲曾孫。於嚴州大夫諱似。

道爲孫處州大夫諱洪。則孤子也。由其有子。傳序爲適。是以重之。乃告其友虞某曰。子爲我誌其墓以銘。謹按鄭氏世爲鄆令族。太師尙書令魏郡忠定王清之。爲宋丞相。追贈四代。皆太師魯國公。魯國公長子曰冲之。國學進士。贈中大夫。忠定之兄。夫人之曾祖也。娶邊氏。封太碩人。大夫生次申。中大夫。寶謨閣待制。贈正奉大夫。娶汪氏。封宜人。正奉生太原。朝請大夫。直秘閣。主管建昌軍仙都觀。娶汪氏。封宜人。實生夫人。夫人諱□□。生數歲。袁氏請昏。有成言。及長而歸之。袁氏大族。歲時廟有祭。朔望承問有禮。雖易代不廢。夫人爲冢婦。不及事其先姑。能帥娣姒以敬宗事。大德戊戌年。月卒。年二十九。子璋。早夭。次璫。次玳。女四。長適徐姚州同知趙孟貫。餘未行。葬在鄆縣桃源鄉之潘奧。某年月日也。翰林師友前代遺老。專志一原。博極羣藝。貫通精實。不涉凡陋。與之遊者。欲然各自知其不足。夫人爲之配。至使歿愈遠而敬不衰。其爲德可信矣。夫昔宋在江南。故越多功臣世家。惟史氏最貴。理宗入在藩邸。史衛王彌遠進鄭丞相。授以經。由是積恩禮義。並史氏。袁越公由治臨安。執經十餘年。門代甲乙相次。今徵文獻于越。乃在袁氏。□□□□鄭丞相爲之衰。及再入相。年益老。益感邊碩人。不忍舍其孫。留之左右。是時賈似道帥荆湖。數要軍用。丞相格不下。後十年。賈相用事。遂擯不用。家居二十餘年。而卒無嗣。獨生夫人。翰林仕於朝。四遷。至待制。長兼史事。璫玳方嚮學。夫人皆不及見。悲夫。銘曰。

翼翼維鄆。曄其大門。匪王若公。民則不聞。維時孫子。不顯車服。我其流流。孰往而復。居之恂恂。着之循循。蔚其成文。夫人來嬪。嗟德實難。民鮮克之。肅肅夫人。久甚匹之。獨嗇於天。而不有年。歸唁無所。永歎彌增。夫制其恆。子厚於承。氣止復升。高立是徵。

周夫人李氏墓誌銘

番禺周暉。與其弟明之游京師也。其族父集賢司直應極實致之。得爲國子生。時制書始命有司。將以科舉取士。而貴游不治進士業。獨暉兄弟出篋中所習程文數十篇示人。皆驚喜取讀。或就問學焉。未幾遠方獻異獸曰麒麟。暉作賦千言。上之中書省。丞相大悅。以屬參知政事察罕。使命以官。是時陳策進書獻歌頌。常數十人無所遇。獨暉見知時宰。人人羨道暉矣。一夕。暉感異夢。旦而治歸。明日。兄姑留。幸有以榮吾親。明代兄歸矣。明至家。其母果病。見明。問知其兄弟在京師事。爲之喜而起。後六日。乃卒。皇慶元年七月十九日也。暉聞計且行。亟來請曰。嗚呼痛哉。未有以爲榮。而爲感若此。惟先生辱爲之銘。用慰其地下而已。予竊感而悲之。爲次第其語云。暉母李氏。諱清。世居邑之沙堤。其曾祖松。善爲生。以資顯。祖時榮。父天驥。以文學名。適周樸。儒家也。昔者周氏以明經取高科者。歲相望。樸弱冠受尙書。有能聲。及得內助。事親理家益如志。常遣暉明從帥。而無牽於愛暉。故能以卒業聞。子三人。暉明。其幼祿。女二人。其壻程益。徐璋。斛田里之斗橫山。其葬處也。銘曰。

史夫人墓誌銘

夫人姓虞氏。諱惠正。前承務郎四明史君璘卿之夫人。是爲銀青光祿大夫。資政殿大學士。奉化郡公。贈開府儀同三司。岩之冢婦。金紫光祿大夫。贈太師。齊國文靖公彌忠之孫婦。贈太師。漸之曾孫婦也。夫人曾太父太師雍國忠肅公某。在相位時。生第三子。孝宗皇帝賜之名旒孫。中奉大夫。太府寺丞。不歸居蜀。

居臨安賜第。無子。以兄子爲子。諱曾。中奉大夫。軍器監丞。贈令人。生子一人。曰紹雍。三歲而夭。及生夫人。最鍾愛。不幸監丞府君與史令人皆卽世。舅氏取夫人鞠之。以適承務君。生子曰晉伯。生女曰婉伯。咸伯。婉伯適忠勇校尉溫州路同知瑞安州事阮申之。咸伯適沿海上千戶別里吉。孫曰公謙。公熙。公點。公勳。公杰。公默。孫女二。夫人內外家皆宋世臣。宋亡。世家多淪喪。夫人相夫子。食享無遺闕。延祐三年。夫人病。醫言天台有靈草。生。至服之。乃可矣。會阮氏培佐州黃巖。晉伯奉夫人以往。服食踰年。方不效。乃還鄞。延祐三年六月己酉卒。葬之某處。晉伯以承務君之命。來求銘。夫人某大父再從女弟也。不敢辭。謹敘而銘之。銘曰。

夫人幼孤。舅氏馮賴。及長而嬪。遭時易代。雖于貴宗。弗與盛會。承夫鞠子。實旣瘵痲。庶其晚康。而身不待。繫德厚原。何千百載。

### 趙夫人岳氏墓誌銘

夫人諱惟德。徽州路績溪縣主簿岳君浚之女。平江路儒學正趙君樞之妻。台州路儒學教授君辰孫之家婦也。岳望安陽。常州宜興人。趙本蜀故家。今居杭學正。故宋參知政事楊公棟之曾外孫。夫人故宋參知政事姚公希得之曾外孫。是以合二家之好焉。夫人自大家嬪。儒素甚宜其夫。而得於舅姑。親族敬焉。至治二年。從學正官平江。歸寧于宜興。病。學正以舟迎之。至則夫人歸矣。道卒舟中。學正不及見。哀痛過篤。舅姑聞而憐之。命樞曰。子買地。其以某年某月日還葬。夫人生以至元丁亥十二月二十四日。卒。以至治壬戌四月一日。子一人魯兒。方一歲。銘曰。

大家有子歸儒宗。材堪相配非不逢。命也不淑先罹凶。娟娟玉雪秀所鍾。保此無憾寧幽宮。

# 道園學古錄卷之二十

在朝葉二十

## 墓誌銘

### 祝夫人墓誌銘

爲老子之法者。歲以其徒。從大駕上都。丙午之秋。獨先馳還于京師者。玄衍也。玄衍行踵門而來謁。願有求焉。余見其蹙然而瘠。疑不類夫爲其道者。其鄉之士。有友於余者。爲之請曰。玄衍之母。是饒州安仁縣周綵衣氏之裔。國賢之女。祝君泰來康叔甫之夫人也。其歸康叔也。年十六。舅姑始安其養。以老。康叔在宋末。嘗一起家。教授鎮江。終不行。自爲精舍。以居學者。賓客之屢滿戶外。酒食之饌。不以貧過儉。母必親之。教其長子敬中。以儒術世其家。三孫矣。教其女。以嫁于鄧椿氏成家矣。蓋後康叔二十四年而卒。享壽七十有八年。玄衍爲道士。遠遊者。母志也。母卒。以正月。玄衍聞訃。以六月。將葬。以戊申之四月。求墓之銘。于京師以歸者。兄命也。墓在崇義之荷塘山。其鄉也。康叔之舊墓。土䟽而善。圯。今故遷而合之也。祝氏世次。在康叔之志。玄衍之求者。其母之志之銘也。虞某曰。悲夫人之於其親也。忍百里之行於旦莫。而有待於子言也。子何爲拒之。而無以慰其瘠也。銘曰。

玄雲滄兮將雨。鶴剗距兮抔土。有子歸兮藏母。窈窕兮碧山。坎幽兮及泉。夫子往兮二十四年。卒同歸兮從以遷。噫。靈祇兮孔阜。相禁呵兮有道。逝勿毀兮永久。

潁川夫人黃氏墓誌銘

撫崇仁陳君德敬之妻曰黃夫人。諱斯崇。其先豫章人。故宋吏部尚書諱疇若之曾孫女。巽園先生公僅之女也。其歸陳也。是爲故朝請大夫知融州兼本管安撫諱元晉之孫婦。湖南節度推官同祖之子婦也。陳氏自安撫以進士起家。宰贛。倅長沙。守融。爲邑望族。我先從祖亡姑爲之配。封宜人。有二子。節推其長。次爲江西連幹。諱懷祖。無子。節推之子。長曰將仕郎舉孫。次曰懸孫。是爲德敬。爲連幹後。德敬方弱冠。當宋始亡。陳氏故大家。不足以勝新附之重役。困迫有甚。編庶節推爲德敬求婚。猶必擇詩書令族。是以夫人歸焉。敬戒如禮。宗姻咸悅。相德敬承節推之喪。嬰家務於搶攘之際。竭營辦以足官逋。斥簪珥以嫁孤妹。歲時祭祀。親戚慶吊。未嘗踈闊。德敬故昇平公子。好賓客。輕貨財。不以時異事殊爲意。而家幾毀焉。夫人左右彌縫。補苴遺缺。終德敬之世。旣老。益以勤儉自勵。掇拾遺餘。家用小康。生子曰宗謀。以節推遺命爲將仕後。抱從子宗紀。以爲己子。一門之間。母子兄弟。藹如也。蓋夫人昔聞訓于家庭。舊矣。其族自雙井分居。今富州之沈溪。宗人甚衆。至尙書公貴顯。詩書文獻。大聞於世。至巽園數傳矣。遭世變。不能安其鄉。來就夫人以居。峩冠褰衣。動止嚴正。口不道非法之言。身不交凡近之友。寧受躡藉攘斂。略無爭報之意。讀書以自怡。賦詩以自見。雖以慷慨係之。而無悶。是以夫人爲女爲婦。居兩大家。而有足稱道者云。其生也。以宋寶祐丁巳八月二十九日。其歸陳也。以大元至元庚辰之冬。其歿也。元統甲戌之正月初四日。仍改至元之二年。歲在丙子十一月壬申日。宗謀等葬諸長安鄉四都貴窟。祔葬德敬之兆。德敬用江西帥檄。爲崇仁江夏巡檢。旣而棄官不復仕。宗謀之子二人。長某。次某。女五人。某。宗紀之子三人。長曰某。次曰



某幼曰某女二人。集大父尙書雍侯旣出蜀。以宜人之歸陳也。過茲邑而因寓焉。至於今五世矣。是以宗  
諱等求銘焉。銘曰。

貴窟之阡。陳氏繇興。其興降升。夫人世家。人門實稱。寧魄于茲。趾美來徵。

### 史氏程夫人墓誌銘

眉州青神史氏。有母曰程夫人者。諱念。賜君之妻。而光之母也。夫死子幼。夫人守節自誓。以撫育其孤。會  
國朝以金始亡。將併力於宋。連兵入蜀。蜀人受禍慘甚。死傷殆盡。千百不存一二。謀出峽以逃生。夫人亦  
將携其孤。依鄰人家。翁走東南。取黃金囊而繫諸腰。且行遇掠。兵大至。卽竄身伏林間。俱伏者。兵盡驅以  
出。列坐地上。擬以白刃。曰。有金者免殺。有鄰嫗先免。過夫人。勉夫人速出。金冀不死。夫人曰。金亡。豈不死  
耳。吾兒無資以逃。終必偕死。吾死而金在。幸以活史氏孤嫗歸。幸語吾兒來求。尸取金。兵從夫人求金。夫  
人辭無金。遂見殺。嫗求孤兒告之。明日掠者退。鄰人父老。以其孤與。覓求得之。卽斂以瘞。偶值善畫者。爲  
象其容貌。而題之曰。史光母程氏。以嘉熙戊戌十月二十七日。死于兵難。年五十四。遂負之而東。至湖州  
止焉。光時年十三耳。今湖州有史氏。自光始云。泰定四年三月。曾孫台孫來京師。以先世鄉里之舊。來告  
曰。史氏之有後於湖。則我先曾大母以死易之也。今九十年矣。昔大父猶有望於西還。申其情事。卒不可  
得。而先人當內附之後。亦未遑於紀述。願以屬台孫焉。代易事久。口就湮沒。從事於浙東帥幕。嘗以告諸  
國史四明袁公。幸旣爲之立傳矣。而台孫之志。有未盡焉。唯曾太母之喪。旣不復可知其處。請刻木象神  
具衣裳。葬諸湖之新塋。或曰。葬以藏體魄也。象而藏之。殆不可然。則立石先大夫之墓。具載夫人之事。以

示子孫。傳來世。或曰。其可也。請徵文於予。某感其言。爲敘其次而著之。史氏自唐吏部侍郎嚴。從僖宗幸蜀。因家于眉州。其墓在青神。再興院之里。族大多顯人。而程亦眉之故家名族。念賜君歷官行事。生沒歲月。無可考徵。而光之居湖也。稍長。痛家世之禍。感母氏之志。歲時西望。輒悲痛不自勝。見者爲之垂涕。於是勇自植立。遂以武科奮積官。武翼郎。浙東兵馬都鈐轄。娶閔氏。二子曰圭文。故宋舉進士。脩職郎。瑞安府司戶參軍。至大間。將教授平江之嘉定。未上而卒。曰璋文。早世。圭文之幼也。聞母之有疾。痛不忍聽。更以燼爇左右臂。以代痛。母疾止乃已。後武翼嘗病。累月視藥。未嘗解帶。病亟。哀號祈天。願以己壽益父。夢或告己曰。感爾孝念。予三齡。武翼果又三年乃終。娶陳氏。子男三人。合孫歷浙閩兩帥幕。今爲某官。介後璋文。由舶司幕長將。改除喜孫業進士。女二人。皆適令族。而孫男子六人。女二人。以次名之曰淵源。澄清。潤澤。深演。蓋有所識也。自武翼以下。墓於烏程。三碑鄉之。邾山三世矣。而其表首著程夫人。事云。銘曰。邾山之原。隱何隆隆。誰其有之。自蜀來宮。一燼之微。三傳彌豐。原厥保存。有母之功。酌義就死。言何從容。知有史孤。不知有躬。體則禪續。思無終窮。精神不亡。來依來從。凡爾子孫。罔不敬共。去之千古。猶高古風。

史夫人改葬誌

史夫人虞氏之歿也。葬鄞縣翔鳳鄉鍾輿。夫人之子晉伯。以其父承務君之命。來屬某敘其家世年月。以銘其墓。文成。故翰林學士承旨魏國趙文敏公書其題矣。未及刻石。而晉伯之子公點公默相繼歿。或謂晉伯曰。先親之體魄弗寧。則後嗣傷焉。今鍾輿之藏深僻絕人迹。風氣弗完。神靈殆弗安也。盍改諸晉伯貧未能也。會阮氏壻來宰鄞。婉伯從其夫以來。見晉伯之。以是爲憂也。則曰。先夫人於我兄弟。尤鍾愛。敢

不用吾情乎。晉伯涕泣不忍言。婉伯曰：此吾責也。吾聞高祖齊國公與高祖妣戴夫人在辨利寺形勝處也。吾家嘗食其澤焉。子孫爲兆。以從葬於元祖禮也。舍是弗圖可乎。晉伯曰：是不肖孤之志也。婉伯請於其夫。出財以相其凡役。伐石築亭。購旁近山林以附益之。遂以天曆己巳十二月庚寅改葬其處。旣竣事。乃以書達京師。命某書改葬之故。且曰：昔吾母之存也。吾妹爲吾養。吾母之疾也。吾妹爲吾醫。吾母之歿也。吾妹助我克成其喪。墓處弗利而改葬也。又悉出於吾妹氏夫婦之力。晉伯不孝。齒髮日以變而嗣息淪沒。望其稍有立者。幼子公壽而已。不及此時求子一言。以識先親之終始。以表吾妹之所以相晉伯之不及者。後之人何所聞之哉。某聞其言而悲之。故歷敘其事。俾刻墓碣之陰。且仲悻於親愛者。有所觀感焉。至順三年七月朔。具官虞某記。

## 表

### 王伯益墓表

皇慶癸丑二月甲子。王君伯益卒於京師客舍。治書侍御史趙敬父翰林直學士元復初同知彰慶使柳唐佐皆出錢合所與相知者之贖。授其妻之兄冀州知事莫正己使治其喪。五日始克斂。而殯於城南僧寺。其友楊載杜本訪其平生所爲詩文傳之。又爲作畫象贊及著哀詩哭之。舉其孤迪補國子生。踰月其弟自大名走京師。謀歸其柩。將以某年月日葬之某地。其先塋也。載本又謂某爲文表其墓。令後人知爲吾伯益所藏云。伯益名執謙。大名人。生數歲入鄉校。旬月中已能習盡羣兒所讀書。問難其師。其師爲絕

席引賓坐側。羣兒無敢與並。因勸其父某送詣郡學。未數月。又緹其同舍生如鄉校。及長。其父資之游京師。時中書平章卜亥木翰林承旨唐公有重名當世。以人材爲己任。一見伯益。皆曰奇材也。不敢以進用。常秩浼伯益。將言於上。擇館閣優重地薦之。久之。不得如二公志。尙方符寶典書滿三年。當得四品官。卽以伯益爲符寶典書。三年竟不得四品官。二公相繼去世。無爲伯益言者。柳唐佐爲言於張子有平章。平章事隆福宮最貴近。而雅好文士。禮伯益爲上客。留署其府。爲徽政院照磨。調真定錄事。陵州判官。改將作院照磨。伯益皆漠如也。徒日與彰德田衍師孟河間李京景山濟南張養浩希孟飲酒賦詩爲神交。時人望見之。皆以爲古仙異人。冀一得遇待爲幸。閣承旨時在翰林。謂人曰。吾聞伯益宜供奉翰林。苟有意幸得見之。伯益不屑也。後十餘年。始爲翰林應奉文字承務郎。同知制誥兼國史院編脩官。然伯益竟止是官。年才四十八。悲哉。伯益身長不過數尺。不宜騎馬。遇好友卽提杖出門。竟日去不返。願語妻子以爲常。始來京師。用囊中金。不識記數。及貲盡。益困。至終身亦不以介意。於書無不讀。於人物治道政術甚明白。而未始以辯博自雄。遇人無賢不肖。皆驩然無間。而胸中了不可混。長年京城居。而所以爲詩。簡澹蕭遠。如在山林。不與人接者。常謂人曰。吾知吳楚多瑰偉奇絕者。當委身往遊。乃稱吾意耳。楊載曰。然誠廣伯益以山水之勝。視陳子昂李太白未知何如。蓋伯益之詩。旨意不迫於事物。而律法深穩。合古作。故識者以載爲知言。伯益嘗學修金丹。求神仙。又嘗深坐默究。爲禪定。雖莫竟其所至。然灼不爲外境無疑矣。杜本曰。伯益人品極高。去世人已遠。當得大徹。豈不偉歟。惜乎年不待之也。未卒前一夕。猶與客飲。酒人家。莫歸。坐閱案上書。夜且半。妻孥頗察其有異。召醫未至。伯益忽拊几卻臥。不復言。禁鐘不盡一聲。趨喚。

楊載杜本來而復暝。嗚呼。若伯益者。豈非古之所謂超邁不羣者耶。方伯益在斂。某往哭之。見唐佐語。莫知事。曰。莫夫人何以爲生。幼女若爲得所歸。弱子若爲得所長。感慨出涕被面。毅然以爲己事。一坐皆歎。獻不能仰視。是以莫知事治棺槨。後極堅緻。理其家尤備。此皆有古道。非常人所可及。嗟夫。觀伯益之得於人如此。則伯益之所存可信已。烏乎。是爲表。

## 行狀

### 翰林學士承旨董公行狀

公諱文用。字彥材。真定路藁城縣人。元帥公第三子也。公生十年。元帥公死。王事于歸德。母李夫人治家嚴。伯兄忠獻公文炳。教諸弟有法。公內承家訓。而外受學。侍其先生軸。故學問早成。弱冠以詞賦試中。真定時。以真定藁城。奉莊聖太后湯沐。歲庚戌。太后使擇邑中子弟來上。公始從。忠獻公謁太后和林城。世祖皇帝在潛藩。命公主文書。講說帳中。常見許重。癸丑。世祖以憲宗皇帝命。自河西征雲南大理。忠獻公在行。公與弟壽國正獻公文忠。先在軍中督糧具贊軍務。丁巳。世祖令授皇太子經。是爲北平王雲南王也。又使爲使。召遺老於四方。而太師竇公默。左丞姚公樞。鶴鳴李公俊。民敬齋李公治。玉峯魏公璠。偕至。於是王府得人爲盛。己未。世祖以憲宗命取宋。公發沿邊蒙古漢人諸軍。理軍需。將攻鄂州。宋以賈似道呂文德將兵抗我。水陸軍容甚備。九月。世祖臨江閱戰。忠獻公請曰。宋恃江爲險。兵力厚。法當先之。奪其氣。臣請先。公與正獻公固請偕行。世祖親科甲冑。擇大艦授之。乃率敢死士數十人。鼓棹疾呼奮進。直

薄南岸。諸軍亦爭進。宋軍來赴戰。三合三敗之。公乘小舟歸報世祖。世祖方駐香爐峯。因策馬下山。問戰勝狀。則扶鞍立起。噉鞭仰指曰。天也。卽賜卮酒。使主帳下宿衛。且命傳令他帥曰。今夕毋飲酒。毋解甲。明日將圍城。旣渡江。會憲宗崩。閏十一月師還。庚中世祖卽皇帝位。建元中統。公持詔宣諭邊郡。且擇諸軍充侍衛。七月還朝。中書左丞張仲謙宣撫大名等路。奏公爲左右司郎中。二年八月。佩金符。以兵部郎中參議都元帥府事。三年。山東守臣李璫叛。據濟南。從元帥闊闕帶統兵伐之。五月而克其城。璫伏誅。山東平。元帥卒。公還都。元帥阿朮奉詔取宋。召公爲副。公辭曰。新制諸侯摠兵者。其子弟勿復任兵事。今伯兄以經略使摠重兵鎮山東。我不當行。帥曰。潛邸舊臣。不得引此爲說。公病不行。五年。改元至元之歲也。上曰。董某安在。年始壯。不使爲國效力。今安在。召授金符。爲西夏中興等路行省郎中。中興自渾都海之亂。甫定。民間相恐動。竄匿山谷。而省臣方人奏。同僚不知所爲。公曰。吾死不可以去此。宜鎮以靜。乃爲書置通道諭之。然後粗安。始開唐來漢延秦家等渠。墾中興西涼甘肅瓜沙等州之土。爲水田若干。於是民之歸者戶四五萬。悉授田種。頒農具。更造舟置黃河中。受諸部落及潰叛之來降者。時近屬貴人曰。只必鐵木兒者。鎮西方。其下縱橫。需索旁午。不可會計。省臣不能支。公坐幕府。輒而折以國法。其徒積忿。譖公。貴人怒。召使左右雜詛之。意叵測。公曰。我天子命吏。請得與天子所遣傳貴人者辨。天子所遣傳貴人者。中朝舊臣。嘗事莊聖太后。來詰問。公不承貴人旨意狀。公曰。我漢人生死不足計。我所恨者。仁慈寬裕如貴人。以重戚鎮遠方。而其下毒虐百姓。凌暴官府。傷貴人威名。於事體不便。因僂指其不法者數十事。詰問者驚起去。白貴人。卽召公謝之曰。非郎中。我殆不知。郎中持此心事朝廷。宜勿怠。自是譖不行。而省府事

粗立二年。入奏經略使宜還。以上旨行之。中興遂定。三年。行省罷。還京師。命公爲中書省左右司郎中。辭之。五年。立御史臺。授公山東東西道提刑按察副使。以仲兄右衛親軍千戶文蔚卒。不及赴。八年。立司農司。授公奉訓大夫。山東東西道巡行勸農使。十一年三月。加朝列大夫。勸農使如故。山東中更叛亂。多曠土。公巡行勸勵。無間幽僻。入登州境。見其墾闢有方。公爲詩表異。其守移刺。今刻石在州治。於是列郡咸勸。地利畢興。五年之間。政績爲天下勸農使之最。十二年。丞相安童公奏公爲中順大夫。工部侍郎。代紘石里石里者。阿合馬私人也。其徒閒安童公罷政。即使鷹監奏曰。自紘石里去。工部侍郎不給應食。應且瘦死矣。上怒。趣召治之。因急逮公入見。上望見曰。董某願爲爾治。應食者耶。置不問。別令取給有司。阿合馬知不可譖。十三年。出公爲少中大夫。衛輝路總管。兼本路諸軍輿路總管。佩金虎符。郡當要衝。民爲兵者十九。餘皆單弱貧病。不任力役。會初得江南圖籍金玉財帛之運。日夜不絕于道。警衛輪輓。日役數千夫。公遽然憂之曰。吾民弊矣。而又重妨穡事。殆不可。迺從轉運主者言。郡邑胥校足備用。不必重煩吾民也。主者曰。公言誠然。卽行公言。事萬有一不虞。罪將誰歸。公卽爲手書。具官職姓名保任之。民得以時耕而運事亦無不具者。諸郡運江淮粟于京師。衛當運十五萬。公曰。民籍可役者無幾。且江淮舟行。風水不時至。而先弊吾民以期會。是未運而民已憊矣。迺爲集旁郡通議。立法驛置。民力以紓。十四年。以職事詣汴漕司。方議通沁水。北東合流御河。以便漕者。公曰。衛爲郡地最下。大雨時行。沁輒溢。出百十里間。雨更甚。水不得達于河。卽浸涇及衛。今又道之使來。豈惟無衛。將無大名長蘆矣。會朝廷遣使相地形。上言衛州城中浮屠最高者。才與沁水平。勢不可開也。事得寢不行。爲郡多善政。民有去思。具見郡教授陶師淵。

所撰碑文。十六年。受代歸田里。作遐觀之亭於故丘。茅茨數椽。僅避風日。讀書賦詩。怡然燕居。自號野莊老人。裕宗在東宮。數爲臺臣言。董某勸舊忠良。何以不見用也。十八年。臺臣奏起公爲山北遼東道提刑按察使。不赴。十九年。朝廷選用舊臣。迺召公爲太中大夫。兵部尙書。自是朝廷有大議。未嘗不與聞。二十年。江淮省臣有欲專肆而忌廉察官者。建議行臺隸行省。狀上集議。公議曰。不可。御史臺譬之臥虎。雖未噬人。人猶畏其爲虎也。今司憲僅在紀綱。猶不振。一旦摧抑之。則風采齋然。無可復望者矣。又曰。前阿合馬用事時。商賈賤役。皆行賄入官。及事敗。欲盡去其人。廷議以爲不可。使阿合馬售私恩。而朝廷驟斂怨也。及使按察司劾去其不可者。然後吏有所憚。民有所赴。愬則是按察司者。國家當飭勵之。不可摧抑也。後悉從公議。轉通議大夫。禮部尙書。遷翰林集賢學士。知祕書監。時中書右丞盧世榮。本以貨利得幸。權要爲貴官。陰結貪刻之黨。將錙銖掊克爲功。迺建議曰。我立法治財。視常歲倍增。而民不擾也。詔下會議。人無敢言者。公陽問曰。此錢取諸右丞家耶。將取之民。取諸右丞家。則不敢知。若取諸民。則有說矣。牧羊者。歲常兩翦其毛。今牧人日翦其毛而獻之。則主者固悅其得毛之多矣。然而無以避寒熱。卽死且盡。毛又可得哉。民財亦有限。取之以時。猶懼其傷殘也。今盡刻剝無遺。猶有百姓乎。世榮不能對。丞相安童公謂坐中曰。諸君董尙書真不虛食俸祿者。議者出。皆謝公曰。公以一言折聚斂之臣。而厚本仁人之言。其利溥哉。豈不信然。世榮竟以是得罪。後嘗謂人曰。我不知何事忤董尙書。每折我。不遺餘力。二十二年。拜中奉大夫。江淮等處行中書省參知政事。公力辭。上前曰。江淮事劇。臣不敢當。上曰。卿家世非他人比。朕所以任卿者。不在錢穀細務也。卿當察其大者。事有不便。第言之。公不敢辭。遂行。行省長官者。素貴。佞。



多傲同列。莫敢仰視。跪起稟白。如小吏事上官。公則坐堂上。侃侃與論。是非可否。無所遷就。雖數忤之。不顧也。有以上命建浮屠於亡宋故宮者。有司奉行急迫。天大雨雪。入山伐木。死者數百人。而猶欲併大建佛寺。公坐中謂其人口。非時役民。民不堪矣。少徐之。如何。長官者曰。參政奈何。格上命。公曰。非格上命也。今日重困民力。失民心。豈上意耶。各拂袖去。然竟得少舒其程。公在行省政事。大概如此。廿三年。將用兵海東。徵斂益急。有司爲姦。日益甚。公曰。吾力不足以口語勝矣。迺請入奏事。大略言疲國家。可保之民力。取僻陋無用之小邦。其條目甚悉。言上事亦能。廿五年。拜御史中丞。公曰。中丞不當理細務。吾當先舉按察使。乃舉胡公祇適。王公憚雷公騰。荆幼紀。許楫。孔從道。十餘人爲按察使。又舉徐公次。魏公初。爲行臺中丞。當時以爲極選。方是時。桑葛當國用事。寵奉方熾。自近戚貴臣。見桑葛皆屏息遜避。無可誰何。以舊臣任御史。號不易爲。桑葛令人風公贊己。公於上前。公不答。又自謂公曰。百司皆具食丞相府。獨御史臺未具食。丞相府公又不答。屬朔方軍興。糧糗粗備。而誅責逾急。公謂之曰。民急矣。外難未解。而內戕其根本。丞相宜思之。於是遠近盜賊蜂起。公持外郡所上盜賊之目。謂之曰。百姓豈不欲生養安樂哉。急法奇斂。使至此耳。又謂之曰。御史臺所以救政事之不及。丞相當助之。不常抑之也。御史臺不得行。則民無所赴愬。而政日亂。將不止臺事不行也。浸忤其意。蓋深。乃撫拾臺事百端。公日與辯論。不爲屈。於是具奏桑葛姦狀。詔報公語密。外人不知也。桑葛日誣譖公于上曰。在朝惟董中丞。驕傲不聽令。沮撓尙書省。請治其罪。上曰。彼御史職也。何罪。且董某端謹。朕所素知。汝善視之。當是時。雖貴近以誣譖遭斥辱者不一。公徒以區區之誠。賴天監主知而免。於是遷公通奉大夫。大司農。時又欲奪民田爲屯田。公固執不可。則

又遷公爲翰林學士承旨。廿七年。隆福太后在東宮。以公耆舊。欲使公授皇孫以經。具奏上。以上命命之。曰。老人畏寒。須暄和。乃一至帳中。授經。內侍視饌。公每講說經旨。必傳以國朝故實。丁寧譬喻。反覆開悟。故皇孫亦特加崇禮焉。三十一年。上命公以其諸子八見。公曰。臣蒙國厚恩。死無以報。臣之子何能爲。謹不敢以見。命至再三。終不以見。是歲。世祖皇帝升遐。公望宮牆哀慟。幾墜馬下。同列爭持扶之。及致奠喪。次。羣臣皆推公曰。先帝漢人舊臣。唯公在矣。公宜前受酒行禮。皆相對哭失聲。今上皇帝將卽位於上都。太后命公從治裝。賜鈔百錠。以行。旣卽位。巡狩三不刺。公奏曰。先帝新棄天下。陛下遠狩。不以時還。無以慰安元元。宜趣還京師。且聞人君猶北辰然。居其所而衆星共之。不在勤遠略也。上悟。卽日可其奏。是行也。上每召入帳中。問先朝故事。公亦盛言先帝時虛心納賢。開國經世之務。談說或至夜半。太后亦素知公。故多所顧問。公自先帝時。每侍燕。與蒙古大臣同列。裕宗嘗就榻上賜酒。使毋下拜跪飲。皆異數也。上在東宮時。正旦受賀。於衆中見公。召使前曰。吾鄉見至尊甚憐汝。輒親取酒飲之。至是。眷賚至渥。賜鈔三百錠。至於金衣玉帶紫笠寶環之賜。皆追成先帝之業也。是年。詔脩先帝實錄。陞資善大夫。知制誥。兼脩國史。公於祖宗世系功德。戚近將相。家世勳績。皆記憶貫穿。史館有所考訂。質問公。應之無所遺失。大德元年夏四月。上章言臣老矣。請致其事。上聞之。特加資德大夫。許致仕。賜鈔二百錠。以歸。命一子官鄉郡。便侍養。六月戊寅。以疾薨于里第之正寢。享年七十有四。公性孝友。四時祭祀。輒思慕感愴。如將見之。事伯兄如事父。教子弟嚴而有禮。爲學以誠實爲主本。故其文章議論。皆質直忠厚。不爲華麗。其從政寬裕慈愛。簡於細務。至於謀大事。決大議。則剛毅正直。磊落可觀。歷事三朝。每以忠言正論爲己任。故言事

上前必引古證。今從容盡達其蘊。而後已。平居聞朝政。有一未善。輒終夜不寐。倚壁歎恨不置。曰。祖宗艱難成立之天下。豈可使賊臣壞之。故每與朝議。卽奮言不顧危禍。以片言折權姦。定國是者。不可勝紀。朝廷賴之。在御史臺。行中書省時。所遭皆大姦劇惡。每恨公不順己。計萬方欲殺之。公一不以爲意。曰。人臣在位。豈愛身苟容。而上負國家。下負生民乎。公仕宦五十餘年。凡十八命。祿俸之餘。盡以買書。而家無餽粥之資。卒。賣其京城之宅。以償積貸。世祖嘗念其貧。每欲有所賜。使近臣記其事。然公終不自言也。逮薨之日。惟有祭器書冊而已。其好賢樂善。尤出天性。雖待下士。必盡禮。至老且貴。終不倦。人有善。必推舉之。而名公大人。聞公所薦。亦必曰。出董公門。必佳士也。故天下之士爭歸之。與人謀。至忠款。故國人有爲使遠方。若出而領兵治民者。必來受教。而後行。公爲開導訓誨。足以歆動其意。至有欣然聽之。終日忘去者。而蒙古大臣見之。必曰。此故老也。皆改容待之。嗚呼。蓋可謂忠厚誠實君子者矣。公先娶王氏。元帥某之女。先卒。再娶周氏。江淮都轉運使惠之次女。後公四月卒。子男八人。士貞。士亨。爲仲兄。文蔚。後渡江。有功。官至昭勇大將軍。侍衛親軍。副都指揮使。佩金虎符。常侍裕宗東宮。先公卒。士楷。士英。士昌。士恒。承務郎。真定路總管。府判官。士廉。士方。女四人。長適趙秘。次適周俶。次適齊東縣尹王良傑。次在室。孫男十六人。守約。某某。孫女十人。長適吳某。次適張繼祖。次適侍其正。次適王惟賢。餘在室。曾孫男七人。皆幼。公墓兆在縣西北高里先塋之東。公國之老臣。數歷中外久矣。上而朝廷。下及四方。賢大夫士。宜必有深知公者。尙能道其德業之詳也。謹錄其歷官行事梗概如上。伏惟立言之君子。圖其不朽者焉。謹狀。大德七年三月某日。大都路儒學教授虞集狀。

# 傳

## 王貞傳

至治癸亥八月七日夜半。赤金帖木兒帖木兒不華稱使者扣北門入坐中書未明召集百司奪其印。八日樞密院掾史王貞見其完顏副使於都堂後西北廡下告之曰大行晏駕丞相死中書樞密無至者而二人實來赤金者累朝退黜不用不華者亦在散地誰使之耶兵權所在印豈可以授人貞職在治文書爾然臣子之分則均不敢不言副使愀然嘆曰大夫帖赤也貞因以其說徧告樞府大臣及其帳府請急執二使與中書同問治之院官親與名將急行統山後軍擒賊使不致有他變別遣官吏將兵民守關隘庶幾宥密大臣之事不然則國事未可知而諸君之罪大矣聞者皆震慄是其言而不能發也其後事定中書召貞爲丞相椽貞字吉甫保定唐邑龍華人云

史官曰義者天下之公逆順之辯人心安有不同然者哉知覺則同而臨事之際隱忍巽懦卒無以充其所明而狃於患失以自陷於不義者志不足以命義而制其欲故也若貞之言則發於義者勇矣然人之立事立功則必有位有才矣有其才而無其位有其位而無其才皆不足以有成也二者得矣又必當其時之可否焉此事之所以難也觀貞之言才可知矣所論亦當其時已而其位則不過得言之耳故備錄之以待采擇紀載云

## 李象賢傳

李象賢諱崇德。長沙醴陵人。世以儒名家。自其父兄以上。多稱鄉先生。大德中。象賢獨以材學辟湖南憲府史。湖南宣慰使和尚者。故丞相楚公阿里海牙之子也。楚公取長沙有功。和尚自幼時。摠父兵鎮長沙。及爲帥。頗驕肆。郡有織官。極絲縷文采之良。充貢尙服。和尚輒私取之。廉訪僉事李棟。以職事將劾治之。和尚懼。使人告李棟於朝曰。棟立券強質醴陵民田。實不予直。明年責民以直取田。又遣間繳怒朝貴。故人以事聞。有詔中書省御史臺遣人雜問之。使者至。和尚召田主若證佐嚇之曰。不如制使指意。禍且不測。至庭皆符告者言。棟分必死。無口可自解。象賢在證中。會遷廣東憲史。不得其辭。獄弗具。立遣遽逮。至卽具對使者。徒待一語成之。象賢乃直視田主曰。吾實見汝得錢。且汝手自閱。天其可欺邪。制使疑且怒。稍陵辱象賢。象賢曰。古人有言。名義至重。鬼神難欺。我終不以附會成李公死。辭氣明辨。使者雖盛氣訊鞠。辨益明。衆色變。言益錯。還使者乃得其情。棟不死。湖湘之間。人人言象賢。而風紀之司。益憎其人矣。象賢今積官至第六品。所至嚴而能恕。寬而有制。吏畏民愛。廉不自矜。好賢者固深敬。而忤忌者亦無間言。歷官皆在州縣。未嘗有纖介吏責。又爲難能焉。

史官虞集曰。予在國史執筆。論大人君子勳伐德業甚盛。而世有卓行奇蹟。或以微遠不見書。悲夫。棟予故人身佐憲府。乃質所部民田。雖實與直猶非是。予不能謂棟說也。嗚呼。世之畏威顯誣成人之罪。冤死者何限。姦虐者不足論。彼巽懦不自立。卒自陷於罔人之列。觀象賢之事。亦可以少自振乎。悲夫。

## 祭文

祭袁學士文

昔在故國。寓都海邦。乃瞻鄞越。視漢河陽。王公近臣。專邑列府。卿士以還。民或莫數。公生其間。不靡不矜。師友是求。問學是承。先宋旣亡。文獻淪隳。遺老或愍。力接淵懿。家藏多書。作昔石渠。下至琴弈。亦最其腴。博學洽聞。瑰偉精瑩。人無間言。公亦自信。我從草茅。或援起之。公以賞延。後先京師。于時同朝。多士濟濟。公獨我友。尙論其世。制作討論。必我與聞。或辨或同。有定無誼。公泰而舒。我塞寬跋。三十餘年。亦多契闊。公在禁林。益躋華階。人曰孔宜。公曰足哉。歸而寄書。勗我慰我。亦喜優游。自詫其果。曰易春秋。曾與子談。將卒成書。恐老弗堪。老不廢學。唯予與爾。終訂無忘。庶其在子。言猶在耳。俄以訃來。噫。天生公。乃止斯哉。儒林木萎。璧府星隕。伊邦之瘁。伊道之閔。區區深悲。莫致之託。託公鄉人。致此哀辭。公聞之乎。不聞之乎。嗚呼哀哉。尙饗。

祭潘博士文

嗚呼惟君。負奇挾剛。與俗寡諧。奮其雄辭。邁于等儕。國史編摩。歷躋顯階。成均之來。幸與子偕。正道是崇。邪說是排。學海狂瀾。浩乎靡涯。庶幾同舟。有濟無乖。如何不淑。百禩攻骸。奄然永隔。風雪蕭齋。遣車首丘。丹旆掩羅。一奠寓哀。莫旣于懷。嗚呼哀哉。尙享。

誄

謝先生誄

有簡差差。有章貫之。有畫有章。錯其贊之。歷時聖神。誕受于天。匪私匪虛。以命我人。孰挾其奇。入遜于荒。孰迷于微。孰其徒行。誦言如何。謦言如訛。致用則那。世則孔多。維謝仲直。氏受簡有自。以經以緯。以表以裏。以知存亡。以通變之理。相彼炎火。日熄于燬。惜子不辰。興逢于其隊。天遂降喪。國武以蹶。具曰多士。朋昏以世。蕩蕩川流。莫知其濟防。不制于潰。卽淪于圯。維哲時閔。載號載倡。彼爲不聞。覆謂我狂。亟伐鼓以告。子手弗勝。彼靡靡食息。弗興弗應。時之逝矣。旣莫之逮。命之訖矣。亦莫之噫。曰子有鼎。有鼎有載。我哭于庭。苟無墜我祀。日窮于天。靡有且矣。川息于海。靡有畔矣。俛俛中野。曷其歸矣。熒熒有躬。曷其爲矣。有山維夷。九折其蹊。予陟降茲。釋我寤懷。素冠纒纒。屢數數兮。縈縈無容。視莫莫兮。莫昵匪親。宛其不識。孰是造艱。牽予以縶。有馬有馬。北首于風。中道舒舒。以究于心。陵墜而夷。梧不實矣。黍稷則有。鳳不食矣。嗟不終食。離不淑矣。車庫莫升。長不復矣。嗚呼哀哉。木之云撥。返復于土。夙誓定命。卽終于所。生有不取。餓有不禦。妥乃瞑矣。我志卒獲。嗚呼哀哉。言瞻河洛。言索其故。或建五以御。或虛九以著。或畀或否。執子之手。誕未遑于訪。天弗遺叟。嗚呼哀哉。服勒終遠。有嘉弟子。謀謚孔臧。築室以祀。于父母之邦。神其寧止。嗚呼文節。亡愧於子紀。





# 道園學古錄卷之二十一

應制錄一

## 冊文

### 皇后祔廟冊文

伏以進承大統。奉宗廟以無私。升侑闕宮。在邦家而有制。永言徽懿。宜極尊崇。英宗皇后。翁吉刺氏。媿德英皇。相時至治。作新禮樂。親孝祀之苾芬。摠敷權綱。成化功之簡易。亶資中助。丕顯前聞。故周南詠輔佐之勤。坤道著順承之美。鼎湖夕逝。感霜露之恫身。椒掖晨空。驚歲時之卽遠。乃修禋典。式贊嘉稱。謹遣攝太尉某官。臣某奉玉冊玉寶。上尊號曰莊靜懿聖皇后。升祔英宗廟室。伏惟濯赫有靈。陟降在上。歆于大饗。於萬斯年。

### 皇后冊寶文

皇帝若曰。朕祇服祖宗之成訓。式嚴統緒之正傳。躬荷洪休。勉登大寶。揆乾坤之定位。觀日月之合明。乃瞻靈闈。聿崇稱號。皇后翁吉刺氏。專靜謙抑。懿柔淑嘉。世有令儀。來相宗事。肆朕舊勞於遠外。兼夙夜以愛勤。暨予力濟於艱難。亦後先而輔佐。若昔朝廷之體。循茲典禮之常。宮府具宜。家邦興讓。今遣攝太尉某官某。持節授爾玉冊寶章。以陰教乎內。備協人文。以順承乎天。永寧地道。噫。生民之詩作。不忘厥初。關雎之化行。庶幾有助。尙綏景命。克配無疆。

明宗皇帝祔廟冊文

臣聞統必有宗。生嘗得以致其讓。廟必有主。沒思所以尊其名。稽古考文。宜天錫誅。欽惟先皇帝。夙秉勇智。惟時元良。體傳次之成言。避謳歌而逸出。雖身居絕域。多歷於歲年。而義動遠人。樂爲之先後。德威孔著。未堪大業之艱貞。事變匪常。猶閔生靈而慎動。庶來蘇於僭戴。爰戡定以奉迎。已謹清宮。俄虛黃屋。臣民寡祐。永遺惠澤之敷施。天日有臨。尙想神明之如在。禮嚴升祔。誠備顯揚。謹遣攝太尉某官某。奉玉冊玉寶。上尊諡曰翼獻景孝皇帝。廟號明宗。伏冀容靈。俯回歆格。克綏不祚。垂裕無疆。

皇太后冊文

嗣皇帝臣御名謹稽首再拜言曰。臣惟祖宗積累之勤。奄有方夏。先皇仁讓之至。全付眇沖。奉神器以持盈。仰慈恩而思報。欽惟皇后陛下。德齊容聖。躬濟艱虞。相協成功。著坤儀於天下。彌綸大造。凝鼎命於禁中。爰尊太母之鴻名。祇若我家之盛典。式隆孝養。保祐方來。謹奉玉冊玉寶。上尊號曰皇太后。伏願上帝昭融。眷我皇國。於萬斯年。介以景福。永言思齊。祚胤千億。臣御名誠歡誠抃。稽首再拜謹言。

明宗皇帝升祔樂章

猗那皇明。世纘神武。敬天弗違。時潛時旅。龍旂在塗。言受率土。不遐有臨。永錫多嘏。

策問

會試策問

傳曰春秋教以禮樂冬夏教以詩書若稽古昔率是道也吾夫子修禮正刪樂詩定書贊周易作春秋天下萬世賴焉漢立學官經制博士名家之學史具可攷歷唐以來定爲註疏立教者用之國家設科取經術之士今十餘年矣廓而明之不在學者乎夫自漢唐至于近代說經者多矣或傳或否悉論焉則累日不能旣其目請以耳目所共及者而問焉易自王輔嗣之說行而言象數者隱其有存者猶當考夫邵子先天之學可得而傳乎程子之傳朱子之本義旨意所指文義所常有異同乎書有今文古文之辨傳者終不敢折而爲二以昔人成書有未可輕意者乎詩自毛傳盛行韓傳僅見迨朱氏傳出一洒其故其有所授乎毛鄭舊說猶有可論者乎春秋左氏公穀之傳與經並行久矣至于啖趙陸氏始辨其不合而求諸經君子韙之三子之說果盡得聖人之旨乎劉氏權衡三傳益密于陸而劉傳果無餘蘊乎胡氏之說其立義得無有當論者乎禮有儀禮及大小戴記又有周官小戴記今用之儀禮其經也可忽講乎大戴之記猶有可取者乎周官之制可互考乎鄭氏之註其歸一乎此固諸君子積習而素知者其詳言之

### 會試策問

昔者神禹盡力溝洫制其畜洩導止之方以備水旱之虞者其功尙矣然其因利而利之者代各有人故鄭渠鑿而秦人富蜀壩成而陸海興漢唐循良之吏所以衣食其民者莫不以行水爲務今畿輔東南河間諸郡地勢下春夏雨霖輒成沮洳關陝之交土多燥剛不宜於曠河南北平衍廣袤旱則千里赤地水溢則無所歸往往上貽宵旰之憂至發明詔修庶政出粟與幣分行賑貸恩德甚厚然思所以永相民業以稱旨意者豈無其策乎五行之材水居其一善用之則灌溉之利瘠土爲饒不善用之則泛溢填淤

溝瀆嚙食。茲欲講究利病。使畿輔諸郡。歲無墊溺之患。而樂耕桑之業。其疏通之術何先。使關陝河南北。高亢不乾。而下田不浸。其瀦防決引之法何在。江淮之交。陂塘之跡。古有而今廢者。何道可復。願詳陳之。以觀諸君子之學。

廷試策問

洪惟太祖皇帝受天明命。肇興景祚。列聖繼作。四征不庭。鋒旗攸指。靡不率服。迨我世祖皇帝。混一區宇。職方所載。振古未有。於是建國紀元。立官府。置郡縣。制禮樂。定貢賦。帝德王功之盛。粲然如日星之行天。四時之成歲也。六七十之間。講之益明。治之益習。天下晏然。守其盈成者。又何以加之哉。朕纘承正緒。夙夜祇懼。承我聖祖神考之心。比歲再禡太室。仰而思之。求盡其道而未能也。夫親親莫內于九族。今百世本支繁衍盛大。則既尊位重祿矣。尙有以勸之之道乎。尊賢莫先於百姓。今世臣大家勳業昭茂。則亦既富方穀矣。尙有以體之之道乎。多方內附之衆。因其俗而導之者。亦既久矣。一而同之之道。尙有可充者乎。生聚教養之民。因其生而厚之者。亦既周矣。協而雍之之道。尙有可致者乎。書曰。鑒于先王成憲。其永無愆。朕之志也。子大夫咸以道藝來造于廷。其備陳之。朕將親覽焉。

廷試策問

朕聞伏羲神農黃帝之事。見於易。堯舜禹湯文武之治。存乎書。皆聖人也。其號名雖殊。而治化則一。日月星辰之爲天。丘陵川澤之爲土。君臣父子夫婦長幼之爲人。三極之道。有以異乎。宗廟也。朝廷也。師旅也。禮樂也。佃漁也。耕桑也。時之所尙。雖小有損益。其爲治之具。豈有易於此者乎。然而伏羲神農黃帝之所

以爲伏羲神農黃帝堯舜禹湯文武之所以爲堯舜禹湯文武可得而別歟。伏羲之卦。文王申之。神禹之疇。武王詢之。文無異也。道無異也。然伏羲之作。造化備矣。何以有待於文王。武王之心。神明通矣。何以猶待於箕子。然則羣聖之與。有待於後世者。猶無窮乎。子大夫習之於師。考之於古。得之於心。宜之於今。亦素有其說乎。朕誠以爲非伏羲神農黃帝無以爲道。非堯舜無以爲德。非禹湯文武無以爲功。心術之精微。制作之會通。子大夫其悉陳之。朕將親覽焉。

### 詩

#### 題周怡臨韓幹明皇出游圖

開元盛事何人畫。玉冠夫容御天馬。從官騎步各有持。移仗華清意閒暇。宮花如錦照青春。詔許傳看思古人。不知身在瀛洲上。親奉圖書侍紫宸。

#### 明皇出游圖

輦路風微曉霧開。華清宮裏看花來。五王走馬誰先醉。倒着宮袍去不回。

#### 端午賜大長公主

細葛迎颺喜宮衣之初試。瑞蓮承霧慶壽罍之方持。輒陳節物之多儀。用祝年齡之有永。併將唐律式衍魯風。

殿閣薰風五月涼。綠荷池上度天香。扇裁團鑑飄羅雪。盃注輕冰藹玉漿。塵尾可消時晝永。綵絲宜祝壽

年長清朝共慶宮闈貴。萬歲菖蒲汎紫觴。

董元夏景山口待渡圖

董元夏山何可得。嘉木千章鐵作畫。層巒總合雨氣潤。百谷正受川光溢。犬牙洲渚善沃洄。滄江散落碣石開。山田何處無耕鑿。尋源不得遠徘徊。柳下行人將有適。臨流不度心爲惻。我楫孔堅舟孔安。奉子以濟諒非難。

徽宗畫梨花青禽圖

宿雨初收禁林寂。玉斧臨牕看春色。蒺藜沙上暖塵飛。何處人間作寒食。

趙千里小景

前代王孫不好武。拈筆幽牕寫汀渚。殘雲野水三百年。依舊松筠溼春雨。

燕文貴小景

行盡長松逕。溪頭有小舟。鑑湖如賜與。終日弄清流。

趙千里出峽圖

巨舟臨峽口。衆工志如一。各以所操濟。雖危萬無失。所憂至平曠。玩肆生縱逸。毋俾持釣翁。倚杖三太息。

蘊能羅漢圖

有寶其實破慳來獻我。乃回施非見所見。月輪當空天清海平。神光赫然萬國永寧。

白樂天重屏圖

錦屏圍煖坐衰翁。妻子相看語笑同。翡翠鴛鴦元是畫。櫻桃楊柳詎非空。清朝優老容歸早。野寺宜閑見歲豐。兜率有天何異此。葛巾吟偈白蓮風。

陳閱畫中宗射鹿圖

昭陵石馬立殘陽。曾見騰驤逐鹿場。馳射衝波夸獲雉。故知英氣似前王。

羅漢圖

神光炯炯視容直。坐展兩足手按膝。雨龍還入軍持水。風衣拂着磐陀石。深山海島非人間。碧桃花開啼鳥閒。法雲還爲等慈起。巖然飛錫無留難。

韓幹馬

開元沙苑蒺藜秋。韓幹新圖認不收。天廡真龍奇骨在。故知臣甫賀驊騮。

曹霸下槽馬

櫪下長年飽豆芻。誰通馬語識踟蹰。主恩深重知何報。或者東封駕鼓車。

韓幹公澆土星像

猗黃靈墳土中馴。伏牛類相從。朱旂揚招。八風乘天。田入紫宮。命司畜錫。九農鳴塊。桴年屢豐。

柯博士畫扇

旭日鳴幽鳥。露華在芳藂。外廷無奏事。殿閣自微風。

胡虔取水蕃部圖

駝車度磧輒三日。老馬砲沙泉水溢。橐囊盛滿不辭勞。徼外天山雪千尺。君不見聖明天子恩澤多。旁及四海猶翕河。昆蟲草木感餘潤。日獻醴泉甘露歌。

滕昌祐檀香睡鵝圖

蒼鵝惜毛羽。宛宛臥春雨。雨餘日照沙。上有檀香花。懷香不自獻。夢到金鑾殿。殿池多躍魚。君王方草書。

銘

奎章閣銘

天曆二年三月吉日。天子作奎章閣。萬機之暇。觀書怡神。則恒御焉。臣奉勅而銘之曰。維皇穆清。中正無爲。翼翼其欽。聖性日熙。迺闢延閣。左圖右史。匪資燕娛。稽古之理。經緯有文。如日行天。爰刻貞玉。垂美萬年。

棋盤銘

動制勝。靜保德。勇有功。仁無敵。

棋盤銘

圓周天。方畫地。握化機。發神智。

贊



趙平章畫像贊

臣聞古昔帝王所以加禮於輔相老臣者。以爲爵位之崇。錫予之厚。有不足以盡其心。則必象其體貌。而致美於形容焉。於顯顯昂昂。如圭如璋。又曰敬慎威儀。惟民之則。其此之謂夫。公以勳門將出。篤尙儒素。積學以致用人。莫知其志之所存也。出事世祖皇帝。始爲御史。風采肅然。據厲中外。歷事累朝。踐揚臺省。垂五十年。事業著簡冊。勳庸書旂常。天下謂之名臣。朝廷謂之元老。當顯用而憂時愈深。嬰患難而立節彌固。夷險一致。進退以時。蓋有古君子之風焉。是以論者以爲清嚴似揚縮。淵通似李泌。周緻似姚崇。劉至似陸贄。至於以直搆禍。蹈機穽而不爲之動。則漢蕭望之。殆不能及。噫。此天下之公言。非臣之私言也。至順元年五月甲子。今上皇帝念翊戴之功。俾繪其像。而命臣集爲之贊。臣少嘗從公游。今且老矣。其實知公。故承詔不辭。謹再拜稽首而獻詩曰。

肅肅魯公。泰山巖巖。剛毅直方。爲國之監。有言有猷。以定國是。衆人所難。在公則易。世祖舊臣。維公在茲。百煉之剛。遇挫弗虧。上帝者之。俾佐天子。底定綏輯。彌文以理。白髮蒼顏。正笏垂紳。凜然秋霜。煦兮陽春。國有老成。邦家之福。天子萬年。景命有僕。

趙中丞畫像贊

天曆庚午孟夏初吉。聖天子以爲御史中丞。趙公世安。元從功臣。爰置左右。踐躐省轄。表正風憲。厥績殊茂。乃命繪像。用肅具瞻。親御翰墨。書勅其上。識以寶璽。而命臣集述贊焉。臣惟公之事上也。靖恭夙夜。夷險一致。入則告以謀猷之嘉。出則宣其德意之美。惓惓焉愛君體國之意。其見於儀形風采者。宜垂頌焉。

謹拜手而述贊曰。

肅肅憲綱。國之司直。以正朝廷。百辟是式。聖皇御天。法度章程。風霆之威。日星之明。昔在世祖。最重斯職。列聖授受。精意慎擇。賢必有能。廉必有材。必信必親。庶尹則諧。惟今趙公。簡在有素。旣勤其躬。亦衡其慮。天子有行。鞭弭囊鞬。天子正統。襄贊周旋。溫溫其儀。侃侃其色。珮玉舒遲。前席密勿。曆階中書。時清政平。乃肅風紀。以贊國成。知無不言。言無不聽。有容有嚴。有文有政。天子萬年。大臣相之。九叙惟歌。無以尙之。

吳宗師畫像贊

游乎萬物之表。而能約己於名教。老乎朝廷之間。而不濡迹於公卿。粲若華星之麗乎河漢。浩然雲氣之出乎嵩衡。其凝也止水之善鑑。其動也祥風之時行。祠黃石者。蓋有遺書之託。衣白衣者。寧無辭當世之名。導冲和以輔元化。非呼吸而致長生。伊耆有巢父。軒轅有廣成。則所謂宏演博大真人者。安得不後天地。齊日月。以贊于休明者乎。

御馬五雲驥圖贊

傳曰。天用莫如龍。地用莫如馬。夫馬上配乎龍。而乾之爲象兼焉。斯其爲貴者矣。然周穆遊乎西極。虛傳八駿之名。漢武求諸渥洼。實費貳師之出。方于今日。殆不足云。我國家肇基朔方。奄有六合。千乘萬騎。風焱電馳。武功告成。禮文畢備。百年涵煦之久。萬物生息之繁。於斯盛矣。乃若夫馬。外則馴馴而在朝。樂彼超驥。內而肅肅以居。閑均其調習。論其可以名稱者。蓋不勝紀。至順二年夏。天子時巡上京。行幸之次日。閱其良。於是五雲之驥出焉。蓋神駿之尤傑者也。臨軒一顧。廓開萬里之風雲。立仗羣趨。却立九重之虎。

豹光逾雪練。文戴龍章。凡其游牧之生。悉備乘輿之御。此豈偶然者哉。於是命善工圖形。藏諸內閣。而俾臣贊之。臣聞驥不稱其力。稱其德也。今斯驥也。生于明時。遭逢賞鑒。不有其德。曷克臻茲。噫。一馬之善。上猶錄之如此。豈有人材之出於當世。而不見知見用者哉。敢述贊曰。房宿儲精。天馬來下。有萬其駿。莫之能侶。玄文五聚。黼黻厥身。粲若負圖。猶龍有神。聖皇在御。神物斯出。行地乘天。嘯雲耀日。爰勅繪素。對貌奇姿。德力具稱。存乎贊辭。

### 瑞鶴贊

至順三年三月。趙國公臣常不蘭奚。中書平章政事臣亦列赤。御史中丞臣脫盈納等。欽奉皇帝聖旨。皇后懿旨。命特進神仙大宗師臣苗道一。脩羅天大醮于大長春宮。四月朔日。臣不蘭奚。自長春以青詞入謁內廷。請署天子御名。沐以龍香之澤。封以雲錦之函。羽葆鼓吹。導自禁籞。歷于會城。浮塵不揚。馳道清肅。風日和美。靈光發舒。將至乎仙壇。而臣道一率其屬。奉迎道周。羽蓋雜華。霧以繽紛。法曲繞旌。霓而高亮。百官在列。萬姓聚觀。乃有青鸞白鶴。飛舞太空。雅唳長鳴。去人尋丈。若羣真之並駕。從□□以來。迎盤桓。後先及壇而止。衆目瞻視。驚歎神異。醮禮告成。言將復命。咸曰。苗君某先朝舊人。老成端恪。道行嚴一。故能深達皇宸。致感玄微。有如此者。而臣道一乃曰。兩宮至誠。上與天通。一念之興。如響斯答。天何言哉。示之以事。是故玄裳縞衣。羽翼乍離於三景。同鳴齊唱。音聲遙聞於九天。老臣奉詔禱祈。庶竭愚分而已。至于明應。則上帝之所以報兩宮。非老臣之所能致也。然臣不蘭奚等。不敢隱其事。繪圖以聞。傳旨國史。臣集書以識之。蓋仙人道士之言云。太上至真。飛行虛無。不可以形迹見也。然而輟馳翔於寥廓。橫四海。

而覽輝。則羽族有先見者焉。書傳有之。鳳凰來儀。神祇來格。此其類也。臣聞至元紀元。歲在甲子。實命誠明。張真人建大醮於茲宮。有瑞鶴之應焉。今七十年矣。前太常徐琰見諸贊詠。臣切思之。至元甲子。世祖皇帝在位之五年。今茲之歲。則今上皇帝之第五春也。玄徵之感。同符世祖。不亦盛乎。於乎。我聖皇敬天尊祖之誠。仁民愛物之惠。前聖後聖。其揆若一。則吾聖元宗社無疆之福。詎可量哉。敢再拜稽首述贊曰。明明天子。昭事上帝。肅肅在宮。齊聖無二。乃陞殊庭。神明所都。嘉徵瑞圖。此與此儲。維時神師。故舊耆老。羽衣持節。致我惋惜。綠章紫封。金龍夾扶。來自禁中。百靈與俱。倬彼雲漢。有飛者羽。如雪映掩。載翔載舞。乃占道書。是爲貞符。聖神鑒臨。其來舒舒。降休隕祉。爰自昔始。表而著之。億千萬禩。

# 道園學古錄卷之二十二

應制錄二

## 制誥

### 封宣聖夫人制

我國家惇典禮以彌文。本闕門以成教。乃睠素王之廟。尙虛元媿之封。有其舉之。斯爲盛矣。大成至聖文宣王妻并官氏。來嬪聖室。垂裕世家。籩豆出房。因流風於殷禮。瑟琴在御。存燕樂於魯堂。功言邈若於遺聞。儀範儼乎其合德。作爾禪衣之象。稱其命鼎之銘。噫。秩秩彝倫。吾欲廣關雎鵲巢之化。皇皇文治。天其興河圖鳳鳥之祥。可特封大成至聖文宣王夫人。主者施行。

### 鄆安大長公主詞頭

皇家制禮。恩實重於懿親。帝女正儀。體尤隆於尊屬。肆頒異數。祇協彝章。公主某。慈孝夙聞。肅維維則。翟車象服。備赫奕於先朝。鳧繹龜蒙。適奠安於樂國。爰進加於長號。又增益於大名。於戲。詩詠穠華。德彌崇於戚畹。易占元吉。世永保於藩封。

### 燕帖木右丞相封太平王制

朕正祖宗之統。入纘丕圖。國有社稷之臣。宜維世胄。旣克戡於多難。宜超示於殊恩。具官某。沉鷲有謀。英銳無敵。我皇考昔撫軍於龍朔。而爾父寔佐命之虎臣。賜券報功。盟書啓籥。更累朝而彌顯。識大歷之攸

歸手握兵符。力扶景祚。父清宮而迎乘。猶多壘之在郊。臨陳誓師。咸服奉辭之慷慨。揮戈決戰。衆驚用武之神明。人民懷綏輯之恩。城闕壯奠安之勢。俾兼司於將相。用修扞於邦家。韓信之輔漢皇。論定當時之攻取。子儀之在唐室。身爲天下之安危。皆眞食於王封。今何慙於往轍。是用錫之位號。昨以土田。禮冠絕於百僚。名永垂於千載。鳴虜有非常之功。則有非常之賞。朕用獎於勳勞。建太平之業。而享太平之成。爾毋忘於眷注。不昭至意。式克欽承。

封營都王制

緬懷故舊之恩。莫如阿保。爰致褒崇之典。俾極哀榮。國有恒規。朕無私惠。其官某。恭良而愿慤。溫厚而老成。卜以負之。昔彼東朝之簡用。擇其可者。並居甲觀。以扶持。嗟備著於勤勞。不少留於耆艾。肆予踐阼。首錫褒封。時巡來次於近郊。秋露久濡於宿草。顧茲賚典。未究深衷。迺命外廷。更申異數。於戲。五等之爵。重莫過於王封。千乘之邦。親莫先於畿甸。尙其英爽。承我休嘉。

營都王夫人

纂圖撫運。崇德報功。追念爾勞。克任保持之力。至于今日。共享安榮之時。天不假年。禮宜異數。其官某。出入禁掖。左右朕躬。安其煦育之柔。稱爾溫良之懿。邦家宮府。共興故舊之思。車服土田。何愛使蕃之錫。爰頒子渥。俾相其夫。於戲。若昔諸侯。王有生至貴。封之千乘。國無憾令終。

封營國公制

國之令典。必兼恩義之隆。時維舊勛。宜錫褒崇之盛。嗟其遠矣。今俾申之。具官某。自其幼時。在朕潛邸。櫛

襍共其燥溼。啓處與之周旋。越在艱難。尤負勞動。屬臺鞮而未釋。傷雨霧之逾深。彗躔以歸。籌帷頓失。迨予纘緒。風雲千載之興。獨爾親臣。丘隴九原之閔。廓其封兆。錫以榮名。顧未究於予懷。乃增疇於大邑。於戲。萬鍾之祿。雖不及於生前。兩世之封。庶有勸於天下。

### 營國公夫人

盡瘁以仕。良臣有翊衛之勤。從一而終。貞婦抱純誠之懿。錫以寵數。光于幽潛。具官某。淑慎其身。柔嘉維則。閱殷雷之勤而勸義。守柏舟之誓而靡他。同穴而藏。得相從于地下。疏恩以報。何不逮於生前。賁之簡書。易其湯沐。於戲。哀榮被於兩世。固申勸於舊勞。忠孝萃於一門。亦以表夫高節。

### 封寧朔王制

朕纂膺丕緒。聿懷舊德之臣。敷歷治朝。夙被先皇之眷。未及懸車之歲。遽聞拱木之新。爰命有司。備循彝典。具官幹亦剛明。而有守。沉毅而善謀。閑輿衛於藩垣。治軍實於幃府。自覃懷而入定。內難與贊。廟謨望龍朔而奉導。前驅仰承天表。進拜集賢之任。旋參儲極之寮。徧踐清華。具瞻台鼎。往填南服。偶逢草棘之弄兵。召使北還。猶駐旌帷而按堵。不遺憂於宵旰。真知體之股肱。久簡朕心。方將柄用。迺致愆遺之誅。寔深耆艾之思。賢子能忠。在朕左右。真王加錫。賁卿始終。並兼封贈之崇。式表哀榮之極。於乎。往哉。魂魄樂壯美之山河。宜爾子孫。輔奠安之社稷。

### 封寧朔王夫人

瞻我大臣。旣極褒崇之典。相其內助。宜同恩數之隆。俾增耀於禕輪。用齊華於圭袞。具官幹亦妻鐵理。柔

嘉而端肅。恭儉而和平。克贊其夫。終始股肱之任。善儀諸子。服勤左右之方。身致康寧。家用昌熾。命錫封章之貴。養宜鼎食之珍。於戲。維此朔方。寔爾世家之舊。躋於上壽。用成賢母之名。

封遼陽王制

朕寅奉丕基。務推茂澤。迺瞻廷臣之舊。昔膺柄用之勞。俾率彝章。特還卹典。具官哈散。秉資謹愿。接物寬容。始緣宿衛之勤。尋寄貨泉之任。致身省闈。蓋歷事於五朝。執政廟堂。嘗首相者數載。每規隨於盡一。克同協於和恭。均逸外藩。遠將德意。宣恩東服。備著輯綏。凡其登進之時。率在阜殷之日。久奉公於夙夜。亦良稱於股肱。弗永終譽。遽與遠嘅。秋霜在野。莫追既往之悲。旦日行封。尙服維新之渥。茲誠異數。式慰遺魂。噫。遼海非遙。姑遂懷鄉之志。子孫不隊。益推報國之忠。

封燕卜鄰知院祖明里

我國家教孝以勸忠。因近以及遠。德之茂者。名久而後著。恩之深者。爵加而愈隆。具官某。愿而能恭。勇而知禮。始逢景運。當東征西伐之殷。先啓戎行。有左弭右韃之助。克勤乃事。竟隕厥躬。顯融不及於常時。勳業迺興於後裔。往稽故府。宜錫嘉邦。於戲。古者專城重地。莫逾於上谷。賁諸幽壤。名王遂賜於全封。爾其有知服我休命。

祖母

師武臣力。國家致興運之隆。坤道天成。母子有成人之造。異恩所泊。豈曰徒然。具官某。儉以飭躬。慈而逮下。相其夫子。每崇忠厚之風。宜爾家人。用啓功庸之盛。是以甫及再傳之後。並登一品之榮。五世其昌。三



王並列於戲。酬其爵邑。欲遠舉於雲中。咨爾臣工。以示勸於天下。用申顯命。以賁幽宮。

父

中興啓運。則必有帷幄之舊。不二之臣。重祿勸功。則必有茅土之封。使蕃之錫。具官某。曩在宿衛。已著勤勞。王師飛渡於長江。既買先登之勇。使節載臨於多壘。不忘命將之忠。逮其子孫。相我家國。至重者本兵之任。至嚴者風紀之司。而爾一家兼茲兩府。故紀勳庸之盛。以彰信任之功。列以王章著之邦典。於戲。擁雍州之地。式重師垣。申泰山之盟。聿昌世胄。益崇忠蓋。用保休嘉。

趙平章加官封制

宰輔者。政之根本。特疏貴爵之封。老成者。國之菁龜。爰極文儒之任。進登崇級。增重化權。具官趙某。方嚴而精明。果毅而詳練。卓以纛韞之冑。儼然章布之風。始事世皇。卽拜御史。多歷年所。徧踐臺司。閱實簡書。每先幾而扶直。作新風紀。必正色以摧姦。常依日月之光。不改冰霜之操。洵在政府。蔚爲名臣。嗟賢者之邁屯。見予家之多難。蕭望之身罹機禍。幾貽咎於當時。汲長孺面質深文。恥獨爲於君子。暨于戡定。嘉爾勤勞。審是統宗。既蹈危而奉義。至其子弟。亦見殺以成仁。方圖報之在衷。屢引年而爲說。載念紫微之務。實資黃髮之詢。是用建爾上公。保茲東魯。可優游於館閣。以勸相於國家。於戲。慎乃威儀。赤舄具瞻。於几。几俾之耆艾。泰山庸作於岩岩。爾其欽哉。服我休命。

封悟理閒八制

粵有高僧。來從西域。式弘內教。爰錫嘉稱。悟理閒八。歷世勤脩。一源不昧。寶月長臨。於逝水。慈雲隨起。於

祇園遠探夙智之因。如指其掌。廣說真如之縑。實契予心。紹隆佛種之傳。以稱國師之號。可特授智勝妙行宿慧通應圓悟佑福國師。

封鑑贊八制

象教之行。國家所尚。宜申嘉號。用表高僧。鑑贊八性。本天成。世隆佛種。昔弘宣於內典。蚤有譽於諸方。物不累心。舍奉己者。二萬戶。事融於理。獨隱居者。十餘年。既徇請而一來。宜具書於衆善。可特授宏智正悟大辯揔持勝濟慧福國師。

封蔣山寶公和尚制

朕不纂鴻圖。中興景運。致百靈之扶羽。出庶徵之禎祥。迺瞻真如。尤深簡注。寶公和尚。現化身而濟世。持應器以垂機。顯密齊彰。神變著聞於當日。慈威互用。廢休行及於千年。貌在大江之南。常住道林之上。朕昔居潛邸。恒仰寶坊。萬石懸鐘。表明珠而不灼。四阿承露。輯多寶以新成。暨余踐祚之初。首致加封之敬。若稽祀典。宜錫贊書。噫。尙鑒至誠。豈直朕躬之禱。益弘願力。俾堅兆姓之安。

封張真君制

朕惟有道之君。臨治貴無爲。而民化。故先哲相承於上德。而至譽不執於常名。瞻茲大歷之在予。懷昔異人之輔世。具官某。倣以興運。喪然來儀。咎庸方篤於容思。晤對卽符於神會。嘉謀入告。其辭如徵。於龜著成功。不居其志。固輕於軒冕。處身於至約之地。毓物於泰和之中。酬酢事變。而先見其幾。從容朝廷。而不濡其迹。設教獨高於衆甫。傳宗最號於多賢。盛服齊明。保合天人之際。基命宥密。替襄邦國之休。遽脫屣

而弗留。每當寧而永漑。猶慮人閒之爵。莫縻方外之游。俾極崇稱。以表高致。於乎。陟降左右。想陪列聖於帝庭。出入有無。恒佑萬年之皇祚。尙紆玄覽。祇若寵章。

### 大道教十一祖張真人制

朕慨觀古昔。有懷大道之淳。歷考聖神。悉尙至誠之本。緣名而設其教。論世以嗣其宗。其說之興。于今茲久。張某淵乎授受。遠有師承。結宇丹臺。仍載皇人之筆。奉祠黃石。蓋山老父之書。惟神物之猶存。乃嘉名之是錫。率由其舊。眷渥維新。噫。與天下而爲公。朕用敷於至意。居域中而同大。爾毋敷於真風。

## 序

### 皇圖大訓序

皇圖大訓者。前榮祿大夫中書右丞臣許師敬。因其先臣衡。以脩德爲治之事。嘗進說於世祖皇帝者。而中行之。而翰林學士承旨榮祿大夫。知經筵事。臣阿璘帖木兒。奎章閣大學士。光祿大夫。知經筵事。臣忽都魯都兒迷失。潤譯以國語者也。天曆二年。天子始作奎章閣。延問道德。以熙聖學。又勅藝文監。表章儒術。取其書之關繫於治教者。以次摹印而傳之。清燕之暇。偶得此編。以爲聖經賢傳。有功於世道者。旣各有成書。而纂言輯行。會類可觀者。又盡出於前代。獨此編作於明時。文字爾雅。譯說詳明。便於國人。故首命刻之。仍敕臣集爲之序。臣聞古之人君。能自得師者。莫先於稽古。古之人臣。真知愛君者。務引於當道。後世豈無聰明之君。而無睿哲之實者。弗考於古訓故也。爲之臣者。亦豈有不愛其君者。然而不以阿順。

旨意爲敬。則以承奉疏節爲忠。不知古學。以至於此。爲其君者。獨何利哉。今天子以天縱之聖。克尊前聞。又欲羣臣遍知其說。使不至徒徇細人之愛。爲具臣之事而已也。於虛聖心所在。如天日之昭明。得是書者。其可不深思於此也哉。

金字藏經序

蓋聞乾剛御世。必資化於坤儀。月鏡涵空。亦承輝於日象。我今上皇帝。創建大承天護聖寺。於是皇后念紹隆於祖武。祈輯福於聖躬。嘉惠生民。俾均法施。迺造金書三乘經教。一大瑤藏。廣啓勝緣。增崇上志。伏願光音融徹。顯密圓通。五雨十風。詠讚皇明之運。普天率土。皈依等覺之慈。常住正因。永扶景祚。

飲膳正要序

臣聞古之君子。善脩其身者。動息節宜。以養生。飲食衣服。以養體。威儀行義。以養德。是故周公之制禮也。天子之起居衣服飲食。各有其官。皆統於冢宰。蓋慎之至也。今上皇帝。天縱聖明。文思深遠。御延閣闈圖書。且莫有恒。則尊養德性。以酬酢萬幾。得內聖外王之道焉。於是臣趙國公李蘭奚。以所領膳醫。臣忽思慧所撰飲膳正要。以進其言曰。昔世祖皇帝。食飲必稽於本草。動靜必準乎法度。是以身躋上壽。貽子孫無疆之福焉。是書也。是時尙醫之論著者云。噫。進書者。可謂能執其藝事。以致其忠愛者矣。而聖心溥博。又將推以及人。於是中宮命留守臣金界奴。庀工刻梓。摹印以徧賜臣下。於呼。推一己之安。使天下之人舉安推一己之壽。使天下之人舉壽。聖天子以天地之心爲心。而爲生民立命者。蓋如此。天曆三年。□月。□日。謹序。

承天仁惠局藥方序

欽天統聖至德誠功大文孝皇帝。以聰明叡知之資。臨御宇內。推一心之至仁。參兩儀而中立。昭宣三光。調順四時。播五行之精。御六氣之辨。協七鈞之音。通八風之化。九功既敘。盛德大業至矣哉。是以億兆萬姓。休養生息於壽域之中。而不識不知者也。而皇上至德無外。視民如傷。仁厚恕之心。恒若不及。乃命隆祥使司作承天仁惠藥局。俾太醫院使臣耿某。取和劑局方。御藥院方。張長沙傷寒論。宣明論。端効方。朱氏活人書。嚴氏濟生方。楊氏方。錢氏小兒方。擇其藥之適用者。分廿六門。凡二百七十五方。又勅中書右丞臣撒迪。大禧院使臣晃忽兒。不花。大司農臣張金界奴。與奎章閣大學士臣阿榮。相與詳定。進上。命刻其書。而出大承天護聖寺庫金。製藥開局。以施萬民之有疾苦者。十月廿二日。臣金界奴至學士院。奉宣聖旨。命臣集識而序之。臣聞古者帝王之於民也。其爲之衣食以生養之。又爲之謹禴禳。治砭熯。以救札瘥之不測。此所謂先王有不忍人之心。斯有不忍人之政者也。今皇上一日萬幾。而思慮之周。至於仁惠局之設。可謂至且盡矣。傳曰。天地之大德曰生。生也者。所以爲我皇元億萬斯年無疆之福也哉。

記

奎章閣記奉勅視草

大統既正。海內定一。迺稽古右文。崇德樂道。以天曆二年三月。作奎章之閣。備燕閒之居。將以淵潛遐思。緝熙典學。迺置學士員。俾頌乎祖宗之成訓。毋忘乎創業之艱難。而守成之不易也。又俾陳夫內聖外王。

之道興亡得失之故。而以自傲焉。其爲閣也。因便殿之西廡。擇高明而有容。不加飾乎采斲。不重勞於土木。不過啓戶牖以順清燠。樹度閣以棲圖書而已。至於器玩之陳。非古制作中法度者。不得在列。其爲處也。跬步戶庭之間。而清嚴邃密。非有朝會祠享時巡之事。幾無一日而不御於斯。於是宰輔有所奏請。宥密有所圖回。諍臣有所繩糾。侍從有所獻替。以次入對。從容密勿。蓋終日焉。而聲色狗馬。不軌不物者。無因而至前矣。自古聖明叡知。善於怡心養神。而培本浚原。泛應萬變。而不窮者。未有易乎此者也。蓋聞天有恒運。日月之行不息矣。地有恒勢。水土之載不匱矣。人君有恒居。則天地民物有所係屬。而不易矣。居是閣也。靜焉而天爲一動焉。而天弗遠。庶乎有道之福。以保我子孫黎民於無窮哉。四月日記。

五色石屏風記

聖天子在奎章閣。有獻文石者。平直如砥。厚不及寸。其陽丹碧光彩。有雲氣人物山川屋邑之形狀。自然天成。非工巧所能摹擬。其陰漫理紫潤。可書可鐫。有勅命臣集記諸。而攻木製匡廓。植以爲屏焉。臣集拜手稽首而言曰。洪惟聖天子。天縱睿知。作興人文。所以命臣之意。豈徒欲夸瑰異於玩賞乎。臣嘗聞之。昔者龍馬負圖。而出於河。伏羲則之。以作卦畫。而前民用。蓋二氣之實。五行之殊。蹟可見者。理無不具。俯仰遠近。皆有取焉。况乎神物之特出者哉。臣是以知天之所以徵感於聖心之深契者矣。傳記有之。女媧氏之有天下也。鍊五色石以補天。或者疑焉。而臣獨以爲古言奇奧。蓋有所喻。五色者。五行之精英。補天者。猶言財成其道。而輔相其宜。而石者。以見夫理之堅確不移者也。今茲石表文而裏質。陰陽之道也。華綸而象物。五行之變合也。出於明時。近御几格。豈偶然哉。箕子陳洪範九疇。首敘五行。中主皇極。蓋以爲五

行順序則地平天成萬世永賴不然則譴見於上變動於下矣然其要在於極之建不建而已人君者天下之主宰也。天人之際寔在於此。是故二五之流行而見於天者。雨暘寒燠風是也。肅又哲謀聖則有時。若之休。狂僭豫急蒙則有恒。若之咎。此感彼應。關機之發。間不容絲。其不可揜者如此。夫石微物也。臣願因以致其察焉。則聖天子合天心之妙。以接前聖之統。成今日之治。以垂萬世之法。不亦著乎。臣集不勝惓惓之至。天曆二年十一月甲子謹記。

### 御史臺記

天曆元年十一月壬申。御史臺臣入見內殿。皇帝若曰。以予觀於天下之治。不有臺憲之司。布在中外。則何以肅綱紀。正風化。輔成朝廷之大政。而休息吾民者乎。昔我世祖皇帝卽位之十年。始立御史臺。以摠國憲。其憂深慮遠。使吾子孫有以周防於隱微。禁制於暴著。其在斯乎。朕三復貽謀。究觀法意。懼無以彰皇祖創始之明。責任之重。其刻石內臺。儆有位於無窮焉。丁亥。御史大夫臣伯顏等言。謹具石請刻詔書。制詔國史。汝世延。汝集等其製文。係以御史大夫以下。至監察御史姓氏。臣世延。自中丞行臺江南。臣集承詔再拜稽首而言曰。我皇元之始。受天命也。建旗龍漠。威令赫然。小大君長。無有遠邇。師征所加。或克或附。於是因俗以施政。任地以率賦。出其豪傑而用之。禁罔疏闊。包荒懷柔。故能以成其大制作之事。蓋有待也。世祖皇帝。聖繇天縱。神武不殺。智縉羣策。取善無方。定天下而一之。乃考帝王之道。酌古今之宜。建國紀元。而著令典焉。立官府。置郡縣。各有其職。而上下相承。內外相維。聯屬貫通。以通功成務。丞相治中書。以統之上承天子。出政令於天下。較若畫一。莫敢踰焉。其或任焉而非人。令焉而非法。近焉而弗察。

遠焉而弗達。交修其非。以輔其所不逮。則責諸風憲。它官雖貴且重。不得預。况乎朝廷百執事。郡縣小大之吏。作姦犯科。爲不善者乎。是故使其君子安焉。以盡心。使其小人懼焉。而遷善。而天下之治成矣。此其官所以不可一日闕與。今上皇帝以武皇之親子。久勞於外。入正統緒。罪人斯得。功成不居。克讓大位。故其觀乎事變之極。而知患得患失者。必至於無所不至。察乎民庶之隱微。知其蠹弊深刻。而無所告愬。故慨然常寧興嘆。而屬意於斯者。豈偶然哉。謹按御史臺。至元五年置。秩從二品。二十一年。陞正二品。大德十一年。陞從一品。臺有大夫一人。後增一人。中丞二人。後又增二人。隨復故。侍御史二人。治書侍御史二人。殿中侍御史二人。治朝著之事。典事二人。掌幕府文書之事。後改爲都事三人。後又以都事之長。蒙古若色目一人。爲經歷。檢法二人。後廢。管勾三人。其一人兼照磨。監察御史十二人。後增至十六人。皆漢人。又增蒙古色目人。如漢人之數。今三十人。至元十四年。既取宋。置南行臺。二十七年。專蒞江南之地。號江南諸道行御史臺。官秩如內臺。而監察御史。今二十四人。西行臺。初由雲南廉訪司。陞行臺。大德元年。移治陝西。號陝西諸道行御史臺。蒞陝西甘肅四川雲南之地。延祐間。暫廢。隨復。其官秩如南臺。而監察御史。今二十人。至元六年。初置各道提刑按察司。正三品。有使。副使。僉事。察判。經歷。知事。二十八年。改肅政廉訪司使。副使。僉事。各二人。大司農奏。罷各道勸農司。以農事歸憲司。增僉事二人。經歷知事。照磨各一人。今天下凡二十二道。始建臺時。大夫則塔察兒也。今六十年。繼居其官者。名氏拜罷歲月。則有掌故在。

謹記。

天心水面亭記



天曆三年春。臣集。臣洞。臣九思。得侍清閒之燕。論山川形勝。臣九思曰。濟南山水似江南。殆或過之。臣洞之居在大明湖上。雍土水中而爲亭。可以周覽其勝。名之曰天心水面。可想見其處矣。於是有勅。臣集書其勝而記之。臣集再拜稽首而言曰。昔宋儒邵雍氏之詩曰。月到天心處。風來水面時。臣洞蓋取諸此。臣聞雍之爲道。上達乎包羲。以至於帝堯。周文孔子之盛。其始學也。隱居百原之山。仰而思之。至忘寒暑。如是者且二十年。其制作在皇極經世。其性情寓於詩。程顥氏之言曰。就其所至而論之。可謂安且成矣。噫。非幾於古之所謂睿知者。其孰能與於此。然則臣何足以知之。雖然。竊嘗聞之。斯二言者。豈非陰陽動靜之交乎。按先天圖。陽盡午中而姤生焉。擬之爲月窟。陰盡子中而復生焉。擬之爲天根。天根又曰天心。所謂天心無改移是也。以月臨天心。非陰陽之互交者乎。巽之爲卦。陰爲主。於物爲風。坎之爲卦。陽爲主。於物爲水。以風之初而行乎水之上。非動靜之始交者乎。所謂一動一靜之間。天地人之至妙。至妙者。庶於此乎。可見而臣不足以言之也。請以人事論之。月到天心。清之至也。風來水面。和之至也。今夫月未盈。則不足於東。旣虧。則不足於西。非在天心。則何以見其全體。譬諸人心。有絲毫物欲之蔽。則無以爲清。墮乎空寂。則絕物。又非其至也。今夫永滔滔汨汨。一日千里。下趨而不爭。渟而爲淵。注而爲海。何意於衝突。一旦有風鼓之。則橫奔怒激。拂性而害物。則亦何取乎水也。必也至平之水。而遇夫方動之風。其感也微。其應也溥。渙乎至文生焉。非至和平乎。譬諸人心。拂嬰於物。則不能和流。而忘返。又和之過。皆非其至也。是以君子有感於清和之至。而永歌之不足焉。臣洞天資明爽。應物樂易。宜能有取於此。請以是爲記。

勅賜龍章寶閣記

今上皇帝改元統之二年。御書閑閣看雲四大字。以賜特進上卿玄教大宗師吳全節。受言藏之。摹勒金石。仍改至元之六年。重鐫貞木。作大閣于饒州路安仁縣雲錦山之崇文宮。以庀之。九月一日。自上。上都清暑。還次懷來。集賢大學士不剌失利等。以其事聞。請名之曰龍章寶閣。而詔臣集執筆以書。臣集伏退草萊。深懼不足以奉揚一代之盛典。而明詔所臨。敢不再拜稽首。而謹書其事云。臣聞我國家祖宗以來。德意深厚。嘉惠臣民。凡其報功敦族。進賢使能。興利恤患。懷遠厚往。下至一善一藝之錄。慶賞德施。必稱其事。爵祿土田。弓矢衣服。車馬金玉之賜。無所愛吝。若夫詔告臣庶。訓勅師旅。贊詞彌文。日盛一日。無以加矣。至於機務之暇。親御翰墨。心畫之妙。成章於天。以賜臣下者。則未之見也。皇上天縱聖學。發自宸衷。作爲此書。度越前聖。於戲盛哉。然而宗親戚屬之近。將相勳舊之家。內而禁衛臺閣之臣。外而雄藩巨鎮之府。未嘗有所賜也。而臣全節獨被異恩。羣臣莫及。此御史中丞臣祖常。太常臣玄。所以欣抃舞蹈。奉詔譟頌。嘆於無窮者也。然藏副于名山。嚴奉以崇構。此臣全節區區之忠。報稱於萬一。而不能自己者也。夫或謂臣曰。日月運行。次舍周矣。皇上君臨萬方。覆幬廣矣。雲錦之山。邈在東南。湖江之表。何獨得此于聖明之世乎。臣對曰。景星麗天。垂光必有所注。醴泉發地。流潤必有所達。和順積久。神明來鍾。有在于是。豈常情之所可測哉。臣全節自其先師神德真君臣留孫。事世祖皇帝爲玄教之宗。以清靜寧一之說。贊乎列聖。重熙累洽之治者。亦深遠矣。臣全節嗣而傳諸其徒。相爲長久。願其師弟子父母之邦。相去百里而近。恩光之所被及。不於此而何適哉。閑閣者。臣全節自幼至今之所自名也。看雲者。臣全節言將歸隱之處也。旨意之微。豈不欲其在朝在野。隨隱隨顯。無適而不自得。是以特書以遺之也乎。臣又聞之。明

有禮樂。幽有鬼神。其理一也。凡而繼玄教而有作者。尙克清慎篤敬。以率其衆。毋忘聖天子明顯之恩。守十之吏。觀風之使。仰而觀之。見龍章之在斯也。他郡莫之有焉。其興感嚴奉之憲。當何如哉。川靈嶽祇。凡百有神。依乎上帝。貴神之所治。呵禁衛護。毋敢厭教。則函顯之道。不亦交著於億萬斯年乎。至正元年五月丙寅謹記。

勅賜玉像閣記

至正元年五月。臣集得集賢院文書云。去年九月一日。大學士不刺失利等。奏特進上卿玄教大宗師吳全節。嘗蒙先朝賜白玉之璞。命工琢之。擬爲太上老君說經之像。刻沉水之香。以爲山而居之。奉以歸諸龍虎山上。清正一宮達觀堂之閣。請名之曰玉像。而皇上寵賜閣閣看雲四大字。模以文梓。飾以雲龍。奉而置諸其閣矣。有勅汝集其作文以記之。臣集謹沐浴齋肅。北望受命。再拜稽首而言曰。臣聞之。天不可得而知也。而聖人與天爲一。求諸聖人。則天或可得而窺矣。聖人遠矣。擬諸形容而象之。或可得而見之也。與均是人也。有一人之人。有十人之人。有百人之人。有千人之人。有萬人之人。有億人之人。有兆人之人。以一人而當兆人之人者。其惟聖人乎。聖人猶天也。道家之言。以爲聖不足以盡之。又有至人神人之云者。極聖人之盛。至於不可知者。以爲言也。均是物也。有一物之物。有十物之物。有百物之物。有千物之物。有萬物之物。有億物之物。有兆物之物。以一物而當兆物之物者。自非天下之至剛至純。至粹至精。至貴至美。其孰能與於此。可以比德於君子之盛者。其惟玉乎。傳曰。乾爲天。又曰。爲玉。玉天之類也。是以禮天者用之。言可以通乎天也。道家宗老子尊老子。而謂之老君。猶以爲未足。而推之。謂之太上焉。名其所

不可名而事之於天一矣。玉象之作。其知道者之所爲乎。上古聖神。以爲天之無言也。而其所以無言者。亦不可得而名言也。則畫以示之。然後日月星辰之所以運行。風霆雨露之所以變化。仰而觀之。天之所以爲天者。無不在是。今上皇帝。按筆結字。昭宣人文。平直方圓。輝光流動。原乎性情之正。極乎神明之妙。心畫之所示。不亦高朗著見矣乎。求之天者。觀於此而有得。則於其齋明盛服之有臨。辟面盎背之可象者。必有不言而喻者矣。以此事天。豈非玄教之所以爲可宗者乎。夫上清正一宮者。道家之會歸。而嗣漢天師張君之所治也。按龍虎山志。宮有堂五十。以分處其徒衆。達觀其一也。命玄教大宗師之弟子世居之。而大宗師自神德真君以來。羽翼天朝。柱石道教。朔南相望。表裏不二。繼繼繩繩之傳。方未艾也。噫。王象之所奠。天書之所臨。非特一堂之榮也。一宮之榮也。非直一宮之榮。天下四方脩老子之學者。皆與有榮者矣。然則斯閣也。有千載之係焉。故書以爲記。至正元年閏五月己卯日謹記。

### 碑銘

#### 大元勅賜饒州路番君廟文惠觀碑銘

番君之有廟于番。易久矣。舊廟在郡治之廳事。故宋郡守范文正公遷之城西北。至國朝廷祐□年。郡守王都中以其廟之久弊。更新之。郡人玄教大宗師吳全節。作芝山道院。以主其廟。故翰林學士元明善爲書其事。作迎送神曲。以祀神焉。郡人以廟隘。弗稱所以尊敬番君者。袁仁慶之別業。在永平門外。平衍寬阜。因玄妙觀。住持王仁近。致諸大宗師。以爲番君廟。仍作爲宮于其側。以守視之。仍改至元之三年。自舊

廟奉番君之舊像以居。仍以梅鎗將軍侑食。守將吏士各率其屬庶士庶民。後先奔走。不約而集。道迎有序。至廟。具少牢禮幣。大合樂以饗之。民大悅。明年。大宗師言于朝。天子遣使者封奩香。織金文之幣。爲之衣。以賜勅翰林院畫旨。賜文惠觀。俾有司勿敢有所撓。因命顧神凝。素文教真人于有興。及朱道冲。方志遠。治觀事。而太常議番君當易名曰文惠王。文因漢舊諡。而惠者著其流澤。故鄉之無窮也。觀以是得名。廟有故守臣顏魯公及范公之祠。郡人以爲故萬戶齊某世。以其兵守饒。亦有別祠。前太守。今浙省參政王都中。能治郡。亦畫像而事之。而施田度弟子甲乙。治觀事者。志遠也。六年九月朔旦。天子清暑上都。還次懷來。集賢大學士不刺失利等。用大宗師言。新廟之宮。宜勒銘。有勅以命臣集。臣謹按番君事。見史策。世能言之。漢諸侯王。惟長沙最久。國分而微。而廟祠在番易。千數百年不絕。得民心者。茲是其久乎。抑神明之感。有所在乎。昔徐偃之得民。避穆王而去之。民祠之太未。太未之徐。皆宗偃。李唐時。徐氏子孫。有守其郡者。大新其廟。韓愈嘗書其實焉。吳秦伯世家。春秋末。吳益大。與中國會盟。季子之賢。仲尼猶稱之。旣無其後。子孫散處。蓋以國爲氏。番君又以吳氏興。名最著。至德之傳。其不可以名稱如此哉。太宗師從其師。受知世祖皇帝。事列聖五十餘年。尊榮安久。卿相莫及。位特進。號曰真人。其大父父有武宗皇帝之錫命。若曰。世祚饒國。建立爲公。於是大宗師因祖父之賜履。遠推本於宗家。再作番君之新廟。極其盛大。其亦倣於徐氏之故乎。臣集敢不拜手稽首。奉詔著銘以遺之。其詞曰。

有吳世家。於赫番君。相是有歸。克換其羣。江南之東。惟番惟大。洪源盛流。彭蠡其匯。大納有容。保和以冲。含生所資。神明來宮。額額千里。中城聽治。

民之來享。出入多制。神道尙幽。人道尙明。  
歲久而弊。東門有田。萬神攸萃。自堂徂基。  
顧瞻故鄉。孰非吾土。隨感有見。棟宇言言。  
思著思存。道家之宮。以祀上帝。相方度新。  
有煒裳衣。天子錫之。神之格思。曷其有替。  
麗牲有碑。百神敬共。明詔在茲。食爾舊德。  
勿私爾邦。惠我四國。文惠之慶。人無異辭。  
史臣脩詞。曾孫孫子。來享來安。既遷既好。

